寒柳堂集

陳寅恪集

獨立之精神自由之思想

应相交易 田水区市

8 -

寒柳堂集

生活·讀書·新知三

聯書店

Copyright © 2015 by SDX Joint Publishing Company All Rights Reserved. 本作品版權由生活·讀書·新知三聯書店所有未經許可,不得翻印。

圖書在版編目 (CIP) 數據

陳寅恪集. 寒柳堂集/陳寅恪著. —3 版. —北京: 生活· 讀書·新知三聯書店, 2015.7 ISBN 978-7-108-05400-5

I. ①陳… Ⅱ. ①陳… Ⅲ. ①陳寅恪 (1890 ~ 1969) - 文集 ②社会科学-文集 Ⅳ.① C52

中國版本圖書館 CIP 數據核字 (2015) 第 131970 號

封面所用拓片文字節自一九二九年立於清華大學內 王國維紀念碑碑銘(陳寅恪撰文,林志鈞書丹)

定字印 出版發行 責任印制 陳寅恪集編者 版式設計 封扉設計 責任編輯 次 北京市東城區美術館東街一 生 五十五元 六三五毫米×九六五毫米 十六開 鸿博昊天科技有限公司 新華書店 寧成春 孫曉林 七,00 Ō 一〇〇九年九月北京第二版 六六千字 ō 00010 活 一五年七月北京第七次印刷 一五年七月北京第三版 〇一年六月北京第 岳 陳美延 請 曹 潘 |-|||||,000年 新 施 聯 書店



授 先後任教於西南聯合大學、香港大學、廣西大學和燕京大學。一 蘇黎世大學、法國巴黎高等政治學校和美國哈佛大學。一九二五年受聘清華學 陳寅恪(一八九〇——一九六九),江西修水人。早年留學日本及歐美, 及故宮博物院理事等,其後當選為中央研究院院士。一九三七年 九四二年後為教育部 後任清華大學中文、 九五 一年後為中 山大學教授。 聘任教授。一 歷史系合聘教授, _ 九四六年回清華大學 九五五年後并為中國科學院哲學社 兼任中央研究院理事、 任教。一 九四四年被選為英國科學院通訊院 蘆溝橋事變」後挈全家離北 歷史語言研究所研究員 九四八年南遷 先後就讀 會 科學 校研究院 學 於德國柏林大學、瑞士 廣州, 部 委員 任嶺 導 第 師 南大學教 平南 組 主 國 1 任

陳寅恪集十 據 E 詩集(原名陳寅恪詩集附唐賞詩存)和讀書札記一集(原名陳寅恪讀書札記舊唐書新唐書之部)八九十年代 稿 三聯書店 海古籍出 ·三種· 隋唐制 版 一九五七年版重印), 内容基本不變。 干四四 社 出 版。 m 度淵源略論稿、 此次出版以上海古籍版為底本 收入了現在所能找到的作者全部著述。 唐代政治史述論稿、 惟寒柳堂集增補了 (隋唐制度淵源略論稿、 元白詩箋證稿 其中 寒柳堂 |寒柳堂記夢未定稿(補)」| 柳如是 集 唐代政治史述論稿二 金明 別傳七 館叢 稿 八十年代曾 初編 金金 書 明

分別 由 清 華 大 學 出 版 社 和 E 海 古 籍 出 版社 出 版, 此次出 版均有增補。 書信 集、 讀書 札記二 集、 讀書 札記

講義 及 雑 稿 四種 均 為 新 輯 全 書 編 輯 體 例 如 下

二、本集所收 要依據作者手 所收 内容 已刊、未刊著述均予校訂, 凡體例不一或訛脫倒衍文字皆作改正。引文一般依現行點校本 ,跡錄 已發表的均保持發表時 出 的原貌。 經作者修改過的論著, 則採用最後的修改本。 未刊 稿 主

述係針對 原版本而 來, 則引文原貌 酌 情子 以保留。 以上改 動均不出 校記

書信等均附初次發表之刊物及時

間

未刊文稿

盡量注

明寫作

時

間

凡已刊論文、

序跋

校核,

如二十

-四史、

資治通

鑑等。

尚

無點校本行世的史籍史料,大多依通行本校核。少量作者批語

論

保留 少數 根據 作者 異 字。 生前 引文中 願望 凡為閱讀之便而補入被略去的內容時, 全書採用繁體字豎排。 人名 地名、 書名均不加符號 補入文字加 注 明 凡屬 般 採用 作 者說 通 的明性文 行

字則加

原稿不易辨識的文字以□示之。

指

Œ

助。 陳寅 在此 俗集的出 謹 向所有關心、 版曾得到季羨林、 支持和參與了此項工作的朋友表示衷心的感謝 周一良、李慎之先生的指點,並獲得海內外學術文化界人士 並誠懇地希望廣大讀者批評 的 相

生活・讀書・新知三聯書店二〇〇〇年十二月

寒柳堂集

讀書札記二集 讀書札記二集

講義及雜稿

在明館叢稿 金明館叢稿 金明館叢稿 一二百詩箋證稿 一二百詩箋證稿



一九〇〇年) 陳寶箴 (右銘,一八三)



兄妹合影於湖南長沙巡撫署又一村 一八九六年春 一八九六年春






一九二八年前後 三七年)在上海時留影 三七年)在上海時留影



一九四七年初 院陳夢家寓所門前 與夫人唐篔合影於北平清華園勝因



女)、美延



後左:幼女美延,後右:次女小彭與家人,合影



一九六九年十月十七日於廣州殯儀館告別儀式陳寅 恪遺容



一九五四年自刊油印綫裝本「論再生緣」封面

論再生樣

原陳康

長,實測撰明左京指無甚直其、就不可以辨明古文氣法以江尚精城何律總之看、流中的 世間影通、仍知所方家取皆堪、因有近陽形均即刊七字尚者,然其情孽遭詞。其節被托 到是三不是照信一為國為真翼後征收也,以衣、於鄉西省、從御受民至布職之文、續其 直好少是随小此,陳至新越者,亦取高日。稍得到七字唱正體,則略如其內容大意提 也是是一年以外以,村支重送得夫,院司公之人為,即在城恭之事,或進行所止也 一九八日 過五年生職一年又 随用副於花心布三中也不你利将及捉其如本、生司四人 四年五代四州三天、各种湖北京心之前,益皮引所心舍之衣子功可、商易不礼、囚禁 三昌也經心見主意,遇漸減獲及易矣。又中為以後、研治名曰及進議務、霸其過少、自

存員議并所應審部於因本,对一別轉移進者十七卷作者之事故、数可此致、無情以

五月回然為衙門故 今也是幸論,我提前衛五八其又成二

有方無 在縣石事王朝限 苦之詞受止 中若、本有了歸蘇莊藏,既接一 前仁服 17月1日、一天日本十二十四十月五五味、可機器代質問告、早下三八本丁

「再生珠日十七七所若原鎮坐上雪城、分前跪放除右在去, 該為行文院科成, 下刊日

中山江西北京新縣原出,及開於四百谷後十

論再生緣」正文首頁

一九五四年自刊油印綫裝本





一九四○年四月刊於昆明「秦婦吟校箋」封面、扉頁

一九十八年三月俞平伯教題富恪先生文集傳世高志來學。名山事業,派水人琴。

十伯爲陳寅恪文集題詞

目次

論再生緣	-
論唐高祖稱臣於突厥事	2
韋莊秦婦吟校箋	Ξ
狐臭與胡臭	五七
徐高阮重刊洛陽伽藍記序	
朱延豐突厥通考序	立
俞曲園先生病中囈語跋	六四
讀吳其昌撰梁啟超傳書後	六六
蓮花色尼出家因緣跋	六九
三國志曹沖華佗傳與佛教故事	七六
贈蔣秉南序	二
[附]寒柳堂記夢未定稿	二
寒柳堂記夢未定稿(補) ····································	一〇六

論再生緣

寅恪少喜讀小説, 宗教哲理, 又中歲以後, 研治元白長慶體詩, 絕不可以桐城古文義法及江西詩派句律繩之者,而少時厭惡此體小説之意, 有所心會。 遂稍稍考 蓋厭 固有遠勝 惡其繁複冗長也。 衰年病目, 證其本末, 雖至鄙陋者亦取 吾國彈 草成此文。 廢書不觀, 詞七字唱者, 及長遊學四方,從師受天竺希臘之文, 寓目。 承平豢養, 唯聽讀小説消日, 偶至再生緣一書, 窮其流變, 廣涉唐五代俗講之文, 於彈詞七字唱之體 然其構章遣詞,繁複冗長,實與彈詞 獨彈 詞七字唱之體則略知其 無所用心, 忖文章之得失, 内 讀其史詩名著 容大意後, 深有感於其作者之 興窈窕之哀思 遂漸减損 七字唱 輒 始知 棄去 無甚 所言 差

關 於再生緣前十七卷作者陳端生之事蹟,今所能考知者甚少,茲為行文便利故, 節録 原文, 並附以辨釋於後。 不拘材料時

聊作無益之事

以遣有涯之生

一公爾。

再生緣第貳拾卷第捌拾回末,有一節續者述前十七卷作者之事蹟, 最可注意。茲迻寫於下。至

有關續者諸問題, 今暫置不論, 俟後詳述之。其文云:

寅恪案,所謂「再生緣。接續前書玉釧緣」者,即指玉釧緣第叁壹卷中陳芳素答謝玉輝之言「持 緣者作,(「者作」疑當作「作者」。)半途而廢了生前。偶然涉筆閒消遣,巧續人間未了緣。 苦,悠悠卅載悟前緣。有子承歡萬事定,(「定」疑當作「足」。)心無罣礙洗塵緣。有感再生 (「懺」疑當作「讖」。)中路分離各一天。天涯歸客期何晚,落葉驚悲再世緣。 前緣緣未了, 再生緣。接續前書玉釧緣。 空題名目再生緣。 業已詞登十七卷,未曾了結這前緣。既讀(「讀」疑當作「續」。) 可怪某氏賢閨秀, 筆下遺留未了緣。 後知薄命方成 我亦緣慳甘茹

齋修個再生緣」及同書同卷末略云:

年間,又幹一番事業,與如昭芳素做了三十年恩愛夫妻,才歸仙位。陳芳素兩世修真, 又臨凡世。 却說謝玉輝非凡富貴, 更兼芳素癡心,宜主憐彼之苦修,亦斷與駙馬(指謝玉輝)爲妾。 百年之後,夫妻各還仙位。唯有[鄭]如昭情緣未斷, 謝玉輝在大元 到元朝年間

列仙班, 皆後話不提。

筆下遺留未了緣。後知薄命方成讖,中路分離各一天。天涯歸客期何晚,落葉驚悲再世緣」之 第壹卷第壹回, 及同書同卷結語所云「今朝玉釧良緣就,因思再做巧姻緣」等而言。故陳端生作再生緣,於其書 開宗明義, 闡述此意甚詳, 無待贅論。所可注意者,即續者「可怪某氏賢閨秀,

距第壹柒卷成時,亦已四十餘年。(説詳下。)雖以續者與原作者有同里之親,通家之誼,猶不 第壹柒卷或十七卷本, 蓋再生緣在當時先有流行最廣之十六卷本,續者必先見之,故有「可怪」之語。 故有「後知」之語,然續者續此書時,距十六卷本成時, 約已逾五 其後又得見

敢顯言其姓名, 僅用[某氏賢閨秀]含混之語目之, 其故抑大可深長思也。

太僕寺卿之老祖句 頤道居士 陰柔之美。其才華煥發, 陳端生於再生緣第壹柒卷中,述其撰著本末,身世遭際,哀怨纏綿,令人感動,殊足表現女性 固應如是也。 Щ 亦當愧謝弗如也。 茲特遙録其文稍詳, 一笑。)隨園弟子巡撫夫人之幼妹秋穀所能企及,即博學宏詞文章侍從 固非「福慧雙修」,(見下引陳文述題陳長生繪聲閣集詩。 不僅供考證之便利 此四字甚俗 兼可見其詞

再生緣第壹柒卷第陸伍回首節(坊間鉛印本删去此節。)云:

語之優美,富於情感,不可與一般彈詞七字唱之書等量齊觀者也。

盤上椒花頌未便。管隙敢窺千古事,毫端戲寫再生緣。也知出岫雲無意,猶像穿窗月可 中樓閣千層現 雨,椿萱兮(「兮」疑當作「分」。) 韻課詩篇。隔牆紅杏飛晴雪, 掻首呼天欲問天, 問天天道可能還。盡嘗世上酸辛味, 追憶閨中幼稚年。姊妹聯牀聽夜)繡倦來猶整線, 島外帆檣數點懸。 春茶試罷更添泉。 侍父宦遊遊且壯,蒙親垂愛愛偏拳。 地鄰東海潮來近,人在蓬山快欲仙。 映榻高槐覆晚烟。年(「年」 風 前柳絮才難及

淚 字。如非脱漏,則「征」字必誤也。鄭氏鈔本作「失羣征雁斜陽外」。是。)羈旅愁人絶塞邊。 順境殊樂安,(「樂安」疑當作「安樂」。)利鎖名韁却掛牽。一曲京(「京」疑當作「哀」。鄭氏 鈔本作「茶聲沸」更佳。)廢,刻燭催詩笑語聯。錦瑟喜同心好合,明珠蚤向掌中懸。 姑憐弱質, 更忻夫壻是儒冠。挑燈半(「半」疑當作「伴」。)讀茶沸(「沸」疑當作「湯」。 今日讖,因而題作再生緣。日中鏡影都成驗,(寅恪案,此句疑用開天遺事宋璟事。)曙後 從此心傷魂杳渺,年來腸斷意尤煎。未酬夫子情難已,强撫雙兒志自堅。日坐愁城凝血 鈔本作「驚」。亦可通。)絃絃頓絶,半輪破鏡鏡難圓。失羣征(寅恪案,「征」字下疑脱四 首夏天。歸棹夷猶翻斷簡,深閨閒暇待重編。由來蚤覺禪機悟,可奈於歸俗累牽。 「頤」。)頻指教,癡兒説夢更纏綿。自從憔悴堂萱後,遂使芸緗綵華(「華」疑當作「筆」。) 重複誤寫歟?今見鄭氏鈔本此句作「死别生離志最堅」。可供參考。)慈母解順(「順」疑當作 成此一句也。傳鈔者漏寫「孝子忠臣性」五字。又見下文有「自從憔悴堂萱後」七字, 剛是脱靴相驗看,未成射柳美因緣。庚寅失恃新秋月,辛卯疑(「疑」疑當作「旋」。)南 寫幾回,離合悲歡奇際會,寫幾回,忠奸貴賤險波瀾。義夫節婦情何極,自然憔悴堂 神飛萬里阻風烟。送(「送」疑當作「遂」。)如射柳聯姻後,好事多磨幾許年。 (寅恪案,此句疑當删去,而易以「孝子忠臣性自然」一句,蓋作者取玉釧緣卷首詩 豈是蚤爲 幸賴翁 鄭氏

星孤信果然。惟是此書知者久,浙江一省徧相傳。髫年戲筆殊堪笑,反勝那,淪落文章不 皇甫少華諧伉儷, 閨閣知音頻賞玩, 斷腸人恨不團圓。 明堂酈相畢姻緣。 ,庭幃尊長盡開顏。諄諄更屬全終始,必欲使,鳳友鸞交續舊弦。 重翻舊稿增新稿,再理長篇續短篇。歲次甲辰春二月,芸 爲他既作氤氲使,莫學天公故作難。造物不須相忌

同書同卷第陸捌回末節(坊間鉛印本删去此節。)云:

窗仍寫再生緣。悠悠十二年來事,

盡在明堂

一醉間。

日, 霏將送臘, (鄭氏鈔本「芍」作「雪」。詳見後附校補記。) 紅梅灼灼欲迎春。向陽爲趁三年 十張完成 (鄭氏鈔本「年」作「竿」自可通。)入夜頻挑一盞燈。僕本愁人愁不已,殊非是, 拈毫弄 一卷,慢慢的,冰弦重撥待來春。知音愛我休催促,在下閒時定續成。 白芍霏

墨舊如心。(「如」疑當作「時」。)其中或有差譌處,就煩那,閱者時加斧削痕。

成讖, 先輩袁簡齋,頗喜攀援當時貴勢,終亦未獲致通顯。其最可笑者,莫如招致閨閣名媛,列名於 人其事之本末。今所依據之最重要材料,實僅錢塘陳雲伯文述之著述。文述為人,專摹擬其鄉 夫得歸, 據作者自言「羈旅愁人絕塞邊」及「日坐愁城凝血淚, 中路分離各一天。天涯歸客期何晚,落葉驚悲再世緣」,是陳端生之夫有謫戍邊塞 而端生已死之事也。檢乾隆朝史乘及當時人詩文集,雖略有所考見,但仍不能詳知其 神飛萬里阻風烟」, 又續者言「後知薄命方

中 漢軍旗籍也。 中文述自注。)然文述晚歲,竟以此為多羅貝勒奕繪側室西林太清春 其女弟子籍中,)所痛斥,遂成清代文學史中一重可笑之公案。今逐録太清所撰天游 所謂「春風桃李羣芳譜」者是也。(見文述撰頤道堂詩選貳貳留別吳門詩及此詩 (顧春字子春 閣集第肆卷 號 太清

-關涉此事者於後,非僅欲供談助,實以其中涉及續再生緣事, 詠壹伍華藏室詠許因姜雲姜及同書壹陸題子婦汪端自然好學齋詩後兩七律序語等, 元文中「休寧」作「海陽」,蓋用休寧舊名也。又頤道堂詩選拾有[嘉慶十七年壬申]二月初五 錢塘許宗彦及德清梁德繩之女,適休寧孫承勳,與文述子裴之即芹兒之妻汪端, 又其妻龔氏字羽卿,長女字萼仙,次女字苕仙,亦可謂神仙眷屬矣。一笑。)著有碧城仙 錢塘陳叟字雲伯者,以仙人自居, (寅恪案, 雲伯以碧城仙館自號, 其爲仙也, 固不待論。 (箋?)一卷墨二錠見贈, 日爲芹兒娶婦及示芹兒並示新婦汪端詩,同書貳叁復有[道光七年]丁亥哭裴之詩, 至於汪端, 可參陳壽祺左海文集拾駕部許君墓志銘及閔爾昌碑傳集補伍玖阮元撰梁恭人傳。 中多綺語, 更有碧城女弟子十餘人, 代爲吹嘘。去秋曾託雲林(寅恪案, 雲林者, 則其事蹟及著述,可考見者頗多,以與本文無關,故不備録。)以蓮花筏 余因鄙其爲人,避而不受,今見彼寄雲林信中有西林太清題其春 可資參證也。其文如下: 爲姨表姊 皆可參 西冷閨 但阮

並自和原韻一律。(寅恪案,今所見春明新詠刊本,其中無文述僞作太清題

銷冷玉鉤。

(自注:仲姊慶生早卒。)争似令嫻才更好,

金閨福慧竟雙修。

) 鴛牒香

詩及文述和詩, 殆後來删去之耶?)此事殊屬荒唐,尤覺可笑。不知彼太清此太清是一是

二?遂用其韻, 以記其事。

含沙小技太玲瓏,野鶩安知澡雪鴻。綺語永沈黑闇獄,庸夫空望上清宫。碧城行列休添 人海從來鄙此 公。任爾亂言成一笑, 浮雲不礙日光紅。

寅恪案, 文述所為, 雖荒唐卑鄙,然至今日觀之,亦有微功足録,可贖其罪者,蓋其人為陳兆

又曾獲見端生妹長生。其所著頤道堂集碧城仙館詩鈔及西泠閨詠中俱述及端生事。

遂録其文於下:

崙族孫,

陳文述頤道堂詩外集陸(國學扶輪社刊碧城仙館詩鈔玖)載:

題從姊秋穀(長生)繪聲閣集七律四首 濃香宫麝寫烏絲, 題徧班姬鮑妹詩。 一卷珠璣傳伯姊, 六朝金粉定吾師。

碧城醒我遊仙

湖山佳麗水雲秋 璇璣織錦女兄愁。 龍沙夢遠迷青

(自注:長姊端生適范氏,壻以累謫戍。寅恪案,「累」碧城仙館詩鈔作「事」。 繡偈吟君禮佛詞。 面 面 記取宣南坊畔宅, 遥山擁畫樓。 紗幔傳經慈母訓, 春明初拜畫簾遲。

碧浪蘋香一水 (一水」碧城仙館詩鈔作「水一」。)涯,韋郎門第最清華。 傳來鸚鵡簾前語

恭人集名,蘩香李太恭人集名。)更聞羣從皆閨秀,(自注:娣周星薇, 長姑淑君, 小姑渚 蘋,皆能詩。)詠絮何勞說謝家。 繡出芙蓉鏡裏花。梅笑遺編寒樹雪,蘩香詩境暮天霞。(自注:兩姑皆有詩集。梅笑周太

仙館詩鈔作「起草」。)還勞翠管評。 瑟,畫中遠浦月盈盈。仙郎縱有凌雲筆,(「筆」碧城仙館詩鈔作「賦」。)作賦(「作賦」碧城 繪水由來說繪聲,玉臺詩格水同清。偶從寒夜燒燈讀,如聽幽泉隔竹鳴。江上微波秋瑟

又西泠閨詠壹伍云:

宣再生緣條引閨媛 一死。許周生梁楚 也,相傳亦女子所 世,相傳亦女子所 以寄別鳳 一天 一一天。 一一天。 一一天 一一天 一一天 一一天 一一天 一一天 一一	叢談,其文全出自西冷對泳。又王紹公隱曼录十七卷付對爰叢录一卷。寅各未导見其書,叢談,其文全出自西冷對泳。又王紹公隱曼录十七卷付對爰叢录一卷。寅各未导見其書,世夫婦爲足成之,稱全璧焉。「南花北夢江西九種」梁溪楊蓉裳農部語也。「南花」謂天雨生夫婦爲足成之,稱全璧焉。「南花北夢江西九種」梁溪楊蓉裳農部語也。「南花」謂天雨生夫婦爲足成之,稱全璧焉。「南花北夢江西九種」梁溪楊蓉裳農部語也。「南花」謂天雨上,與有四□,句山太僕女孫也。適范氏。壻諸生,以科場事爲人牽累謫戍。因屛謝膏沐,繪影閣討家□□	公隱曼禄十七条 (寅恪案,蔣瑞 (寅恪案,蔣瑞 (寅恪案,蔣瑞	受對泳。又王紹及子勵明堂,男裝在壁焉。「南花北」	職鸞之感。曰,壻不歸離鸞之感。曰,壻不歸群馬足成之,稱△生夫婦爲足成之,稱△生夫婦爲足成之,稱△生夫婦爲足成之,稱△生夫婦爲足成之,稱△生夫婦爲足成之,稱△生夫婦爲足成之,稱△	職 撰 再 生 编 撰 再 生 编 撰 再 生 编 影 閣 就 件 , 與 正 本 , 「 北
--	---	--	--------------------------	--	---

即

道光七年也。)以通常行文之例言,長生應列於其姊端生之後,今不爾者,

不知是否即蔣氏所引者。並可參考鄧之誠先生骨董瑣記伍南詞再生緣條。

稱, 距 詩匯壹百捌等書葉紹楏小傳。)李桓 復 論 冷閨詠此節必成於嘉慶二十二年任巡撫以後,始得稱紹楏為「中丞」,「中丞」者御史中丞之簡 端生詩之前, 春融堂集 今考定此等記載寫成年月, 並推求其依據之來源, 上引陳氏兩書皆關涉端生及其夫范某之主要材料, 二十二年由廣西布政使擢廣西巡撫,二十五年被議降級解職,其次年即道光元年病卒。 其全書完成之時代, 載 清代巡撫兼帶右副都御史之銜名,故習俗以「中丞」稱巡撫。據此,則文述詠陳長生之詩, 未能詳確 い歸 「葉琴柯中丞」之語。 琴柯者, 細寫南花北夢愁。 、戴佩荃蘋南遺草、陸燿切問齋集等, 一抹水西流 其第六題即為「繪聲閣詠家秋穀」者, 然即就此以論再生緣之書,亦可不致漫無根據,武斷妄言也。西冷閨詠壹伍詠 不能超過十年之久也。(西泠閨詠作者自序所題年月為道光丁亥閏五月 别緒年年悵女牛。 從古才人易淪謫, 「耆獻類徵壹玖陸疆臣類肆捌載紹楏本末頗詳。 紹楏之字。 金鏡月昏鸞掩夜, 悔教夫壻覓封侯。 (可參湖海詩傳肆拾兩浙輶軒續録壹陸 推論端生之死及范某赦歸之年。固知所得 其詩中既有「香車桂嶺青山暮」之句 更參以清實録、清會典、清代地方志及王 兩者內容大抵相同, 而西泠閨詠較為詳 玉關天遠雁横秋。 苦將夏簟冬红 紹楏 其序中 然則 於嘉 晚 晴 廖 簃 驰 西

殆文述詠長生詩

成 則至少在嘉慶六年文述與芳燦在京師相識以後也。(見下引芳燦送雲伯序。)文述詠端生之詩作 走。其時至少在嘉慶三年以後。(見碑傳集壹百捌趙懷玉撰楊君芳燦墓誌銘。 既 亦當與道光七年相距 (参清會典事例肆柴吏部漢員銓選親族迴避等條。)已由甘肅外職改捐員外郎, 楊蓉裳農部」,則芳燦因其仲弟授甘肅布政使, 時代頗晚 成後 始牽連詠及端生,遂致列姊於妹後耶?若果如是者,則文述詠端生之詩,其作成之時 又得 一旁證矣。 甚近也。此點關涉再生緣續者之問題,俟後更詳論之。至其 援引道府以上同祖以下兄弟同省迴避之例)若更精密言之 在户部廣東司行 稱楊芳燦為

關 於文述題繪聲閣集詩四首 首詩 其第二首最關重要,置後辨釋。其餘三首依次論證之。

京,有遇見文述之可能,参合推定之於下。 可取兩事即(一)文述初次隨阮元入京及第二次會試入京之年月,與(二)長生於此兩時間適在北 第 一首中最關重要者,在文述初次得見陳長生年月,並文述見長生是否多次等問 題。此等問題

楊芳燦芙蓉山館文鈔貳送陳雲伯之官皖江序略云:

修用光查孝廉揆俱爲序引,時丙寅(嘉慶十一年)新正穀日也。 嘉慶辛酉(六年)余與雲伯相見於都下。於茲五閱寒暑矣。同人惜别,贈言盈篋。 余與陳編

嘉慶丙辰(元年)儀徵阮伯元先生視學浙江。越二年戊午(嘉慶三年)從先生入都。 慶四年已未)又從至浙。 。越二年(嘉慶六年辛酉)又以計偕入都,居京師者五年。

又頤道堂詩選壹伍略云:

芳燦文參證。)重蒞琴河,女士下世已十五年矣。感賦 見碧城仙館詩鈔拾卷, 余自辛酉(嘉慶六年)至乙丑(嘉慶十年)京師舊作多琴河李晨蘭女士加墨。(寅恪案, 後附有李元塏跋,所題年月爲嘉慶[十年]乙丑秋七月。可與上引楊

9

長久,然鄙意文述之獲見長生實在第一次。所以如此推論者,文述為人喜攀援貴勢, 寅恪案,文述第一次至京為嘉慶三年,出京為嘉慶四年。第二次至京為嘉慶六年,出京為嘉慶 耆獻類徵壹玖陸疆臣類肆捌葉紹楏傳略云: 於長生適在北京與否之問題,可以依據葉紹楏歷官及居京之年月推定之也。 夫人之資格,苟長生此時適在京師,而文述不急往一修拜謁之禮者, 閣名媛往還。 一年正月。第二次即文述所謂「居京師者五年」是也。第一次在京之時間, 長生為兆崙孫女, 本與文述有同族之親, 況以袁隨園女弟子之聲名, 則轉於事理為不合矣。至 雖遠不及第二次之 葉琴柯編修 尤喜與閨

十五五 葉紹楏 西監察御史。六年五月充雲南鄉試正考官,八月命提督雲南學政。九年差竣回京。 年服 五月充日講起居注官。 浙江歸安人。 闋 補原官。 乾隆五十年由舉人於四庫館議 五十八年進士, 四年二月改河南道監察御史, 改庶吉士。六十年散館授編修。 叙 授内 四月命巡視南城。 閣中書。 五十三年丁母 嘉慶三年二月大考 五年轉掌江 Ŧ

巡視天津漕務。

十一年六月升工科給事中。

京, 有 習慣推之, 圖 寅恪案, 繪 所聞 師 不過晤 成之時 謁見與 四年又隨 因紹 知, 葉紹楏與陳長生從何時起 遂厭 見之後, 、賦詩並非 楏 間 必有更多詩什, 可以推見也。 元出京。 已任職翰林院編修, 節, 今暫不置論。 惡畏避, 追寫前事,呈交長生夫婦閱覽者。 同時。頗疑文述止 文述往謁長生, 不敢多所接待耶 又若文述得見長生不止一次者, 賦詠其事, 長生自必隨其夫居都城也。 惟可斷言者 同 在京師, 而不僅此四律而已也。 一度晤見長生, 其題繪聲閣集四律, 當即在三年初次入京之時,而賦此四詩當更在謁 乃一 嘉慶三年文述初次隨阮 複雜之問題,詳見下文第 觀詩中「記取城南坊畔宅 則以碧城仙館主人性好 文述第一次於嘉慶 或者文述當日所為 元入 京時 實非以之為拜謁之 二首詩中 三年 春明 長生 長生夫婦已 招 摇 隨 考 初拜 標榜之 必 辨織 阮 見之 元

詩中所謂

,碧城醒我遊仙夢」者,碧城仙館文述自號也。其詩集即取以為名。「繡偈吟君禮佛詞

長生以己所著詩集示之也。 長生 曾作禮 佛詞六首, 刊入隨園女弟子詩集(卷肆)中,早已流行,文述蓋見之久矣,決非

7471111

隨 令昭即蘋渚(文述詩作渚蘋。)所作在附刻中,則可推定文述實已及見織雲樓詩合刻,或更參以 合刻先後陸續刊行耶?抑書目記録有誤耶?寅恪未見合刻全書,故不得已而依沈書也。 又孫殿起 首詩節。)亦工詩」等六條(隨園詩話補遺所以多謬誤者,蓋由簡齋身殁之後,補遺方始刊行也。 第三首盛誇長生夫家女子能詩者多。文述此所取材,究從葉氏織雲樓詩合刻,抑從袁簡齋隨園 雲樓詩 名媛詩話肆「織雲樓合刻為歸安葉氏姑婦姊妹之作」條考之,(前南京國學圖書館總目 簡齋殁於嘉慶二年。 芸補遺叁「吾鄉多閨秀,而莫盛於葉方伯佩蓀家」至「陳夫人之妹淡宜(此語有誤, 詩 此又可斷言者也。至於「碧浪蘋香一水涯。韋郎門第最清華」者,可參戴璐藤陰雜記叁所 話補遺, 合刻僅有周映清梅笑集一卷, 叢書目録拾遺總目陸有織雲樓詩合刻, 則可取關涉長生夫家閨秀之材料,雜糅而成, 蓋文述此四首詩本為謁見長生之後追記前事而作,前論第一首詩已及之矣。既 參碑傳集壹百玖孫星衍撰袁枚傳。)轉録而來,雖難確定,但今以沈湘佩 誤作「笑梅集」,及李含章繁香詩草一卷, 其中亦止此兩集。 並非長生以其夫家閨秀之詩集出示 但云、乾隆間刊 皆云嘉慶刻 辨見論第一 贵此 所 載)知葉 數

碧浪 及令昭 去取實 載 南 陳 湖 湖白 皆 長 州 又據光緒重修歸安縣志伍興地略伍水門碧浪湖條及同書捌興地略捌古蹟門白 碧浪 與 牛 不依據 蘋洲之地為葉氏 西泠閨詠自序題道光丁亥, 周 此 湖 語 星 一微詩 有關 建萬魁塔條。 種材料也。)及同書壹伍繪聲閣詠家秋穀詩「畫舫蓮莊碧浪遥」之句亦皆指此 碧浪湖波浸晚霞」(文述此 非僅用古典矣。 家園 此條即涉 所在 即道光七年, 文述 及葉紹楏。 所詠固甚切實,而葉令昭之字蘋渚及戴 詩序中述葉氏織雲樓詩 文述於西冷閨 時代頗晚。 詠壹叁湖 據此可知文述叙葉氏閨 合刻, 詠 僅及 周 暎清 此 佩荃之字蘋 蘋 Ŧi. 洲 人, 秀詩 條 葉令 而 則 而

第四首詩

試 文述於西泠閨詠壹 īE 四首第七句「仙郎縱有凌雲筆」, 一考官 知 語 頗 紹 為允切 「楏以翰林院編修於嘉慶三年二月大考二等,五月充日講起居注官。 八月命提督雲南學政。九年差竣回京。在此 ,可推見此四詩當是嘉慶三年至十年間之作。「江上微波秋瑟瑟」之句,即後來 伍繪聲閣詠家秋穀詩 古 [通常讚美紹楏之泛語, 所謂「微波吟煞夕陽橋 時間 紹楏實為文學侍從司文典學之臣 者也 然據上引耆獻 六年五月充雲南 類徵壹 玖 陸 葉 紹 鄉

總之, 往謁見而已。故文述所記長生姊端生事, 此等詩皆足徵文述未嘗與長生有何密切往來, 當必從他處探訪得知 詳悉談 話之事 非出自長生口述, 要不過 以族弟 其記端生事 之資格,

及梁德繩續再生緣事,或過於簡略,或有錯誤,實無足異也。

第二首語

第二首乃四首詩中最有價值,又最難確定者。茲先論其不甚重要及易解釋之句。「紗幔傳經慈 母訓」者,據端生長生之祖陳兆崙所著紫竹山房文集壹伍顯妣沈太宜人行述略云:

又同集附兆崙姪玉繩所編年譜乾隆十五年庚午條下云:

孫玉敦,聘汪氏,原任刑部河南司郎中雲南大理府知府加二級起巖公女。

次子之妻兄秀水汪孟鋗弟仲鋗亦中式。

寅恪案,汪起巖不知何名,道光十五年修雲南通志稿壹壹玖秩官志載:

汪上堉,秀水人,貢生,乾隆十年任雲南府知府。

姊妹, 其 省之首府, 疑是此人。 母有關, 否則再生緣中所述他處地理,錯誤甚多,而雲南不爾者,豈復由於「慈母訓」所致耶? 當亦因作者之外祖曾任雲南省首府知府,其母或侍父宦遊,得將其地概況告之端生 蓋上堉頗有先後任雲南省首府雲南府及大理府知府之可能也。 自不待論。 即再生緣中孟麗君蘇映雪劉燕玉皇甫少華等主要人物,皆曾活動於雲南 端生長生之文學,與

鴛牒香銷冷玉鉤」

句下文述自注云:

仲姊慶生早卒。(前文已引,今重録之,以便省覽。)

寅恪案 紫竹山房文集壹捌先府君[暨]先妣沈太夫人合葬墓誌略

孫玉 萬娶吴氏, 妾林氏。 玉敦娶汪氏, 妾施氏。 曾孫女三,

及同書同卷先祖府君 [暨]祖妣秦太夫人合葬墓誌云:

元孫女三, 端, 慶, 長。

郡詩 料 然則慶生乃端生之妹, 未見此 輯續集肆 事, 唯文述此 叁有陳淡宜都中寄姊七律 長生之姊, 詩及之, 此 亦可注意者也。 似亦與端生長生同 一首, 其小傳云: 玉敦側室施氏有無子女, 為玉敦嫡室汪 氏 所出。 慶生 尚待詳考。 早死 至於杭 他

材

淡宜 錢塘人,長生妹。

伍 旧 遇 P 妹 詩中最 l其詩全同於葉佩蓀次女令嘉字淡宜答淑君姊之什。(參織雲樓詩合刻及潘衍桐兩浙 一赦獲 笑也。 淡宜」 貳閨秀類。)長生為佩蓀長媳, 歸 辨釋 此 有價值記載為述及陳端生壻范某之案。 活, 兩事之時間 第 因有不確之記載。 一首詩中易解者已竟, 相距至近, 隨園 淡宜為佩蓀次女,吳振棫見隨園詩話補遺第叁卷有「陳夫人之 可以取其 詩話之誤或由於刊寫不慎, 茲請次論其難確定者, 一事之年月, 但所述全同於西冷閨詠壹伍繪影閣詠 以推定其他 即陳端生卒於何年 遂致輾轉譌 一事之時代 小姑為 -及范某以 小妹, 輶 軒 何年 續録

此

中

所言

而西冷閨詠轉較此為詳,是西冷閨詠之文亦較此為有價值也。

此兩記載雖不能確

定文

又

陳

蘋

南(佩

举)詩

Z

述作詩 此 桂生請王 中涉及織素圖之一首, 題 生戴 推論 何 年 至 一所寫, 范某已歸之後。 此首詩中文述自注涉及端生范某者, 佩荃閨閣摯友間繪畫題詠之事, 不敢言及, 昶為其祖詩文集作序之事, 作詩之時,端生已死, 鄙意西泠閨詠之記載寫在端生已卒, 即敢言及, 始亦由詩語過於明 何以言之?范某 亦為長生所不喜 范某已歸。此案既無問題, 同一心理,同一 不可以出示外人者。 案, 凝故耶?)今此首詩八句中即有兩句涉及端 初視之,似在端生未卒之前。細思之, 見者, 如下文所引材料, 范某已歸之後, 時代較此首詩為晚, 環境。 而文述自不便牽涉及之也。 詩語 俟於下文詳辨證之也。 戴璐吳興詩話不録 涉及, 知為當日最嚴重 亦無妨礙。 長 生 事 (織 當亦在端 此 件。 輓 點正 生 素 佩 自無 圖 無論 茶 與 可依 M 乃 陳 詩 陳

下引材料 推測 决定也

陳端生之卒年

雖甚難確定,

然有

旁證,

得知端生至少在乾隆五十四年秋間猶生存無恙,

可據

戴 風茶織 素圖 次韻詩

貌出青娥迥

軟塵,

淡妝不逐畫眉新。

分明錦字傳蘇蕙,

聲頻倦 下機 詎將遠夢到金微。 西風聽徹塞砧急 霜葉檐前 絶勝崔徽傳裏人。

長生挽戴 一學得 厭 彈等 頗 耐 西南漸有聲。 女手掺掺勞永夜 七襄取次報章成

七

桂花香滿月圓初,驚說乘風返碧虚。料得廣寒清净地, 修文正待女相如。(此首亦見戴璐

吴興詩話壹貳, 但無第貳首。殆有所隱諱而不録耶?)

尺幅生綃點染新, 十行錦字爲傳神。而今留得清吟在, 說與圖中織素人。

上引戴佩荃陳長生之詩,當載於蘋南遺草。寅恪未見原書,僅間接從梁乙真清代婦女文學史第

貳編第肆章所引得知。

又戴佩荃之父戴璐所著吳興詩話壹貳略云:

文人薄命,

才女亦然。

余女佩荃字蘋南,

成二十三章。最痛者云:「凄絶霜高夜向闌, 西江使署。 忽畫長亭分別,神貌如生,並繫以詩。未幾殁,年僅二十三。余哭以詩, 幼慧學吟,長工書畫。 無言嗚咽淚珠彈。豈期馬角無生日, 適趙日照。隨翁鹿泉先生 望斷廬 一夕

吴超亭同年輓詩(寅恪案,超亭爲吴興宗之字,此詩亦見阮元兩浙輶軒録肆拾閨秀類, 從蘋南遺草録出也。)[略]云:「天女香隨花雨散,蘇姬才薄錦紋迴。尊章泣月驚秋到,

父牽情促夢來。」

峰面面巒。」

愛伊才德一身賅。芳齡正好圖團聚,大藥何期莫挽回。秋月滿輪人遽去,西風捲幕客重 内弟沖之(寅恪案, 戴璐内室沈芬亦能詩,見吴興詩話壹貳。)句云:「柳絮椒花未足推,

征衣漸覺驚寒至, 刀尺憑誰爲剪裁。」

楊拙園知新題云:「仙遊正值月團團,扶病萱堂泣歲寒。隔歲九泉重見母,魂依厀下不愁

單。

:國史列傳貳捌大臣傳次編叁趙佑傳(參光緒修杭州府志壹貳陸人物類名臣肆)略云:

十三年充江西鄉試正考官。五十四年六月充江西鄉試正考官,旋授江西學政。子日熙,正 趙佑浙江仁和人。乾隆十五年舉人,十七年成進士,改庶吉士。二十二年散館授編修。五

三品廢生,前任江蘇長洲縣知縣。(光緒修杭州府志壹壹叁選舉柒有趙日熙條,但無趙

元兩浙輶軒録肆拾閨秀類戴佩荃傳亦有「仁和趙日照室」之語,當是採自蘋南

H

遺草。

照之名。

又阮

李元度先正事略肆貳文苑類竇東皋先生(光鼐)傳附趙鹿泉先生(佑)傳略云: 同時趙鹿泉先生名佑,字啓人,仁和人。後東皋先生(指寶光鼐)十年成進士。同以制舉業

名天下。著有清獻堂集。

錢儀吉碑傳集捌伍朱珪撰湖南布政使葉君佩蓀墓誌銘略云:

道。乙未(四十年)戊戌(四十三年)再署按察使。己亥(四十四年)授山東按察使。 葉佩蓀字丹穎, 浙江歸安人。辛卯(乾隆三十六年)[自河南南陽府知府]卓異引見,

辛丑(四

四十七年四月五月等條。)君入都,請校書萬册自效。 十六年)授湖南布政使。壬寅(四十七年)護湖南巡撫事。東撫敗,以不先舉發,吏議當革 奉旨降補知府。(寅恪案,東撫謂山東巡撫國泰也。 癸卯(四十八年)歲除, 參清實録高宗實録壹壹伍肆乾隆

寅恪案,参合上引材料,可以解决三問題。(一)戴佩荃逝世之年月。(二)戴佩荃之織素圖次韻 詩作成時間。(三)織素圖中之織素人為何人。請依次論之於下: 見君。明年(甲辰四十九年)九月八日卒。子紹楏,乾隆己亥(四十四年)舉人。

抵為乾隆五十六年五十七年之作,其時蘋南已逝世二三歲矣。茲節録其詩於下: 吟詠,工繪畫,從事於八股家所謂雜學之才女。其所著清獻堂集詩中有涉及佩荃及日照者,大 (一)戴佩荃之夫趙日照之父趙佑者,當時最有名之八股文專家。佑之為人,似未必真能知賞善

清獻堂集貳傷介婦戴示日照詩云:

不堪老淚頻傷逝,

以其病未許。)聲塵幻忽渾難識,圭璧操持要有常。 育,戴無出。)弱甚每憐親藥裹,病中還說理詩囊。(原注:婦嘗請於姑,乞爲余鈔詩稿 獨憾添丁消息晚,且看齋奠異時償。

怪見華年又悼亡。(原注:照先娶於沈,戴繼之,皆知婦道。

沈有出不

(詩略)

又示九弟俌並熙煦輩詩云:

又舟中還寄示諸弟示煦照詩略云:

煦

也

逾

壯

尚

初服,

照連喪偶行

更圖

射策決 來繫年 清 尚 寅恪 嫁於死後金清之時, 豐碩 句 書法 、地與 阮 概 初董 也。 元 皆加竄易, 與當時 蘋 科之用, 一字渴筆瘦體之派 顔魯公趙子昂有關 兩 浙輔軒 今史 然而 似 趙 所 非 鹿 小傳中。 乘 載 翰苑臺閣之體, 天 才女之名字遂坐是湮没 泉 遂亦 録肆 地 相, 山書 為之隱諱。 志 而以後人翻案之文字為無歷史常識。乾隆官本樓鑰 而不永其年」。 又何足怪哉。 夫以妻傳, 頗 於鹿泉諸子, 拾閨秀類 佩荃之姓 上行 加贊賞歟?否則蘋 涉, 有所! 又生值乾隆時代, 戴 以此心理推之, 下效, 而 如「駔儈下材 佩 至顧太清之主易安年老無改嫁之事者, 唯日 不著其 冥會,若出之男子之手, 荃傳所引戴璐哭女詩序及其他間 寅恪未得見佩荃之書, 相習成風, 不彰矣。 熙 名, 南 一人略具事蹟, 必 則易安居士固可再醮於生前趙 一之於易安居 蓋遵内諱 不敢輕率 據戴 清高宗書法摹擬右軍, 而失之肥俗 蘋南之書法當受此環境薰習者也。 璐哭佩 請 不踰閩之古 而 求抄寫此老學究之家翁所 一士者, 圣詩 不知其體勢 尚可作殿廷考試之白摺小楷 H 照 序, 之名僅附見 可謂幸矣。 , (寅恪未 [義, 接材料得 攻媿集中 如何, 其為人為文之拘謹 則又因奕繪 見秋 知。) 宋之日, 於吳興 (寅 然蘋 凡涉 恪 樹 南 謂 鹿泉 及婦 頗 詩 賦 Ш 為湖州 佩 而 嫡室之子 信 話 試 房 荃「書體 帖體 變明 建 及 殆以 集 炎以 以 兩 僅 日

致其痛斥也。)日照元配沈氏,或者蘋南母沈芬之姪女,俟後更考。戴茀堂記録輓其女蘋南之 於太清有所非議,固不得不藉此以自表白, 頗多, 而不及鹿泉之作者, 或以未曾得見,遂至漏書,或雖得見,而以親家翁之句為未工, 而好多事、不識時務之陳文述,反賦詩招搖 宜遭

此 據趙佑傳 大 即吳興詩話壹貳所謂 不載録 於其 乾隆 八詩話耶

滿 八遽去 月圓 初。 西風捲幕客重來。 驚説 乘風返碧虛。 五十四年佑以江西鄉試正考官授江西學政。 「隨翁鹿泉先生西江使署, 」楊拙園輓詩云:「仙遊正值月團團。 。」吳超亭輓詩云:「尊章泣月驚秋到。 未幾殁」者。 佩荃隨佑赴江 陳長生輓詩第 」是佩荃殁於乾隆五十 」沈沖之輓詩云:「秋月滿輪 西任所, 一首云: 不久逝世。 四年秋 桂花香

(一)隨園詩話 補遺叁略 云

吾鄉 多閨 冰納 其長媳長生, 絮語煩君仔細看。莫道閨中兒女小, 兩上春官, 而莫盛於 吾鄉陳句山先生之女孫也。 葉方伯佩蓀家。 以迴避不得入試。)縱教裘敝黄金盡, 其前後兩夫人, 寄外云:「弱歲成名志已違, 燈前也解憶長安。 兩女公子, 一兒婦, 敢道君來不下機。 看花 皆詩壇飛將 」類年心 1 又阻 春

陳長生寄外詩為何時何地所作,此點關涉考定長生與戴佩荃何時同在北京,而戴佩荃

郎 君 寄 能 絍 Ŧī. 句 能 懷 ? 籍 懷 兀 作 風 時 傳 侍 如清 隨 庫 會 否 隋 而 刀口 X 織 安葬 耶 太 長 館 試 年 量 其 素 袁 知簡 夫 4 右 ? + 必 + 議 間 實 之 在 姑 絶 絍 X 紹 究 次 itt. 叙 星 共 録 後 乾 椊 記 齋 游 Ŧi. 在 有 韻 旬 句 肼 東 降 卒 授 於 第 隨 華 時 口 月 何 詩 亦 再 於嘉 内 以 次 Ž 此 袁 年 Ŧi. 必 録 首 等 返 然以 會 則 作 在 閣 應 問 + 試 更 慶 今依 試 北 年 京 中 書 題 疑 Z t 俟 以 律 書。 常 在 京 後。 詳 年 不 蓋 情 次 此 知 據 其 先 首 逆 自乾 考。 六次 必 此 雖 推 因途中 1 调 生高 綜 年 作 時 應 數 51 測 金 合 i 試 會 降 葉 此 其 寄 而 陵 隱卧 四 十二。 父佩 詩 考 試 阳 推計之, 外 恐 加 佩 見 + 定之。 風金陵 必 詩 而 Ŧi. + 蓀 簡 煙 九 作 不 + 凡 刀口 傳 蓀已前 世 齋之 蘿 年 然 在 得 年 Ħ. 有 會 當是乾 則 乾 中 年 紹 舉 即 知 後 袁 試 楏 李 乾 隆 卒 葉 春 紹 元 人 徑 隨 紹 之資 隆 陳 Fi. 世 於 楏 紹 置 大 船 楏 袁 姑 隆 + 其 Fi. Fi. 鄉 楏 約 柜 編 口 婦 十三 於乾 四 + 格 薦 13 據 紹 為 七十 之年, N 續 + 年 年 尚 楏 者, 紹 隨 應 人 九 隆 簡 紹 同 健 楏 仍 年 過。 夫葉 試 人 年 齋 楏 在 傳 在 皆 刀口 T 集 大 九 年 母 13: 母 至 + P 紹 壹 大 得 據 月 七 李 以 知 憂 應 乾 憂 几 楏 佩 叁 常 游 葉 碑 含 紹 争 試 隆 年 + 供 蓀 章 閨 情 隨 佩 傳 楏 不 中 歲 Ŧi. 此 職 秀 袁 集 論 自 + 定 蓀 浙 在 知 紹 年 京 乾 賦 長 壹 其 楏 舉 卒 # 類 不 11 春 師 詩 後 載 隆 能 年 人 牛 U 紹 百 母 2 作 柒 楏 卒 以 即 Fi. 應 間 前 期 陳 紹 至 寄 孫 全 + 會 於 迴 紹 X 家 亦 於 長 據 間 楏 懷 星 同 年 試 何 避 楏 E 長 等 牛 清 也 卷 隋 衍 由 月 成 在 生 金 扶 袁 撰 又 在 舉 Fi. 進 代 AA 然 北 作 載 陵 京 雖 史 极 次

以後 夫婦, 京請 長生之夫紹楏又同 文復為長 前 恐 閨 不在 七年 應 中兒女小, 不遠 亦 京 不 試 於 至五 後 可以 也 能 而 四 生祖 作此 未中 庫 佩蓀 十四四 推 長生當隨侍其翁姑於外省任所。 長生之父玉 館校書自效。 燈前也解憶 九 見。否則佩荃無由作 句 圖 太早, 年秋 耳。 Ш 紹楏父子已同 為湖州人。 所 所稱賞。 間戴 四十五 一敦與 大約 佩蓀 佩荃逝世 長安」等語, 此 年 戴佩荃之翁佑 (見紫竹山房集陳句山先生年譜乾隆十五年庚午條。)佩荃之父璐 當此時 在京師 四十 圖繪 雖卒於四十九年九月, 畫之時 以前。 織素圖次韻詩 六年 兩家在京,往還必頗親密, ,長生斷無他往之理。 即指此兩次, 兩次 間 以佩 日 故長生寄外詩中所謂 會 為杭州 距佩荃逝世 荃卒年僅二十三歲之一 試 世 紹 紹楏雖在京, 人 権皆 而會試之期在 前 同舉乾 可應試 然則織素 不甚 觀戴璐吳興詩話壹貳述及長 隆十五年 久, 「看花人又阻 而以迴避 春 此 季, 即距乾隆 圖之繪成, 必在四十 點推測 兩 年 故紹 庚 其 不能 4 父佩 鄉試 春 楏 Ŧi. 雖天才如佩 應試 十四四 闡 口 蓀適 以 佑之八 言。 年秋季以 應 及「莫道 任外官 試 自 與 股 旧 刀口

必為女性

而其夫又以罪謫邊,自不待言矣。

與此

圖中女性相關涉

得直

指為即是圖

中

織 織

錦字傳

蘇蕙

詎

將遠

蘿

到金微」、「十三學得厭彈

筝

可以為證

然則

此

圖

中之

(三)織素圖者

即取孔雀東南飛樂府詩「十三能織素」之句,

從流

沙,

蘇氏思之,

織錦

為迴文旋圖詩

之意,

繪畫 一等語

而

成。

觀戴

佩

荃織

素圖

次韻

詩

分明

及晉書

滔

妻

氏

傳

知矣。 通 治中 中所用古典皆能適合, 行錦字為傳神。而今留得清吟在,説與圖中織素人。」詩中「十行錦字」即錦上之迴文。「清 □□詩序中「屏謝膏沐」之今典更相符會也。所可注意者,即佩荃詩中「西南 在人間之織素人, 必無遠 頗為詳 止有三可能之人。第一可能者為陳長生。然長生之夫為葉紹楏。紹楏一 解 照亦有 淪謫得歸遲」之句, 佩荃織 還寄示諸弟 吳超亭輓佩荃詩 可考見者 三可 溫飛卿池塘七夕詩云:「月出西南露氣秋。」(見才調集貳。)及七夕詩云:「青鎖 盡。 謫之事, 大約佩荃卒時, 陳端生壻范某戍邊之嫌疑者, 素圖次韻七絶三首。 能者, 紹楏既 有日熙日煦日照三人。佩荃之夫日照,其事蹟雖不詳,然據上引趙佑清 示煦照詩, 即告以佩荃逝世之消息。一死一生, 以普通消除遞减之方法推之, 無戍邊之事,則長 云蘇 自不必贅論,而佩荃「淡妝不逐畫眉新」之句與西泠閨詠壹伍繪影閣 寓意尤為沈痛也。 姬才薄錦文迴」,及沈沖之輓佩荃詩 知乾隆五十八年鹿 今佩荃雖還歸天上, 日照不在側耳。至陳長生輓佩荃詩云:「尺幅生綃點染新 然沈沖之輓詩又云「西風捲幕客重來」, (生非圖中之織素人可知。第二可能者, 為戴 由是言之, 泉作此詩時, 則捨陳端生莫屬。 而「清吟」猶留在「人間」,故長生可説 織素圖中 取與對 日照並未遠去, 比, 之織素人, 云芳齡 若是端 暗用李 IE 好 生事 必非 義 生 漸 圖 則其 Ш 有聲」之語。 專 則日 ,蹟, 今可考知 則 戴 重過聖女祠 聚 佩荃 佩荃 人實 一等語 照 佩 獻堂 長 既 無 又可 重

或 辰 乎?陳端生於再生緣第壹柒卷首節 南 月似 朝文職官姓氏叁 春二月 與下「永夜」句固相適應,而「七襄」句更暗寓七夕離別之意,(飛卿七夕詩云:「人間 鉤 」)尤為巧妙也。 」(見曾益謙顧予咸顧嗣立等溫飛卿詩集注肆。)蘋南詩中「西南」二字出處當 芸窗仍寫再生緣。」考道光十五年修雲南通志壹貳拾秩官志貳之壹貳官制 二臨安府同知欄載 然寅恪於此尚不滿足,姑作一大膽而荒謬之假設,讀者姑妄聽之可 云:「惟是此書知者久,浙江一省徧相傳。」又云:「歲次甲 題名壹貳 是 從溫 離 别

(寅恪案, 至」當爲 玉」之形誤也。)敦。錢塘人。舉人。[乾隆]四十九年任。

緣前十六卷「浙江一省徧相傳」,則佩荃必早已見及。佩荃與長生交親往還,當又在長生處獲見 即 乾隆五十二三年, 則端生之父玉敦, 在乾隆四十九年至五十二年四年間, \懷疑佩荃詩所謂「七襄取次報章成」者,即指端生在雲南所續之第壹柒卷再生緣 指是言 家大人旋里」云:「去郡定多遮道吏, 襲雲鶴。營山人。貢生。 相傳」者, 而佩荃題詩之時間 意謂十六卷本之再生緣, 長生寓京師時也。 [乾隆]五十三年任。 亦當在玉敦任職雲南之時, 頗 疑端生亦曾隨父往 還山已是杖鄉人。」即玉敦解任歸 浙江省已編傳, 曾任職雲南。 雲南, 而雲南則尚未之知 復可 推 佩荃詩 知矣。 隨園詩話補遺叁載陳長 所謂「西南漸有聲」者 杭州時 然則端 也。 而 所作 生所 寅恪 更進 大約在 蓋 浙

知也。 見舊 句, 當地真實氣候相符合。 抑寓雲南,雖不能確言,鄙意此年端生似已隨父玉敦赴雲南,其所謂「白芍送臘」「紅梅 端生續寫第壹柒卷, 入夜不息。此佩荃讀第壹柒卷末節,已可知之, ·勞永夜」之語敷?至於端生續寫再生緣第壹柒卷在甲辰年,即乾隆四十九年。 ,若「白芍」取譬「白雪」,與「紅梅」為切當之對句,則亦不過詞人形容節物慣用之語, 茲姑著此妄説 臘盡春 向 陽為趁三年日, 迴之際, 故詩中遂及之耶?其所謂「女手摻摻勞永夜」者, (可參下文論再生緣開始寫作年月節中「歲暮」之語。)但寅恪曾 更待他日詳考。 百花齊放, 頗呈奇觀。 入夜頻挑 一盞燈」。 或者, 端生之語實與雲南之節物相符應, (見再生緣第壹柒卷第陸捌回末節。 或又從長生處得悉其姊往日撰著之勤 疑指端生自述其撰前十六 此年端生居浙)寫 遊雲南 迎春」等 未必與 因並

肯出 假 不肯以其父兆崙之詩文集出示他人之事,及兆崙之孫玉萬之子桂生請序家集於王昶(即玉敦不 定陳端生於戴佩荃作織素圖次韻詩時尚生存者,則至何年始不在人間耶?此答案可以 示之人)之年, 兩點推求之,雖不能中,亦不甚相遠也。 陳 玉 敦

Ŧ TV. 草堂詩集序 昶春融堂集叁捌有陳句山先生紫竹山房詩文集序一篇, 自 與吉人定交, 迄今四十餘年, 篇 略云:「余以乾隆庚午(十五年)識君於吳企晉璜川書屋, 同遊諸君少長不一,皆莫有在者。」則自乾隆十五年下推 其文雖不著年月, 但下有朱吉人春橋 文酒之會最密。

當是 111 首之王序,並附注春融堂本此序之文於下,而略其不關重要者,讀者若察兩本序文之同異 四十餘年,當為乾隆末年,或嘉慶初年,即作春橋草堂詩集序之年。紫竹山房集序排列 [房集首所載蘭泉之序文,互相比較,發現頗有不同及刪削之處。茲節録陳氏所刊紫竹山房集 同時或相距至近之時間所作也。今取春融堂集所載紫竹山房集之序文, 與陳桂生所刊紫竹 相連, 即

紫竹山房詩文集載王昶序略云:

知其中必有待發之覆也。

年也。)求其集不可得,爲之悵然。又七年余修西湖志於杭州,竊念先生籍錢塘, 矣。(寅恪案, 丙申爲乾隆四十一年, 句山殁於乾隆三十六年辛卯正月二十四日, 實止六 生謂可與言者,時時引進之,是以辱有牙曠之知。丙申春余歸自蜀中,而先生前七年殁 七年也。)又三年(寅恪案,王蘭泉以乾隆五十一年授雲南布政使,見下引阮元撰王公昶神 錢塘陳君桂生挾其祖句山先生詩十二卷文二十卷, 同知玉敦深悶不肯出。 海詩傳陸陳兆崙詩選附蒲褐山房詩話云:「壬寅修西湖志於杭州, 蹟載於詩文必富,從其家求之,閱不肯出。(「閱不肯出」春融堂作「卒不可得」。又王昶湖 」)踵門而請曰,願有序也。戊寅(乾隆二十三年)始獲識先生於朝, 及其孫桂生來京師, 始以全集見示, (春融堂本作「詩四十四卷, 並乞序言。 因索先生遺詩 繼以詩文相質, 」壬寅即乾隆四十 文三十二 而 西湖事 令子 先

道碑。 |又三年||至「其閎益甚|二十七字。)蓋十餘年來殊以爲憾。)余以布政使滇, 適先生子玉敦爲滇郡佐。叩所藏, 則其閱益甚。 今陳君述祖德, 採遺文, (春融堂集本 删去 而

使先生生平撰述粲然備見於世。

佈流 詩文, 自是應有之事。以常情論, 玉敦必非於蘭泉個人有所嫌惡, 寅恪案, 端生壻范某之名有關也。范某之案在當時必甚嚴重,以致家屬親友皆隱諱不敢言及, 蘭泉當日所見之稿本,其詩文卷數多於刊本,則桂生所删削者,必甚 赦,則句 釋然於懷也。 其中必具不得已之苦衷及難言之隱。 機為地主,錢塘蘇小是鄉親」之「地主」也。)及官雲南布政,玉敦又為其屬吏。 唇有牙曠之知」一語殆非誇言。蘭泉修西湖志於杭州,玉敦為其地主。 此中必有 「壻遇赦歸,未至家,而□□死」。是端生之卒與范某遇赦之時相距不遠。范某既 湖海詩 '山集中詩文僅牽涉端生之名者,自已不甚重要。今觀春融堂集所載紫竹山房序文,知 又請序於蘭 玉敦既不肯以其父之詩文示蘭泉, 重大變遷。鄙意此十餘年間 傳及湖海文傳之編選人王蘭泉, 其人為乾隆朝詞宗, 泉者, 即藉以解釋前此玉敦深閟固拒之舊嫌也。陳文述西泠閨詠詠端 蘭泉當時或不盡能瞭解其故, 句山集中所當避忌隱諱之事, 十餘年後, 桂生何忽轉以其祖全集請 遂於序中猶言及之,蓋尚未 而深閟固拒, 一至於是者. 不少。 本與陳句山雅故, (此韓君平所謂 | 吳郡陸 已不復存 其所删削者 蘭泉之索觀句山 在 若恐為所 故 序於蘭 當與 序中 生詩 可 遇 刊

牽累,端生事蹟今日不易考知者,其故即由於此也。

范某遇赦之期,更可推測端生逝世之年也。蘭泉紫竹山房集序言「十餘年來殊以為憾」。蒲褐山 之後,其時上距端生逝世之年,當不甚久,此可依次遞推而得之者也。 湖志於杭州之時算起,歷十餘年,蘭泉與桂生兩人同在京師,即此序作成之時,亦即范某赦免 房詩話又謂「桂生來京師,始以[其祖]全集見示,並乞序言」。則從蘭泉乾隆四十七年壬寅修西 陳端生之卒與范某之赦, 兩事時間距離甚近, 故可依蘭泉作序之年, 推測范某遇赦之期, 又據

王昶春融堂集附嚴榮編述庵先生年譜乾隆五十四年條下略云:

二月二十四日得旨授刑部右侍郎。[三月]初五日起程,二十八日抵京。

五十八年條下略云:

四月初 一日[出京回籍修墓]。十二月初二日[回京],赴宫門,召見, [乞休],上允之,遂

以原品休致。

五十九年條下略云

四月初一日赴通州下船。[回籍]。七月二十三日抵家。

六十年條下略云:

十一月十八日[赴京預千叟宴]。十二月二十一日抵京。

嘉慶元年條下略云:

二月初一日[出京]。三月初五日歸家。

四年條下略云:

正月太上皇帝升遐。入都。二月二十九日至京。四月二十日[出京]。 七月抵家。

一年條下略云:

碑傳集叁柒阮元撰王公昶神道碑略云: [先生病逝],時[六月]初七日丑時也。

使。五十四年擢刑部右侍郎。五十八年乞歸修墓,冬還京,以病乞休。嘉慶元年以授受大 軍進討,温公屬公作檄,斥僧克桑罪,遂克斑爛山,進攻日耳寨。阿公奉韶由北路進兵, 典至京,與千叟宴。四年純皇帝升遐,復至京,謁梓宫,夏歸清浦。十一年年八十有三, 十五年秋丁母憂,服除,補直隸按察使。五十一年授雲南布政使。五十三年調江西布政 路兵合,索諾木等率衆投罪。於是兩金川地悉平。凱旋之日賜宴紫光閣,陞鴻臚寺卿。四 潰木果木,阿公亦退兵至翁古爾壟,冬大兵復進,小金川平。復從討大金川。 兼督南路。公復從阿公軍克小金川。僧克桑遁。澤旺降。進討大金川。三十八年夏温公兵 [乾隆]三十六年温公福代阿公[桂],移師四川,辦金川事,奉旨授吏部主事,從温公西路 四十一年三

[六月]初七日卒。

| 獻類徵壹玖柒陳桂生傳略云:

四年題署大冶縣知縣。六年六月實授, 陳桂生浙江錢塘人。由優貢生考取教習,期滿引見,以知縣用。 十三年五月補荆州知府, 十二月陞荆宜施 九月陞安陸府同知。八年陞安陸府知府,九年丁母 道 嘉慶元年三月揀發湖北。

以 降 年可不計。)第三次為嘉慶四年。 據 上所引 不計。 五十四年至五十九年。(此期間自五十八年四月出京回籍修墓)第二次為嘉慶元年。(蘭泉於乾隆六十年十二月二十一日抵京, 距除夕止數日, 自陳玉敦於乾隆五十三年由雲南返杭州後, 王蘭泉共有三時期在 至十二月回京 北京。 第 此 短 時 次為乾 故此 期 P

第 三次桂生正在湖北任職知縣,甚少機會至北京請蘭泉作序也

第 期滿引 甚詳備。 次若從蘭泉乾隆四十七年在杭州修西湖志算起 十二、十三年。 以知縣 今取同 書中 用。 同 嘉慶 蘭泉序 治 間制 元年三月揀發湖北」。 定優貢事宜,並參以乾隆間制定拔貢事宜及官學規章等, 中「十餘年」之語, 光緒修清會典 自是 至乾隆五 可 通。 事 又桂 十七年 例所 生 或五 載乾隆間 既 由 十八年 優 貢 制 或 生 定 考取 Ŧī. 優 + 教習 九年,

以考定桂生到京之年月。

HILL

清會典事例叁捌伍禮部學校優貢優監事宜略云:

别等第進呈。 [乾隆]二十三年議准。 其文理明通者 嗣後保題之優生到部時, 照例劉監肄業。 俟有四五名, 本部奏請欽派大臣考試,

名次仍歸併定擬,由禮部帶領引見。考列一二等者,以知縣教職二項録用。 實選舉,會同督撫保題,赴部驗到,定期奏考。 同治二年覆准。優貢一途,因無録用之條,多未來京報考。嗣後量爲變通,由各該學政覈 由閱卷大臣酌量多寡,比較録取。其先後

同書叁捌肆禮部學校拔貢事宜乾隆元年條略云:

果有卓越之才,自仰邀簡用。 此中考取。三年期滿, 各學政選拔貢生,務秉公考覈。考列一等二等者,九卿會同揀選, 以知縣銓用。 其三等者, 停其簡選, 照例劄監肄業。凡宗學義學教習即於 由部引見, 其中

| 書叁玖肆禮部學校八旗官學乾隆八年條略云:

H

俟期滿時, 一册交新教習收存, 官學漢教習,每人給印册二本,該教習將三年內所教學生若干名,並學業功課詳細 二等或用知縣, 或用教職。恭候欽定, 仍歸原班銓選。 列一等。其訓課勤謹,稍獲成功者,列二等。 照例填注。一册送監臣查覈。如實心訓課,著有成 出具考語繕單引見。一等者可否用爲

蘭 寅恪 泉作 序之可 桂生 能 至 遲在乾隆 然桂 生此 五十 時既未决定往湖 七年末, 必已到北 北 似不 京。 自有 必請 繭 於五 泉作序, + 七年 藉以 或 Ŧi. 求 + 其 八年 介 紹 或 於湖 Fi. 北 九 年請 吏

如畢沅

政治 抑更有 凡所粉飾 可論者, 吾人今日觀此等禮部規定之具文, 苟證以當時八旗官學之實況, 即瞭然於官僚 多設科條 自矜整飭 ,不過供干禄求榮者之利用耳。 良可 嘆也

其 揀發 語符合 第二次為嘉 發湖北 揀發之省份 沁湖 壹 樂 句 北 辰 貳 Ш ,為之介紹推見,桂生出 陸 若無高級長官之知賞, 浙 固 發 實際上, 慶 生 世 人物名臣 不待言。 雖 關 既 元 係者 久 出 年 自 其祖平 在此 上命, 肆 其 此 為湖 胡 最 年 數月以前, 可 琨 距乾隆四 實則 庸 白 注 撰 交誼 陳 意者 總督及湖北 桂 身不過一優貢生耳。 恐將久滯宦途。依昔日社會情形, 亦 一十七年 篤摯者多 生傳 口 曲 早已預為往湖北 即 E 桂 云:「學二王 巡撫等人而 身 生於嘉 蘭泉在杭修西湖志時已及十五 已零落。 志 願 慶元 預 書, 就當 之計矣。 為選定。 雖出自名家, 年三月以 晚益 茲檢嘉慶 H 湖 I, 北 但桂生以一 故桂生表 知 縣揀 政聲多為書名所掩 省之長官中 往往請託 元年前後任湖北 亦工書法,(光緒 發 年, 面 湖 候補 E, 北 與蘭 當 以嘉 時顯要之與 知縣之資格 事。 其能與桂 泉一十餘年 慶元 洲 通 撫及湖廣 間修杭 云。 常之例 年三月 生之 疆 之 外 吏

總督之汪新畢

·沅傳碑等

節録之於下:

耆獻類徵初編壹捌肆疆臣類叁陸載清國史館汪新傳略云:·

年六月諭日, 汪新在湖北督理軍需, 湖北布政使。六十年五月擢安徽巡撫,時楚省賊匪滋事,經惠齡以留辦軍需奏請。 科給事中。三十四年轉户科掌印給事中。三十五年充江南鄉試副考官。五十六年十一月調 汪新浙江仁和人。乾隆二十二年進士,改翰林院庶吉士。二十五年授編修。三十三年陞禮 已爲熟諳 著即調補湖北巡撫。三年四月卒於軍營。

同 書同卷張雲璈撰汪公墓誌銘云:

公姓汪氏, 諱新, 字又新, 號芍陂。

紫竹山房文集玖女史方芷齋詩集序略云:

老友方君滌齋(寅恪案,滌齋名宜照,錢塘人。)予未弱冠時同研席。 好學工詩。滌齋偕嫂夫人率女隨其夫汪編修又新任抵京。芷齋見過,致拜牀下。 有女曰芳佩,

王昶春融堂集伍貳畢公沅神道碑(参碑傳集柒叁)略云:

九年十二月丁張太夫人憂回籍。明年十月陝西巡撫員缺,奉旨著前往署理。五十年正月進 乾隆十八年順天鄉試中式。又二年補内閣中書,直軍機處。二十五年成進士,以一甲第 公名沅,字鑲蘅,一字秋帆。曾祖諱祖泰,由休甯遷太倉,嗣太倉分縣鎮洋, 授翰林院修撰。三十六年奉旨授陝西按察使。三十八年十二月授陝西巡撫。三十 遂爲縣人。

京陛見, 夫昶與公鄉試同年, 正月仍授湖廣總督, 公赴枝江, 調河南巡撫, 調兵搜勦。 同直軍機處, 即赴新任 奉旨授湖廣總督, 明年公遵旨留駐辰州,七月初三日卒於官舍,年六十有八。 二月奉旨令駐荆常適中之地。 又爲西安按察使, 兼署湖北巡撫。 知公行事爲詳,庸敢掇其關於軍國之 五十九年降補山 嘉慶元年湖北賊起 東 巡撫。 六十年

勒諸貞石

以示後世。

依恃, 軍需, 在 慶 遊湖北 間嘗借寓汪氏在京住宅, 寅恪案 不及其與芷齋芍陂之密切, 京求 元年春初,預備以知縣揀發湖北之時, 當日任湖廣總督者為畢沅。 (見紫竹山房詩集壹貳送畢秋帆殿撰沅赴鞏秦階三路觀察任詩。 未曾離省,然直至嘉慶元年六月, 而不甚確定者也。 與秋帆關係密切之人為之介紹者,實捨蘭泉莫屬。觀蘭泉所撰秋帆碑文中, 汪新 桂生家本與汪 必不至略不照拂。然汪新已於乾隆六十年五月受命巡撫安徽, 新家交好。 故此時桂生若往湖北, 桂生當亦隨其父祖居此。(詳見下文論端生撰再生緣節中。 而桂生與秋帆又年位懸隔, 秋帆乃乾隆朝宏獎風流之封疆 其祖兆崙與新之夫人家交誼尤篤。 方始正式改授湖北巡撫。當桂生在乾隆六十年末 汪新之去留尚不能預料。此事在桂生心中, 汪氏 拾巡撫外, 當無深厚之交誼。 則最有關係者, 大吏,)然句 兆崙於乾隆三十五 亦嘗與陳句 職此 山與 雖經 莫過於湖廣總督 之故 秋 帆 惠齡奏 Ш 之關)故桂 有一日之 蘭泉自述 桂生當日 年 請 雖可 或嘉

生卒 詩, 其 蘭泉作序之必要。 泉序其祖之詩文集, 可見 歷年 從可知矣 由 秋帆之關 然則 湖北守宰, - 頗久, 例。 蘭泉於嘉慶元年二月即 係, 平時交好, 秋帆 致位 明顯如 故鄙意嘉慶元年為蘭泉作序最 身後, 表面 通顯 此。 視之, ,其子孫以隧道之文屬之蘭泉者 最為親密。(文酒之會如湖海詩 則此 蓋兩 雖頗平常。 出 人同隸江蘇, 序甚有 都 其在京 關 係。 然察其内容, 時 同年鄉舉, 間 通習古今世變之君子, 可能之年, 雖似短促, 傳 恐不 同任軍機處章京, 而是年之前, 非無因也。 貳 貳 此時桂生既定計 甚 畢 簡 軍。 沅詩 選載 不得不於 後來汪 由是言之, 端生已卒, 集聽 又同 往 畢 湖 此 雖 桂生之請 雨篷 任陝 北 深 浙 范某已 為嘆 西外 實 而

桂生請 文所引清高 清室 録 繭 参肆 共有 則似 泉作序之年, 宗實録 陸 距 高宗八旬 略 上嘉慶 范某 元年 當以 萬壽及內禪授受 較前, 乃以乾隆四 嘉慶 而與乾隆五十五 元年為最 十五年順天鄉試 兩大慶典, 可能 已如上 年 甚近。 范某皆可援此等慶典 科場案獲罪 所 論。 何以言之, 但范某赦歸之年, 遣戍, 范某非遇 邀赦得歸。 自此 年以 赦 即端 不 據清 後 能 生逝世 至 歸 嘉 實 依下 録 高 元 相

乾隆五 + 其在配軍流人犯, 五年正月壬午朔以八旬萬壽, 已過十年, 安分守法, 頒韶 天下。 別無過犯者,著各省督撫, 韶曰, 各省現犯軍流以下人犯, 分别咨部 俱著 查

向 例覈議 奏請省釋。

慶典 Fi 范某因公文往復 之例揣測 則范某若以犯罪之年算起, 亦可云已過十年。 十六年上半年 人赦歸 ,當可從寬援引此恩韶赦歸 則端生之死當在乾隆 也。 程途遙遠及經費籌措等問題 據陳文述 云:「壻遇赦歸, Ŧi. 十五年或五 也。 但據 韶文, 十六年也。 若以到遺所之地算起, 未至家, 其歸家, 仍須咨部覈議及奏請省釋等手續觀之, 早則在乾隆五十五年下半年, 一死。」儻使范某果援此 則似尚 有問題。 八旬萬 然依通 遲則 在 則

以言之?據清實録仁宗實録壹所載嘉慶元年正月戊申朔太上皇傳位慶典恩赦詔書略 若范某不能援引乾隆五十五年八旬萬壽慶典赦歸 則 必可援引嘉慶元年 內禪授 受慶 典 放歸

何

於乾隆 受慶典恩赦 此次赦罪之規定, 各省軍流人犯 Ŧī. 十五年下半年或五 獲 歸。 此 較乾隆 查明到 所以决定端生之年壽 十六年上半年 五十五年高宗八旬萬壽慶典赦罪之規定, 配三年, 實在安静守法, 援八旬萬壽慶典恩赦獲歸 不能超過嘉慶元年之理由也。 及年逾七十者, 釋放回籍。 大為寬簡。范某即使不能 則必可於嘉慶 據其 祖句 山紫竹 元 年邀授 Щ

則

乾隆]庚午(十五年)秋玉萬與次兒玉敦忝與鄉薦。 明年(乾隆十六年辛未)正月長孫女端兒 文集壹

伍

冢

婦

行略略

云

又如上 年, 隆五 歲 少為四十 可能之年 端 或 端生 而以 四 能 生 十四年秋間 述 + 超 生於乾隆十六年, 強不 歲, 在 過 歲。 即嘉 端生之逝世,必在嘉慶元年以前 此 至 前 至多不能超 鄙意此 四五年為最合事理也。 慶 四 佩荃逝世時,端生猶在 歲。 壽 元 年, 然猶及中 期限之可能性最 若范某援乾隆 下推至蘭泉作序第一可能之年, 過 則端生之壽, 四 十五 年, 歲。 未可謂 Ŧi. 大也。 人間 又據上引陳長生輓戴佩荃詩「説與圖中織 十五年清 不能 總以 甚不幸 四 超過四十六歲。 若自乾隆十六年即端 即四十六歲以前。 其年為三十九歲。則端生年壽不能少於四十歲。 + 高宗八 歲或四十一歲為最可能也。 也 旬 即乾隆五 萬壽 鄙意端生之逝世 慶 則端生之年壽, 無論如何, 典 生生年 十七、 放歸 下 則端 推 自昔才人多為短 九年, 至 生之壽當 素 似 繭 人」句 不應遲 泉 作 則端生之 序 為四 知乾 至此

及刊 泉作 桂生請 確 二十三年。 萬已卒 知 行也。 序 但據 時 繭 泉作其 紫竹山 玉 又前已論及桂生當日 玉)止言兆崙孫春生桂生等,而不及玉 敦猶存。 敦尚健在者, 祖詩文 房詩文集首所載之顧 又據同集首所載之郭麐撰兆崙神道碑文,(此文作成之時距兆崙之葬為 人集序時 范某之案既得解除, 請蘭泉作其祖集序時, 端生已死 光撰陳兆崙墓誌銘 范某已歸, 敦,則此時玉敦必先卒無疑矣。假使桂生請 玉敦亦不必如前此之不肯以其父之詩文集示人 自不 其持示蘭泉之稿本, 待論。 知乾隆四十六年 至玉敦是否健存, 卷數較刊本為多。 十一月 兆崙 今雖 不能

桂 長生及其 生 佈 所以 縱 他親友尚 使 删 玉 削之故, 敦尚 有不滿意者在耶?春融 在 雖 不敢 亦可不反對。 確 言, 但 |必因 或者桂生請作序時 端 堂集本所載序文亦不同於蘭泉當日交付桂生之原 生壻范某之關 玉敦已卒, 係 無疑。 桂生 而 桂 既 生 大 更 加 加 删 删 削 削 者 則 此 豈 稿 由

殆以中多

語病

致招陳氏親友之非議

遂亦不得不重改定耶?

往往 惓戀 長生寄外詩 加 不忘 海 無 懷端 依 Z: 六親 生者如此 縱教裘敝黄金盡, 不認 可謂非 而繪影閣主人於茫茫 以勢利 敢道君來不下機。」自命不作蘇秦之婦。 居心, 天壤 言行相符者矣。 間 得此 妹, 嗚 呼 亦可稍 常人在憂患 慰敷 觀其 於織 顛沛之中 素 圖 感傷

乾隆四 也。 文述於 時 以 節 以累謫戍」。 於頤道堂外集陸 Z 乾隆 陳 錦瑟喜同新好合, 所以決定此 西冷閨詠壹伍繪影閣詠家□□ 玉 敦 七年之理由也。 紀元凡六十年, 不 則欲考范某一案, 肯以其父之詩文集示 (碧城仙館詩鈔玖)題繪聲閣集四律第二首詩中 後前 兩 ,舉行鄉試次數頗多,其與此案有關者,必在四十七年以前 明珠早向掌中懸」及「未酬夫子情難已, 所以 時限者,實有特殊人事之關 知此案必在乾隆三十 必於乾隆朝鄉試科場案中求之, 繭 泉, 一詩序中言端生壻范某 即 知范某之案必已發 九年 係。 以後者 觀乾隆 乃諸 生 生, 文述自注亦言「端生適 強撫雙兒志自堅」。 因范某為諸生, 一於此 即 四十七年王 以科場事 天 年 端生於 以 前 為人 昶 再 此 在 4 不能 杭州 緣 牽 後 則是端生結 第 ,三十九年 累 時 滴 壹 修 關 范 涉 柒 限 西 戍。 會 湖 定 於 試 壻 X

其

家庭, 得在除其母汪氏服, 生應服祖父服朞年, 女,依當時禮律,應服母喪三年,實即二十七個月。故端生於乾隆三十七年十月除母服。又端 日,而其父玉敦丁父憂,解登州府同知之任,其家因此南歸原籍杭州也。端生為在室未嫁之 又言「辛丑旋南首夏天」, 八年閏三月末之後,方合禮法也。又據紫竹山房文集壹伍冢婦吳氏行略云: 得用「早」字也。 新秋月」,是其母汪氏卒於乾隆三十五年七月,而其父玉敦正在山 閏三月之故, 年即産 除其壻范氏 女, 應在三十八年閏三月末也。 關於此點又須推測端生適范某之年月。 一方面有何問題,今難考知, 故於乾隆三十七年正月末除祖父服。但其父玉敦之除父喪,以乾隆三十八 即乾隆三十七年十月之後, 隔數年, 據紫竹山房詩文集所附年譜, 又産一兒。其間或雖産兒而 依當日社會情況言,錢塘陳氏既為士大夫禮教之 然總以其父玉敦除端生祖兆崙之服 可不計外, 其祖兆崙卒於乾隆三十六年正 端生於再生緣第壹柒卷中自言 不育, 要之, 必有數年之間隔, 則端生結婚之期縱 東登州 可勉從權變 府 同 知 即乾隆 月二十四 任 内也。 庚寅 否則 或

是端生於乾隆三十七年十月除母服時, 乾隆]庚午(即乾隆十五年)秋玉萬與次兒玉敦忝與鄉薦。明年(乾隆十六年辛未)正月長孫 次子婦出也。 年已二十二歲,其父玉敦於乾隆三十八年閏三月末

父兆崙服時, 端生年已二十三歲矣。 當時女子通常婚嫁之期,大抵不逾二十歲,端生婚期實

冬季的時 間 産一女, 九 其 嫌 年之 至 遲 理 此 間 而 亦 後 不能 非 由 為端生適范某之年月,雖不能中亦不遠矣。 更別有 數年 端生始適人, 在乾隆三十八年冬季以後也。 間 復産 不 得已之故, 兒, 於禮法及情勢為最妥便。 則范某之案不能發生於三十 不宜 再延。 若依當日社會 故端 生 職此 適范 若端生於乾隆三十八年結婚 之故 某之年 風俗 九年以前 鄙意假定乾隆三十八 推 月, 論 此前一 要以 至 早在 乾 乾 時限定於乾隆三 隆 隆 三十 三十 年夏 11 年 季 玉 年 年 敦 久

異 諭 歸 庫 庚 檔 五 月及九月凡有五次記載 如 檔 子三 何 中 年諭 復 一次鄉 編輯 有 。)其文頗繁, 史 亦 今此 乘 無 試 器 於此 明清 從 乾隆 比 項檔案盧 而 四十五 史料 案之文件, 較 三十 世 茲僅節録其 溝 年 九 見乾隆朝三法司檔案甚多 恩科順 (其第 橋事 年 後, 據 變後已 司 其事者 天鄉試 四 次可参清會 + 最有關 不在 七 云:「此項材料 適 年 者 發 前 原 並 處, 牛 典 科 共有 附 事 暫 場 例叁 當時 論釋於下。 舞 四 不 Ŧ 能 弊之案。 南運未 肆 未 查 壹禮 閱 能詳 年丁 返。 憶二十餘 部 檢, 此 又故宫博 酉 伍 案 則 **貳**貢 不知其中 清 T 其 + 高 年前 與清 物院 舉 宗 刀口 整 實 年 清軍 是否 整 肅 已亥, 録 高宗實録 理 場 乾 機 有 明 規 降 清 與此 壹 處 兀 几 奏鈔上 乾 + 内 隆 閣 五 Fi. 大 几 年 年

録

高

宗實録壹壹壹叁略云

往伊犁,給種地兵丁爲奴。其勒善陶淑均即著革職,以爲科場舞弊玩法者戒。 加議處等語。此案科場傳遞積弊聞之已久,但總未經發覺,姑未深究。今陳七等既經拏 [乾隆四十五年九月]甲申又諭曰:刑部審訊鄉場傳遞文字之謄録陳七等一案,將陳七擬絞 若不力爲整頓,使之懲做, 實爲罪魁, 其代倩作弊之恒泰春泰范菼陶雲鶴發往烏魯木齊,不能禁約子弟之勒善陶淑交部嚴 問擬絞候, 自屬法無可貸。 則舞弊管私,將何底止。此案陳七一犯, 恒泰春泰著削去旗籍, 與范葵陶雲鶴 包攬得臟 並發 藐法

同書高宗實録壹壹壹肆略云

撫。)奏稱,先於場前訪查積習,出示禁論,併增築夾墻,另開更道,於擡運人夫,逐加 惟今年富綱(寅恪案,清史稿貳佰捌疆臣年表陸各省巡撫表載乾隆四十五年富綱任福建巡 不能如京師之嚴密。 順天科場,特派王大臣等, 搜檢王大臣奏,拏獲懷挾傳遞及頂名代倩,不一而足。各犯已交部從重辦理, 未見有查出懷挾傳遞頂冒之事。豈作奸犯科者,惟順天有之,而各省竟俱弊絕風清如此 [乾隆四十五年九月]丁亥諭:鄉試爲掄才大典,欲拔真才,先清弊竇。本年順天鄉試, ,印用號戳,並不假手吏胥等語。辦理較屬認真,此外則均以三場無弊一奏塞責 該巡撫等職任監臨, 於磚門龍門逐次嚴查,尚有此等弊竇。何況外省稽察搜查, 摘弊防奸,是其專責。 乃歷年披閱各該撫奏摺 用昭炯戒。

通論

知之,並令於每科引此旨覆奏,著爲例。

從重覈辦,務令闡中積弊肅清,

士子懷刑自愛,

庶足以甄别人材,

振興士習。

將此

乎? 實因各無臣模稜市譽, 凡遇大比之期, 必須實力稽察, 不肯認真任怨耳。 慎密防閒, 夫取怨於作奸犯科之人, 如 有前項弊端, 即當立時 亦何妨乎? 查 獲 嗣 後 各 加

寅恪案 惴畏避 期, 數年 試 生之壻范某也。綜觀高宗屢次御旨, 科場 負監臨之責者,須引此旨覆奏, 又其罪為發往伊犁, 未有 中, 若恐被其牽累,遂不敢略一涉及端生者,非無因 端生之壻范某是否即范菼, 惟此 作弊案 次發生作弊之案。 發 生 亦與端生壻之事相符。今未發見明確之反證,不得不暫假定范菼 更可 推 知。 據高宗論中「歷年披閱各該撫奏摺」之語 永為定例。則此案性質嚴重,一 今難確定。然乾隆三十九年以後, 知其意在嚴懲窮究, 廣肆 此案中之范菼乃由陳七口供 也 株連, 牽累, 並 至於是。當日陳氏 通諭全國, 四十七年以前,三次鄉 既與陳文述所 則是 至少此 凡遇 科 年以前 言者 親 友惴 、即端 試 相

單名, 復次, 侍郎奠文燦前輩即送歸禾中二首自注及文集捌湖北鄉試録序又陳句山先生年譜乾隆六年辛酉 發現有 清代江浙 「范」亦非 范葵 」者,其人乃陳兆崙交友范璨之子。 僻姓, 士人因長洲韓元少掇高科享盛名之故, 則乾隆之時, 江浙地 域 同 稱「范菼」者, (見紫竹山 往往喜用其名, 房詩集叁書榜自注 當不止 一人。今翻檢當時 以「葵」為名。 H 一菱」既是 捌 史料 呈范

范氏之字,諸材料均作「電文」,而紫竹山房詩文集及所附年譜則俱作「奠文」,不似誤寫,未知 耳。紫竹山房詩文集及所附年譜引范氏之名共有三處,僅文集捌作「璨」,餘二處均作「燦」。至 不深論。)然其可能性固大,可疑之點亦多。茲略引史料稍辨釋如下: 月日條 録壹叁貳乾隆五年十二月戊戌條及同書壹捌柒乾隆八年三月庚午條, 條。寅恪案,范氏之名及字,今所見諸種材料,往往不同。其名當以作「璨」為是,蓋凊高宗實 ·璨」也。惟清史稿貳佰捌疆臣年表作「燦」,與本書高宗紀自相違反,殆吳廷燮撰表時未詳察 殊可注意。他若諸地方志於范氏之名往往或作「璨」,或作「燦」,以其取材不同所致,可 清朝進士題名碑雍正二年甲辰科姚璨條,清國史館范璨傳, 清史稿拾高宗本紀壹 陸燿范公神道碑等, 皆作

陸燿切問齋集拾資政大夫工部侍郎范公神道碑(参王昶湖海文傳伍拾陸燿文選及碑傳集叁貳陸

燿撰范公璨神道碑)略云:

賜「松嚴樂志」額,因以爲號也。系出宋文正公長子監簿公純佑之後,公登康熙癸巳鄉薦, 致仕,至是以慶典來朝,獲厠耆英之會,朝論榮之。越六年丙戌十二月,有司以公卒聞 人,賜遊香山,製九老詩以寵之,時則資政大夫工部侍郎松巖范公與焉。蓋公自丙寅蒙恩 乾隆辛巳之歲,恭逢聖母皇太后七旬萬壽,上命文武廷臣及予告在籍年七十以上者各九 諭祭如例。以某年月日葬公於木瀆之阡。 公諱璨,字電文,一字約軒,其曰松巖者,以上

四人。予於公爲鄉後學,墀又姻也。(寅恪案,爾雅釋親云「壻之父爲姻」。然則燿之女適 墀之子也。)以公隧道之文來請,因叙其世次歷官行誼,而系以銘。 先公卒。孫三人,墀、城、塏,皆國子監生。女二人,孫女二人,皆適士族。曾孫男女十 年距生於康熙庚申,享年八十有七。配孫夫人。子二人,儀薰,國子監生,菼,貢生,皆 親尚在淺土,特疏請, 正甲辰進士,改庶吉士。〔後〕巡撫湖北安徽。入爲都察院副都御史,工部侍郎。 菜羹蔬食,不異貧寒。公既貴顯,讓宅於從父兄弟,而自卜居於吴興之南潯。 遂得蒙恩卜葬,並許歸田。居平益以盛滿爲戒, 潔清之操, 其卒之 旋以兩

李桓耆獻類徵初編柒陸卿貳類叁陸載清國史館范璨傳略云:

耆獻類徵此卷出自清國史館列傳原本,蓋官書所記,乃從賜祭葬之年耳。)尋賜祭葬。 范璨浙江秀水人。雍正二年進士,改翰林院庶吉士。[乾隆]五年遷湖北巡撫。八年三月調 安徽巡撫。九年六月召還京,九月授都察院左副都御史。十年五月遷工部左侍郎。十一年 請假回籍,尋以年老休致。三十二年卒。(寅恪案,璨實以乾隆三十一年十二月卒。 李桓

范來庚南潯鎮志貳建置志居第門載:

九老第。(原注:在東栅大街。范司空璨致仕所居。欽賜「香山九老」,故名。)樂志第。 (原注:在東栅皇御河。少司空松巖公子貢生范菼所居。御書「松巖樂志」匾,故名。寅恪

此語大可注意,似范璨卒後其子菼猶居此第也。可參下文論范菼先其父卒節。)

光緒七年修烏程縣志貳叁寓賢略云:

篇。 西, 宅於從父兄弟, 二一甲三十五名姚璨, 恭奉御書「松巖樂志」匾額。三十一年卒,年八十七,賜祭葬。 (蘇州府志、南潯志、切問齋集范公神道碑。 號約 而移家烏程之南潯, 軒, 晚號松巖。 浙江秀水縣。」)世家吴江之麻源九曲里。 榜姓姚。 其居在東栅大街者, 曰九老第, (寅恪案, 清朝進士題名碑雍正二年甲辰科 著有樂志堂集、 秀水籍。 復構樂志堂於皇御 既貴 河 讓

可能性甚大。 同縣, 寅恪案,陳兆崙與范璨既同朝雅故,復同鄉里,門户匹對。范氏為秀水人,與端生外祖汪上 更忻夫壻是儒冠」之語,復與貢生之資格相符及鄉試科場有關, 時間 其時璨子菼已先璨卒, 此可疑之點一也。又乾隆四十五年順天鄉試一案, |范某之初,其翁仍健存,而范璨已卒於乾隆三十一年末,此時端生尚在閨中, 蓋有所避忌而改易,此固可通,然再生緣第壹柒卷首節端生自言「幸賴翁姑憐弱質」,則端 其家又寓烏程之南潯鎮 又更在三十一年范璨卒年之後,此可疑之點二也。説者或謂陸燿碑文菼已「先公卒」之 但范璨既卒於乾隆三十一年末, 與端生妹長生夫家葉氏同居湖洲。 而端生之適人,如上文所推論, 則范菼即陳端生之夫范某, 據端生再生緣第壹柒卷首節 當在乾隆三十八 范菼始獲罪 斯豈可通 其 遣 堉

耶? 碣一。 此 集捌 氏此 九年 撰此 耆獻類徵壹捌叁清國史館陸燿傳。) 揆以通常情事 年十二月乞歸侍疾。四十六年十一月丁母憂。四十七年十二月奉旨往山東辦理運河隄務。 撰陸君墓誌銘。 事也 生於乾隆四十五年秋季, 碑文。 若欲勉強認定范璨之子菼即 七月擢湖南巡撫。 一碑文。又今陸氏所撰切問齋集, 皆先公卒」之語, 之卒甚 時實居浙江 唯見陸燿所撰神道碑 此碣文乃燿任湖南巡撫時所作。(耆獻類徵壹捌叁清國史館陸燿本傳略云:「 呈范侍郎奠文燦前輩即送歸禾中」二首。 又依常例言 若陸氏自丁母憂至往山東時, 雖亦有 近。 其 秀水,)是此碑文作成之年月不能後於此時限。又考郎夫以母陳氏病, 在乾隆四十五年范菼案發生之後, 神道 乃是諱改。 五十年六月卒。 而不在江蘇吳江。 上距陸氏之丁 一篇, 碑文之作自當在已有墓誌 而未發見有墓誌銘。 是端生之夫, 考陸郎夫卒於乾隆五十年六月二十三日。 雖不編年月,而此碑文之後即接以「保德州 母憂, 」)以篇章排列次序先後言之, 見馮 其間尚有一年餘之久, 浩撰陸君墓誌銘。 其所謂「禾中」, 一年餘之久, 但在母喪中, 則必須有 陸氏撰此碑文當在以母疾乞歸 銘之後。 豈范松嚴實曾有墓誌銘, 更可推知。 兩項假 今檢清代載籍 即指秀水言也。 設。 然則碑 又范氏本秀水籍。 (一)陸燿|子二人, 則此碑文作成 可以受范璨孫墀之請 文之諱改, 恐不便受范氏之請 (見碑傳集柒叁馮 關 乃其太親翁陳句)因范菼之案發 於 知州錢之青墓 於乾隆四 居家時。 范璨 自是可 之時 [乾隆]四十 紫竹山 身後之 儀 能之 下距 房詩

抑

更

可論者

范璨以乾隆三十一年卒, 其年八十七。假定其在六七十歲間生子菼,

仲弟 有 Ш 出 所 眉 一繼之 撰, Ili 行 口 後為陳桂 略。 能 如陳)果爾, 生 兆崙以 所刪 則端 削 其 生書中所謂之「翁」, 次子 遂致 玉敦出 不傳耶?姑記 繼其弟兆 此 疑, 乃菼出繼之父, 媚 之事 更俟詳考。 即 印 為 (二)范 證。 亦即璨之弟也。 (見紫 変既 竹 非璨之長子, Щ 房文集壹 然歟?否 自 伍

敷?

非所敢確

世

簡 年以舉人考授 一於范璨神道 不 Ш 敢自信者也 交誼 父憂, 月調)則燿之家 房集附 不知燿是 碑 111 文中 然端 載陳句 ifij 東 登州 内 燿 碑文撰者陸 庭如亦同在登州者, 閣 又與陳氏友好, 所謂「予於公為鄉後學」者。 否未到登州, 生 實 山先生年譜乾隆 府 中 知府。三十六年調濟南 書。 於此年四月始返杭州。 耀, 耀又於「 即改調濟南耳。 其與陳端生父玉敦之關係, 豈端生與范菼之婚姻, [乾隆]三十五 干 或尚 九年 一可與端生相見。 燿本為吴江人,吴江乃范璨 申 耀於范 府 戌條。)則燿亦與 (再生緣第壹柒卷第陸伍回首節 若耀果一 知 年八 府 墀為 -月選 蒞登州者, 見耆獻類徵壹捌叁清 姻 即由 雲南 亦有可述者。耀與玉敦同於乾隆十九 親 陸氏所介紹 玉 雖不知始於何時 大理 敦 同 則玉 府 時 知 同 敦雖於乾 府, 耶?此乃大膽之妄測 官 Ш 國史館 以 東 一辛卯旋 親 但 隆 登 老改補 陸范兩家當 州。 陸 三十 原 燿傳 南 六 但 史文 首 年 即 夏

則端生

與爽

結婚 笑也。) 貞之夫,以罪遣戍伊犁之范秋塘。搜索研討,終知非是。然以此耗去目力不少,甚可 夫范某為乾隆 未見 ~繼娶 時 陳范兩 無 変年 疑。 時 當 氏家譜 為三十 璨有 因收藏顧亭林集獲罪, 孫 以前 餘, 三人, 而 端生夫壻問 孫女二人, 端 生 如 Ŀ 議遣戍, 所 不知其 論, 題 實 己二十三 懸案 、中孰是端生所生者, 而被赦免之范起鳳。 歳。 不能滿 以當 意解 社 决也。 今亦 後又疑為乾隆 會 婚 不可考 嫁 (寅恪 年 龄令 知 初 常 矣。 疑 間 情 嘆, 才女陳雲 陳 推 端 總 亦 生之 日 葵

茲姑 遂 陳七必有真實之名, 是與烏魯木齊有關之旗人無疑。勒善以不能禁約恆泰春泰二人革職, 至於乾隆四十五 一人自是兄弟。 **過**隱去其 引史料 據此諸 (真名) 端 推論 略辨釋之於下 高宗論 而逕以 年 順 今於清代史料中, 當時 天 旨既言 排 鄉 諭 試 行之稱謂著之公牘耳。 科場 旨及刑部奏疏僅 削去旗籍」, 案, 其中 發現一勒福 又特改部議發往烏魯木齊 獲罪 稱「陳七」者, 陳七之名今既無 諸人, 頗合上列條件。 除范 蓋 承 葵以外, 辦此案之法官 可考, 則其 為發往 亦略有 然仍有 茲可 人必是恆 伊犁 不欲多 不論 可論者。 疑義 泰春 若 則 所 尚待詳考。 此案主 此 恆 牽 一人當 泰春 連 泰 犯

耆獻 類徵 初篇 幺 貢 貢 將 帥 類陸 貢 載 清 國 史 館 勒 福 傳 略 Z.

勒

福初名勒善。 哩那氏 蒙古鑲藍旗 吐魯番駐防。 由委前鋒校於乾隆五十八年派

之子可. 神童 高 下恐無如此 往伊犁者 疑。其 斷 推 然未 监 乃泛指 定。 至乾隆 然順 知 至多亦當 勒福 並 因傳言 既 勒善著更名勒 、翰林館選, 乾隆 家長 其理 南城縣志柒之貳。 但 屬 巧合之事也。 天鄉試非 T 此 吐 本名勒善。 為二十 勒福 而言 Ŧi. 由 二十二年丁丑科二甲二十九名為陶 勒福之子, 魯番駐防, 年 或即在此。 神童特科, 於道光二十年, 〔道光〕 非謂恆泰春泰即其子或弟也。 其間 歲 (參光緒修江 福。 清宣宗何 頗疑 E 卡, 其名為祥泰。 又經烏 十五年二次俸滿, 距 二十年以年 雖然, 離已有六十年之久,)以州縣外職終老。 恆泰春泰乃勒福之姪, 而非其子。 如此幼小年齡絕 其所生之二子, 魯木齊 以特改其 西通志叁貳及 以年力就衰致仕。則此 此勒 以一泰」字為名, 都統長清保薦 力就衰, 福是否即乾隆四十五年 原名 經烏 不能 至多 人叁肆 此 故乾隆四十五 魯木齊都統長 今不能詳 命原品休致。 淑。 陶 陶雲鶴今無可考。 亦 入聞應試。 選舉 淑之仕宦年代甚合陶 不過數歲。 其 似恆 明是與 人乃江 表及光 (時其年齡必已老邁, 可以決言。 知。 泰春泰之由 二十三年卒。 年順 恆泰春泰為兄弟排 由 順 然其原 清保薦, 諭旨 緒 西南 縱此 天鄉試 是言之, 補 天鄉試科場案之時, 城縣 惟有 中所謂 道光 名必有 二子俱 科場案中 發往烏魯 由 雲鶴 修建 籍 陶 恆泰春 兵部 子祥 淑者 不能 為小 所避 雖名列等次 昌 帶 父之條件。 府 泰必非 泰驍騎校。 木齊 「禁約子弟 之勒善, 忌 領引見, 行。 據清 時了了」之 志染之肆 改為發 自無 否 其 朝 勒 但 頗 進 可

詳檢清代史傳, 今所見史料殊為簡略,不易決定此陶淑果是乾隆四十五年順天鄉試科場案中有關之人與否也。 陶姓淑名者, 固不止一人。然時代相當, 其他條件亦符合而又不為女性者, 實

止有江西南城陶淑一人。茲節録地方志之文,略辨釋之於下。

南城縣志捌之貳宦業陶淑傳(光緒補道光修建昌府志捌人物宦業下,又可參畿輔通志壹玖貳宦

績拾

十餘年。性耽吟詠,公暇與僚屬相倡和,不以宦遊偃蹇介意也。 修江西通志壹壹壹藝文略集部伍别集。又南城縣志玖之陸藝文中載陶淑姑山吟七古一 陶淑字作人,號秋山,南城人。乾隆癸酉中式北闡鄉試。丁丑成進士。 調衡水。陞保安知州。 以事詿誤。補棗强令。内艱服闋。補陝西麟遊令。 著有秋山詩集。 選授盧龍令。 前後服官四

首載陶淑序(此序所署年時為乾隆三十二年丁亥季秋)云: 寅恪案,陶淑傳中言其任保安州知州時「以事詿誤」,而不明言其為何事。但據乾隆修衡水縣志

淑既受命衡水之五年, 乃克纂輯縣志, 勒成一書。

道光修保安州志伍職官表知州載:

陶淑。(字秋山。 江西南城。進士。重修州城。乾隆三十九年任。)

范清漋。(監生。署。)

李能聰。(廣東四會縣。貢生。乾隆四十五年任。

嘉慶修棗強縣志伍職官表知縣乾隆四十九年任者凡四人:

范安仁。(署任。四川成都人。拔貢。)

陶淑。(江西南城人。丁丑進士。)

黄應隆。(署任。湖南寧鄉人。副榜。)

蒯祖炳。(江蘇吴江人。監生。)

歸省 與燕北閒人兒女英雄傳第叁拾回「開菊宴雙美激新郎,聆蘭言一心攻舊業」中渴慕金花瓊林宴及 李綺所聯「即景聯句」五言排律詩,其結語云「欲誌今朝樂,憑詩祝舜堯」等即是其例。又悼紅軒 當不工於代古聖立言之八股文及頌今聖作結之試帖詩。(如戚本石頭記第壹捌回「慶元宵賈元春 可確定矣。總而言之,此科場案發往伊犁罪犯四人中,恆泰春泰本是駐防烏魯木齊之蒙古族 可知陶淑任保安州知州「以事詿誤」,當在乾隆四十五年。既在四十五年,則是陶雲鶴之父,又 |人極力摹寫瀟湘妃子, 高逸邁俗, 鄙視科舉, 而一時失檢, 使之賦此腐句, 頌聖終篇。 云「盛世無飢餒,何須耕織忙」,及第伍拾回「蘆雪庵爭聯即景詩,暖香塢雅製春燈謎」中 助情人林黛玉傳詩」中林黛玉代倩作弊,為其情人賈實玉所作「杏簾在望」五律詩, 若取 其結 李紋

作弊, H 誥封夫人,而行酒令之十三妹比觀,不禁為林妹妹放聲一哭也。)陶雲鶴既為乾隆二十二年丁 一科進士陶淑之子,若范菼之父又為樂志堂主人,則雲鶴及菼二人俱屬科舉出身之家庭,代倩 其人必已早死無疑。 頗為可能。所可注意者,勒善陶淑以恆泰春泰陶雲鶴之故,牽連獲罪,而范菼之父未聞 即使范菼雖已出繼, 而此時其繼父當亦亡故。 然則范葵為范璨之

再生緣第壹卷第壹回云: 茲論陳端生生卒年月及其壻范某事蹟之可考者已竟,請論端生撰再生緣之年月及地點如下。 志堂之少主人也。

雖未

不得確據

但就菼父不被累及一端言之, 亦可旁證此案中之范菼,

即是烏程縣南潯鎮樂

句, 閨幃無事小窗前, 略撿微詞可作篇。今夜安閒權自適, 秋夜初寒轉未眠。 燈影斜摇書案側,雨聲頻滴曲欄邊。閒拈新思難成 聊將彩筆寫良緣。

注明何月。 寅恪案, 以上為端生自述其初撰再生緣之年月也。 據此 書第玖卷第叁叁回云: 然未明言是何年, 又止言「秋夜初寒」,

任, 五月之中一 束裝迢遞下登州。 卷收, 因多他事便遲留。 停毫 一月工夫廢,又值隨親作遠遊。 家父近將 司馬

是從端生父玉敦赴山東登州府同知任期,逆數至前一年,即再生緣開始寫作之年也。據端生祖

[乾隆]三十四年八月,先生次子玉敦以中書改官山東登州府同知。

開始寫作之年既定, 然則乾隆三十四年前一年即三十三年,乃再生緣開始寫作之年也 開始寫作之月為何月平?據再生緣第貳卷第伍 回首節略 云

仲冬天氣已嚴寒, 獵獵西風萬木殘。 短畫不堪勤繡作, 仍爲相續再生緣。

是第貳卷開始寫於乾隆三十三年仲冬十一月。但第壹卷第肆回末節云:

冬十月寫成第壹卷 含冬至之月,其前一卷絶無寫於「歲暮」十二月之理也。 所謂「歲暮」者,實指冬季或即孟冬十月。否則第貳卷明言開始寫作於仲冬十一月,「晝短」即包 書中雖是清和月,世上須知歲暮天。臨窗愛趁朝陽暖,握管愁當夜氣寒。 則第壹卷首節所謂「秋夜初寒」者, 故「歲暮」二字,不可拘泥誤會。既是孟 殆指季秋九月而言。 據句山先生年

普乾

年俸滿,奉旨記名外用, 留京供職 先生以先世兆域未卜,九月命長子(玉萬)隨侍周夫人率眷屬南還。次子(玉敦)官中書, 隆三十三年戊子條下略云

春生桂生之母。見紫竹山房文集壹伍冢婦吴氏行略及壹捌先府君[暨]先妣沈太夫人合葬墓 可知乾隆三十三年九月間,端生之祖母周氏及伯父或伯父之妾林氏等(玉萬有妾林氏,即安生

减 誌 口 以 從事 杭州。 著作。 京寓中 其自謂 人少事 閨幃 無事 簡, 而 」乃是實情 端 生以長 故可 孫女之資格, 推定再生緣開 平日 所應 始寫作於乾隆 擔負之家 務 亦 因 之稍

腓 始寫作年月既定 開始寫作地點為何處乎?復據句山先生年譜乾隆三十四年己丑條下略

正月二十二日出京。

月

也

又乾隆三十五年庚寅條下略云:

口 知陳 知 五月假 兆崙全家本居北京外廊營舊宅。 先生初至京 滿 赴闕 時 長子(玉萬)亦謁選, 借寓汪芍坡給諫 乾隆三十三年 新 随侍)宅。 入京。是月(八月)長子(玉 九月杪移歸外廊營舊宅。 九月, 端生伯父隨侍端生祖 萬)選授山 13 率 東濟 眷 屬 先

房詩 汪 科給事 杭 遷 Ŧi. 芍坡與 月兆崙率 州。三十四年正 外廊營舊宅 集壹 中 充江 拾 兆崙 玉 方滌 南鄉試副考官, 萬等返京之後 是杭 Ш 其子玉萬玉敦兩房皆已往 為 月,端生祖父又返原籍。同年秋間 州 墹 汪 人 編 修 其夫人方芷齋(芳佩)之父滌 故兆崙等得於是年夏秋時間借寓汪宅。 不逕回外廊營舊宅,而借寓汪芍坡(新 (新 迎 至 「邸寓七律, 山東, (寅恪以為玉萬玉 可以推見 ,端生父玉敦一房赴任登州。 山(宜照)又為兆崙 也。 然則)宅者 敦本為同 至於陳汪 兆崙於乾 1 9 角 當由 胞兄弟 隆 兩家之關 舊 友, 三十 此 至三 時 觀紫竹-Ħ. 汪 雖 年 氏以户 + 係 九月 Fi. 年 則

登州 世 為止 宅之語 於再 三年 雖 竹 官 似 知 111 H 再 F 指 虎坊橋等地。 宅 今雖 九月 H 生緣第壹 及 房文 東 知官 越 生 適 登州 知縣之官秩皆在道 再生緣發祥之所 發芸 集壹 緣 用 則於久客長安, 至三十四年五月皆在北京外廊營舊宅。 據 兆崙在京所居之宅今可考知者, 於牟子 能確 第 同 陳 納 玖卷 内 知官舍而言 柒卷第陸 伍 句 日月遥 所 知 Ш 仲 寫。 至 舊邦(再生緣 可參光緒修順 先 弟 第 但序文中「入其家, 衡門 生 眉 此八卷約 壹 伍 年 Ш 習知城南坊宅情況之人, 府以 陸 故為最有價值之地, 回首節 譜乾 行 (見再生緣第壹陸卷第陸肆 然紅 卷, 略, 下 隆 第壹肆卷第 經 寫端生自乾隆三十 天府志京 玉 干 云追憶閨 杏高槐」乃北方所常見、 七 與前 敦 曾 月之久寫 Ŧi. 年. H 马 湯芳燦事 庚 繼 師 中幼 尚有粉 伍陸回 志壹肆 寅 其 兩版, 蓋端 成 條 胞 稚 此宅是否即王 叔 年及 房 末節 更覺端生此言, 四年八月中秋起至三十五 生 後又同 雖端 兆 坊巷 例 凝塵滿席 琉 撰 嵋 回末節。 不 璃 再生緣自第 生自 云:「錦綺裝成牟子國 同 下。 隔 街 本 仍是 官 也。 牆 非)其皆 江 云前 之語 賈家 限 紅 蘭泉紫竹山 南 日)其 一不 於 杏 祖 實依端 幾本, 復寓 親切 菲 衚 壹卷 飛 其 兄 恐能 地 晴 宏 衕 弟。 所 雪, 有 外 麗 以 至 鐵老 廊 生撰寫 雖 味, 第捌 但此 房詩 若 適 不 然筆 視 映 用 答 年三月春 可 迴 作描 榻 鸛 文集序 矣。 亦 以 於 卷 避 次兄弟二人, 」景 第 兆崙 墨 廟 不 高 推 即 同 捌卷以前之 功夫久, 必 繪 槐 巷 自乾 但 知 省者 物之 過 暮 外 覆 也 在 中 外 棉 京 止 泥 廊 晚 隆 廊 所 端生 花 所居 至 烟 指之 洁 在 寫 認 同

平均速度計之, 並非 猶恐遲緩,其於再生緣第壹柒卷首節所謂「由來蚤覺禪機悟」者,殆亦暗示此意耶?此一段時期 已見及其母汪氏之病漸已增劇, 遲緩。此不過詞人才女感慨捣謙之語,讀者不宜拘執也。 又己身不久亦將于歸, 人事無常, 俗累益重, 或者端生此時早 所以日夜寫作

第 (「蓬山」蓋兼指登州府蓬萊縣。古典今事合為一詞,端生才華於此可見一斑也。)即端生於乾隆四 為端生一生最愉快之歲月。再生緣第壹柒卷首節所言「地鄰東海潮來近,人在蓬山快欲仙 , 致卷開始寫作時及第壹陸卷完成時之記載, 九年甲辰續寫再生緣時, 追憶此時期生活之語也。 略加詮釋於下。 茲不詳述此時期每卷寫作之年月, 僅逐

再生緣第玖卷第叁叁回首節略云:

乏,官程跋涉筆何搜。連朝躭擱出東省, 家父近將司馬任, 束裝超遞下登州。行船人襍仍無續,起岸匆匆出德州。陸道艱難身轉 到任之時已仲秋。今日清閒官舍住,新詞九集再

又同 書第壹陸卷第 轉眼中秋月已殘, 陸肆 金風争似朔風寒。 回末節略 云 欲着幽情無着處,從容還續再生緣。

這正是,光陰如駿馬加鞭,人事似落花流水。

起頭 疑當作「謝」。)流水光陰暮復朝。别緒閒情收拾去,我且得, 時 芳草 緑生纔 雨好, 收尾時, 杏花紅墜已春消。良可嘆, (寅恪案,坊間鉛印本「得」作 實堪誇。 (寅恪案

「待」,似更佳。)詞登十七潤新毫。

鄙笑 故附録於此。詩之詞句重複鈎連, 斯為殊異之點, 詞 頭記 似水流年」之句, 通 戲 端生 語 自不待言。 一雖是曹雪芹同 牡丹亭艷曲警芳心」之末節。)不過悼紅僅間接想像之文, 故再生緣傷春之詞尤可玩味 所可注意者, 却適與紅樓 時之人, 夢中 但其在乾隆三十五年春暮寫成再生緣第壹陸卷時, 即端生杏墜春 固是摹擬繪影閣體。 林黛玉之感傷 也。 消, 寅恪近有看花送春之作 不期冥會。(戚本 光陰水逝之意固原出 然意淺語拙 石頭記第貳叁回一 自知 而端 於玉茗堂之「如 亦關 必為才女之鬼所 生 前直 涉 牡 接親歷之 必未 丹紅 西

甲午嶺南春暮憶燕京崇效寺牡丹及青松紅杏卷子有作:

紅 首燕都掌故花 杏青松畫已陳, 花開 典亡遺恨 花落隔 尚 如新。 天涯。 Ш 天涯不是無歸 河 又送春歸 去, 意 腸斷 争奈歸 看花舊 期抵 死験。 H (改宋人詞語。

復 血取道運 次 一同矣。 仍是乘車陸行, 端生 河 端生於乾隆三十六年夏間返杭, 也。其自言「行船人襍仍無續」, 於乾隆三十四年秋, 與前此自北京赴登州時, 隨父玉敦由 自是舟行, 大約亦由德州乘船, 則於第壹柒卷首節所言「歸 北京赴山 由德州登岸乘車者不異。所謂「陸道艱難身轉乏」 東登 州 同 知 任 所, 棹夷猶 其 初 其登州 翻 段行 斷 簡 德州 程為 者 舟行,

年甲 病劇 節 非今日交通 首節及末 如寅恪今日 之才思敏捷 蓋端生以母病劇輟寫, 三十六年辛卯 謂 來勉 則昔時 辰 捎 年之久 因在辛卯年自登州 歸棹夷猶翻斷簡 仲春 端生 」及「庚寅失恃新秋月, 逸強續成 節端生自述其撰著年月及續寫經過頗詳, 者 方始 因 便利之時代所能瞭解者矣。又再生緣第壹柒卷首節云「自從憔悴堂萱後 深閨弱質, 當日 方始續寫 後 此 更何足 續寫第壹柒卷 不能從事寫作, 年壬 卷, 亦自謂 (再生緣第壹柒卷首節有「幸賴翁姑憐弱質」之句。)騾車陸行之苦況 道哉 而卒 也。 返杭州途中, 返杭州途中稍加修改, 及到杭州後 辰算起, 深閨閒暇待重編。 印 嗚呼! 以完 非 更何足 全壁 辛卯南旋首 至乾隆四 成此 此 至是年七月其母汪氏病逝, 更不能繼續撰著。 端 端生於乾隆三十五年輟寫再生緣時 道哉 生所謂 遺憾 書, 於再生緣十六卷稿本, 十八年癸卯止, 無窮。 絶 夏天」,則端生之母汪氏自乾隆三十五年暮春以 由來蚤覺禪機悟, 此十二年後所續 無疑 「悠悠十二年來事, 義。 至若 上文已逐録之矣。 豈知竟 禪機蚤 實為十二年。 寫者, 即為俗事牽累擱置此稿 猶略有所修改。 為人事俗累所牽, 悟一 可奈于歸俗累牽」, 盡在 即今再生緣第壹柒卷, 俗累終牽, 明堂 端生所以 年僅二十歲耳。 醉 再生緣第壹柒卷 間 直至乾隆四十九 遂不 以致 者 從 即 I 得 指 直至經過 遂使芸細 即 辰 協 不中 此 以端 年 由 而言。 後即 乾隆 算 有 起

|緣第壹柒卷第陸伍回首節云「歲次甲辰春二月,

芸窗仍寫再生緣」,

及第陸捌回末節云「八

語 以於第壹柒卷之首,開宗明義即云:「搔首呼天欲問天,問天天道可能還。」古典今情合為一 生緣十六卷寫完,至第壹柒卷續寫,其間已歷十二年之久,天道如此,人事宜然。此端生之所 反似過之。則非「江淹才盡」,乃是「庾信文章老更成」,抑又可知也。(庾信哀江南賦云:「天道 再生緣之人所能盡喻者哉?今觀第壹柒卷之文字,其風趣不减於前此之十六卷,而凄凉感慨 輟。今則「殊非是,拈毫弄墨舊時心」,其綢繆恩紀,感傷身世之意溢於言表,此豈今日通常讀 端生自謂前此寫成十六卷,起於乾隆三十三年秋晚,訖於三十五年春暮,首尾三年,晝夜不 幅花箋百丈長」者也。再生緣第壹柒卷第陸捌回末節云「向陽為趁三年日,入夜頻挑 以端生之才華,絕不至如平山冷燕第陸回中宋山人之被才女冷絳雪笑為「一枝斑管千觔重 頗能識作者之用心,非泛引杜句,以虚詞讚美也。)至其所以未續完此書者, 云:「悠悠十二年來事,盡在明堂一醉間。」又云:「歲次甲辰春二月,芸窗重寫再生緣。 、此句法與第壹卷第肆回末節之「臨窗愛趁朝陽暖,握管愁當夜氣寒」正同,而意境則大異也。 張完成一卷,慢慢的,冰弦重撥待來春」,則端生自乾隆四十九年二月至十二月,將近一年 其才思之超越固不可及, 而平日於子山之文, 深有解會, 即此可見。 寅恪讀再生緣, 僅成此 不反。 」蓋子山謂歲星十二年一周天, 人事亦當如之。今既不然, 卷, 與前此寫作此書之速度不大相侔, 斯蓋其心身及環境之變遷所致。 可悲甚矣。 今日不易確言。 盞燈 否則 白謂 端生

再 强續之勢也。 相忌 隆四十九年至此 陳文述壻不歸 寫第壹捌卷之事 第壹柒卷首節述其續寫此書,由於親友之囑勸, 陳 生緣第壹柒卷時已在乾隆四十九年甲辰冬季, 元 或第壹柒卷後, 〈論端 乏稿 也。 年。 當在戴佩荃之死, 文述 ifij 我正 既 4 儻使端)前 西冷閨詠壹伍繪影 一曾隨 能流 若不然者 後兩時限之間。 是,斷腸人恨不團圓。」則其悲恨之情可以想見, 死。 不願續成之説 慶典時 父往雲 傳於浙江 生實已寫第壹柒卷以下之稿 或由 雖有續寫之稿,但已散佚不全,今日皆 陳氏 一南之説 於病困,亦未可知。 (即在乾隆四 此書不續成之故, 所言此書之不完成, 已有十一年之久, 時間頗長, 更無一卷之再續, 當非 閣詠 第壹 若范某援乾隆 不誤。 一
集卷以下諸卷之稿 家口 似甚有根據, 十三年秋季。)但乾隆四 □詩序 五十 在端生之早死, 若范某援嘉慶元年內禪授受慶典恩赦 云:「壻不歸, 在 而後來散佚不傳者, 不可因此叟平日好作狡獪, 十三年端生必已隨父由 至此 五年高宗八旬萬壽慶典 端生自身之不願意 必使完成「射柳姻緣」。)與陳 轉又散佚, 慶典時, 止有 桂生請王昶作紫竹山 不能考知。 此書 或未死前久已病困, 似亦不近情 殆有壻不歸, 不忍續, 無完全之日也。 五六 則其 其説 依上文所 雲南歸 恩赦獲歸 年之久, 其結 散佚當 亦似 理。 遂謂其説亦出虛構 房集序, 語云:「造物 浙 曲 有 綜合 在雲 遂不能寫成 江。 假 論 於病困 獲歸 理 壻 使端 則 遇 南。 今知 端 端生之卒 大 赦 則自乾 即 亦不能 (假 牛 牛 端 歸 在嘉 可以 無 不 生 於 須

内考試 平, 遂取 中狀 也。 試 於乾隆元年一 與男性 常皆由 之人也。 文詞之優美, 然後恍然知 不待言 在端 題 思 茲論 較 再生緣之書, 元 生個 隆 康 競爭之機 科舉之途 此皆 夫當日一般人所能取得之政 作宰 熙十 雖預 寅恪往 陳 初年博學 今人所以 端 八年 足表 一月論 生寫 相等俗 試 尤別 會, 徑 Ħ -博學 海之。 鴻 示特重 與陳端生個人身世之可考見者相參會, 所以不 作再生緣之經過 愐 即應試 給發先期到京應試者膏火銀兩。 未 詞 有 濫 不喜讀此 个獲選, 鴻詞 科 更 可 喜讀此 而科 是科之意 之考 不平之理 再生緣實彈 厭之情事 中 科特難 其 試 第 舉則為男性 書之原 難 等書 一既竟 作官當 即 由 可以推見 然此 其得中式者, 治上最 詞體中空前之作, 也。 者, 其藉文詞科試 是 大 頗 例。 所 當清代乾隆之時, 亦由 請略論再生緣之思 類情事之描寫 多 國之可 也。 專佔之權 高地位為宰相 其最 (此科之發起 此 端生之祖句山 能。 故 不過十五人。 也。 主要者, 又於臨試之期, 利。 此固 以籠絡漢人之用心, 而陳端生亦當日無數女性中 年來讀史, 古 當日女子無論 鈎索乾隆 為具 雖在雍正時, 特崇獎文學 社會上 為昔日小説彈詞之通 想、 則 以此 有才學之女子心中 結構 即由此 當時以文章知名之士, 最高地位為狀 朝史事之沈隱, 於知 書思想陳 以天 華選, 文詞三 其才學如 人論事 氣漸寒, 以 而 亦可窺見矣。)此 高宗即 籠 腐 點 絡漢 望重當世。 之旨 於下: 何 元 病 所最 如女扮男 着在 思想 位 族 卓 玩 稍 其 後 越 此 味 有 粉飾 保 MA. 最 再 如袁簡 V. 所 均無 和 事 生緣 超 裝 殿 太 诵 越 自 科

環境中 觀念。 華綿 載有 玖回云 及其妹長生。 之年齡至多不過十歲上下耳。)亦未有所表見, 氏行略所述, 萬輩之才學似非卓越。 在幼年之時, 肆玖陳桂生傳止載桂生卒於道光二十年,而不言其壽至何歲。但據紫竹山房文集壹 麗者 玉敦輓 此觀念為他人所不能堪,在端生亦未嘗不自覺,然固不屑顧及者也。 其不平之感,有非他人所能共喻者。 固區以別矣。)至於其弟安生、春生、桂生等,當時年尚幼稚,(耆獻 天都汪復齋先生五古一首。 觀其詩, ,玉萬納妾林氏即桂生母事,推計之,則端生於乾隆三十三年初撰再生緣時 然則陳氏 本已敏慧, (寅恪未能多見玉敦作品, 一門之内, 句山以下, 工於吟詠, 自不能不特受家庭社會之薰習及反應。 女之不劣於男, 職此之故, 故當日端生心目中, 仍是紫竹山房之派, 自不敢確言。 端生有意無意之中造成 情事 然丁申丁丙 昭然, 與繪影 頗疑彼等之才性不如 端生處 其父玉 杭郡詩 如再生緣第叁卷第 繪聲姊妹之作才 此 類徵壹玖柒疆 一驕傲自尊之 敦、 輯 兩 1 伍 三輯 伯 冢婦吳 相 桂 形之 壹 父玉 身 拾

眼, 已廢女工徒歲月, 性文學史下册第柒章第肆節已論及。 惟憐 (寅恪案, 因隨母性學癡愚。 坊間鉛印本「憐」作「將」, 芸窗紙筆知多貴, 似更佳。)存稿見閨儀。 秘室詞章得久遺。 (此節譚 不願付刊經俗 正壁中國女

可見端生當戲寫再生緣時, 他人已有不安女子本分之議論。 故端生著此 一節, 以示其不屑顧及

因隨母性學癡愚」之語 始亦暗示不滿其母汪氏未能脱除流俗之見 也。

一書之主角為孟麗君, 故孟麗君之性格, 即端生平日理想所寄託, 遂於不自覺中

繪,遂成為己身之對鏡寫真也。

觀再生緣第拾卷第叁玖回述皇甫少華迎娶劉燕玉一節云:

來,正從米市胡同孟家龍圖相國的衙門前經過。 皇甫家忠孝王的府第造於外廊營內,阮京兆大人的私衙却在爛麵胡同。 這邊迎親的花轎轉

拜認為孟韓之繼女時

士元送 及同書第壹壹卷第肆壹 燕玉至廳院前 其言曰: 回中, 述劉燕玉至孟麗君之父母孟士元韓氏家,

叽!人夫們,轎子擡穩呵!

皇 連日晴明雪水流 一甫少華家在外廊營,即是孟麗君終身歸宿之夫家在外廊營。據上引陳句 泥濘一路是車溝。小心仔細休輕忽,外廊營, 進口艱難我却愁。

五年條 然則 又觀第壹柒卷第陸柒回中孟麗君違抗皇帝御旨, 少華之家置於外廊營者, 無意中 漏出 知陳兆崙亦寓外廊營。端生乾隆三十三年秋間初寫再生緣時,即在外廊營宅也。端生 此點,其以孟麗君自比,更可確定證明矣。 非僅表示其終身歸宿之微旨, 不肯代為脱袍;第壹肆卷第伍肆回中孟麗君在 至端生所以不將孟麗君之家, 亦故作狡獪, 為此 顛倒陰陽之戲筆 山年譜乾隆三十 而將皇甫

再生緣 諸 第 敬 皇 花。 勞天 自 狀 考 無 則 陳 中 取 欲 姑 亩 知 句 九 例 富 元 性 端 在 大別之 及自尊 Ш 會 博 貳 至於第 舅 先生 贵端 學鴻 生心 麗 蜀 之梁德繩 兀 寅恪案 時 狀 胡 第 年 捐 即 中 4: 元 詞 前 面 行 類 科。 獨 於 Y 貳 口 譜 斥孟 屈 叁回、 閲當 立之思 分為 於第 吾 Ė 為武 有 膝 作筆 端生之祖 習聞 至乾隆 則為端生心 國當日奉 關 請 士元及韓 三元。 金 貳拾卷第捌拾 諸 行 生花之邱 第貳 殿 年 想 其 類 等 又親 辭 祖 兆崙於雍正 在當 朝際, 門下武 條 七年 肆 氏 第 為金科玉律之君父夫三綱, 可參紫竹 回 中 為 心 H 以致 再 王 ,及第壹 麗 類 如於其 及其後 生 申 君 唇 日 為 三元之美談 挽轎 中 緣中 Ш 其父母招受責 父欺 麗君 專 十三年乙卯考取 房文 副 議 書第壹 百 述 兵部 伍卷第伍 假皇 君 中 餘年 孟 集捌 第捌卷第 太 即 饋 麗 侍 甫 其 覺 老第壹 酒 間 君 順 郎 敬之口 遂 偏 本身之寫 食 中 捌 天 觀 唇 不 之家 武 会 文狀 俱足驚世 口 覺取 保 内 口 皆欲 中 第壹 拾 鄉 典 斥孟 中 主 為 閣中 試録 皇 順 元 口 此 照 婆。 例 甫 中 藉此等描寫以摧 天 伍 麗 材料, 論 書一等一名, 證 一駭俗 任兵部 卷第 後序 武 少華(即 皇 君, 第二 亦即 孟 也。 鄉 甫 麗 試 敬 伍 謂 杜 類 君之失, 噫 自為 尚書 壹玖 療衣向 柒回 其 所 孟麗 小 為 此 習 撰 陵 忙 中 科 中 順 書 君之夫)向 所謂 於 成 般 或 又於乾隆 破 考 孟 天 解 麗 謂 往 當 驕 人所 取 之也。 武 元 君 麗 N 其 世 來 傲 顧 君 皇 鄉 路 相 酬 智 非 竟 凌 甫 試 麟 拜 夫之父皇甫 人皆欲殺 影 酢 夫子 識 議。 端 將 策 即 麗 1) 元 射 華 年 界之女 那 於 第 敷? 故續 是 此 為武 丙辰 跪 陸 劬 等 及 年 拜

前此 其遭 吾國 小 净 説 木 類滔滔皆是, 通 阨 病, 聲名湮没, 再生緣 而第 一書,亦不能免。然自通識者觀之,此等瑕疵,或為文人狡獪之寓 又何足 三類恐止端生一人或極少數 異哉 又何足異哉 ! 至於神靈怪誕之説, 人而已。 抱如是之理 想, 地 理 生若彼之時 歷史之誤

言,

固不

可泥執

或屬學究考據之專業,更不必以此苛責閨中髫齡戲筆之小女子也。

構皆 歐洲 甚精 中 輸 其 111 多數無系 則 威)結構 以其 吾國 甚 小説 |或受佛教論藏之影響, 以軼出本文範圍 密 稿新樂府章中言之已詳, H 當時 内容 議 且 深受古文義法之薰習 以 未經翻譯為中文以前 統或各自獨立之單篇詩文, 有 前 綜觀吾國之文學作品 寅恪 系統。 桐 不 ·甚豐富 城派古文名家林畏廬 為罕見之著述也。 讀 此 然若為集合多篇之文多首之詩 類書甚 往往 少, 輕 亦不贅論。至於吾國小説, 視之。 凡吾國著名之小説, 甚知結構之必要, , 一篇之文, 一首之詩, 哈葛德者, 但知有兒女英雄 匯為 深賞其文, 然其結構 一書耳。 ,故不置論。 其 文學地位在英文中, 精 至比之史遷。 其中 而吾國長篇小説, 密 而成之巨製, 傳 如水滸傳、石頭記 頗有 -固有例 種, 則其結構遠不如西洋小説 又如白樂天之新樂府 其間結構 系 殊為例外。 統, 能讀 外之作, 即 使出 轉勝 組 英文者, 並 則此缺點最為顯著, 織 於曹 # 與儒林外史等書, 自名家之手, 其書乃反紅樓夢之作, 如劉彦 出於名家之手者 高 書, 品 頗 怪 和之文心雕 在 所著小 則 其 歐 之精密。在 拙著元白詩 西 亦不過 於 説傳 小説 其結 則

文選派名家王壬秋鄙韓退之、侯朝宗之文,謂其同於小説。)一旦忽見哈氏小説, 文學名家輕視小説,亦由於是。(桐城派名家吳摯甫序嚴譯天演論,謂文有三害,小説乃其一。 之書若是,端生之才可知,在吾國文學史中,亦不多見。但世人往往不甚注意, 遂驚嘆不已,不覺以其平日所最崇拜之司馬子長相比也。今觀再生緣為續玉釧緣之書, 有重點中心,結構無夾雜駢枝等病之作,以寅恪所知,要以再生緣為彈詞中第一部書也。 能顧及,文字剪裁,亦可整齊。若是長篇巨製,文字逾數十百萬言,如彈詞之體者,求一 之天才卓越, 緣之文冗長支蔓殊無系統結構,與再生緣之結構精密, 韓退之云:一發潛德之幽光。」寅恪之草此文,猶退之之意也。 何以得至此乎?總之,不支蔓有系統, 在吾國作品中, 系統分明者, 實有天淵之別。 如為短篇, 故特標出之如 其作者精力尚 結構精密 若非 而玉 端生 叙述 端

(三)文詞。紫竹山房文集柒才女説略云:

不易全。 古來薄福之女, 奚啻千萬億, 世之論者每云,女子不可以才名,凡有才名者,往往福薄。 誠能於婦職餘閒 也。又況才福亦常不相妨。嫻文事,而享富貴以没世者,亦復不少,何謂不可以才名也。 流覽墳素,諷習篇章, 而知名者,代不過數人,則正以其才之不可没故 因以多識故典, 大啓性靈, 余獨謂不然。 則於治家相夫課子 福本不易得

皆非無助。以視邨姑野媪惑溺於盲子彈詞,乞兒說謊,爲之啼笑者,譬如一龍一猪,

以 同 日語哉?又經解云:温柔敦厚,詩教也。 由此思之, 則女教莫詩爲近, 才也而德即

所謂 生已挾其稿往登州以去。此老不久病没,遂終身不獲見此奇書矣。即使此老三數年後, 時代,可不深論。所可笑者,端生乘其回杭州之際,暗中偷撰再生緣彈詞。 凡有才名者, 然耶?抑不以為然耶?再生緣之文,質言之,乃一叙事言情七言排律之長篇巨製也。關 餘年來吟誦 不意人事終變,「天道能還」,(再生緣第壹柒卷第陸 不多教女子以文字。 取較其祖之詩文, 孫女輩日侍其側者, 文集若存若亡, 嫻文事 句山 今寅恪殊不自量, 奮其譾薄, 特草此文, 於閨幃繡闥 往往福薄」。 此文殊可 享富貴」者, 僅東置 今觀端生、 顯著隱晦,實有天淵之別, 之間 注意, 一而端生亦必不敢使其祖得知其有撰著邨 悲夫!句山雖主以詩教女子,然深鄙 長生庶幾近之。 圖書館之高閣, 吾國昔時社會惑於「女子無才便是德」之謬説, 演唱於書攤舞臺之上。近歲 長生姊妹, 博雅之目録學者, 至若端生, 則竟不幸如世 俱以才華文學著聞當世, 斯豈句山當日作才女説痛斥彈 欲使再生緣再生, 句山老人泉底有知 伍回首節云:「問天天道可能還。」)紫竹山 以來雖稍衰歇, 或略知其名, 彈詞之體。 姑野媼所惑溺之彈詞之事也。 「論所謂「女子不可以 則句山家教之力也。 不 此老迂腐之見囿 如前 而再 逮句山 雖士大夫之家, 詞之時 生緣 此 反京 之流 猶復健 書 所能 於天竺 行, 才名 以為 句 於

希臘及西洋之長篇史詩, 與吾國文學比較之問題, 以非本文範圍, 茲不置論。 僅略論 吾國 詩 中

之排律,以供讀再生緣者之參考。

元氏長慶集伍陸唐故工部員外郎杜君墓係銘並序略云:

邁, 14 府歌詩 東人李白亦以奇文取稱,時人謂之李杜。予觀其壯浪縱恣,擺去拘束,模寫物象,及樂 而風調清深 誠亦差肩於子美矣。 屬對律切, 而脱棄凡近, 則李尚不能歷其藩翰, 至若鋪陳終始, 排比聲韻, ,大或千言,次猶數百, 況堂奥乎? 詞氣豪

姚鼐今體詩鈔序目略云:

能了, 線,不覺其多。讀五言至此, 杜公今體四十字中包涵萬象,不可謂少。數十韻百韻中運掉變化如龍蛇, 頗多謬説,故詳爲全釋之。 始無餘憾。余往昔見[錢]蒙叟箋,於其長律, 穿貫往復如 轉折意緒都

同書五言陸杜子美下注略云:

特一途,文章如此亦區區。]少陵自有連城壁,争奈徽之識珷玞。 玞,此成何論耶?杜公長律旁見側出,無所不包,而首尾一線,尋其脈絡, 杜公長律有千門萬户開闔陰陽之意。元微之論李杜優劣, 自來學杜公者, 他體猶能近似, 長律則愈邈矣。[元]遺山 專主此體。 [論詩絶句]云: 」有長律如此 見雖少偏, 轉得清明。 (排比 然不爲無 而 目 爲斌 鋪 他 張

傳, 府。 體。 後來摹 言之長篇 其 寅恪案, 史詩之名, 生緣之文最佳 用 詞之所言, 百萬言 大抵 復未 寅恪 自以 心 如再生緣之文, 擬 可 以推見也。(可參拙著元白詩箋證稿新樂府章。)彈詞之文體即是七言排律 能 香 E 吟之體 符合當 用 微之惜抱之論 四十年前常 製。 則較 五言 取再生緣之書, Ш 然止就文體立論, 而不知吾國亦有此體。 時情狀 故微之惜抱論少陵五言排律 如吳梅村諸 乃五言古詩, 之體 大或千言, 微之所謂 則在 讀 唐以 為便 希臘 精 矣, 吾 以供參證 國自是長篇七言排 後則多 人之七言長篇, 梵文諸史 次猶數 鋪陳終始 此 茲不 而新樂府則改用七言, 實未有差異。 不待詳 改用 必 其 百 外國史詩中 再 詩 者, 故噤不敢發。 七言。 加引 論者也。 原文, 排 比 更不可同 亦可 者, 申 聲 律之佳詩。 彈詞之書,其文詞之卑劣者, 蓋 頗怪 ,亦可以取之以論彈 韻一, 適用 以 職是 宗教哲學之思想, 吾 論 或 其文體與 之故 荏苒數十年, 年 微之惜抱之説 且間以三言, 語言文字逐 杜 屬對 詩。 Thi 在外國 語 律切」, 矣。 白 然觀 彈詞 香山 世 亦與諸 漸 吾 不異。 實足 其精 人往 也。 詞之文。 或 遲至暮齒 蘄 於作秦中 由 佛 短 求 深博 當之 彈詞 往震矜於天 長篇史詩 簡 經 適應於當時 然當 翻 而 又白 無愧 吟外 譯, 固不足論。若其 大, 之作品 趨 時 始為之一吐 於 尚 雖 香山之樂府 其 長 丛 至少 遠 不免拘於俗 而 頗 更 煩 偈 民間 希 而 別 勝 义 多 頌 同 於 臘 詞 間 作 宗 在 歌 及西 鄙 六朝 吾 佳 官 國

成

編隘

而意緒

或反不逮

晰

不顧當世及後來通人之訕笑也

繫乎其 天同 即 天 儞 篇 抑 重 更有 之君 在於是。 為長篇 耳之尚在」。 幅 古 語 以失去政權資格之人,而欲建立繼 雖 甚 與 左袒之心 既悉數俘 其 不 餅 音 人之思想 不 口 甚長 維繫 若就 易推 儷之文遂 韻平仄之配合。 論者 吾國昔日 或非長篇 演趙: 入心, 古典今事比擬適 」兩句 趙宋四六之文言之, 但 靈 中 然有一點可以確 姓君主后妃宗室北去, 内容包涵 亦無敵於數千年之間矣。 國之文學與其 活 即足以 抵禦外 善 不為對 屬文者, 而一篇之中事理複雜者, 就吾國 盡情 侮。 事理 偶韻律所束縛。 切, 達 情事 常思用古文之法, 數千年文學史言之, 他世界諸國之文學, 一既多, 而文氣仍極通貫。又此文之發言者, 间。 當以汪彦章代皇太后告天下手書(浮溪集壹 言 固是佳句。 如此, 至 即對偶之文, 於漢 捨此僅遺之廢 承大統之君主, 本非合法, 不易立言。 若就六朝長篇駢儷之文言之, 措 家之厄十世, 詞 六朝及天水一代思想最為自 然亦以語意較顯, 其缺點最易顯著, 駢 極難, 作駢儷之文。 駢儷之文以六朝 不同之處甚多, 往往隔為兩截, 后外, 而彦章文中「 宜光 別無他人, 可藉以發言 但此種理想能具體實 武之中 所以特為當時及後世所傳 雖舉 文之不及散文, 最大原 及趙宋 其最特異之點, 中間思想脈絡 興。 當以 族 由 慮状 有 一代為最 乃先朝 叁)為第 北轅之釁 庾 公之子九 但當 故文章 子山 不能 日 被 哀江 行者 佳。 則 建立 女真 廢之 0 亦臻 為 此 南 繼 文 原 因 詞

見之真理,世人竟不知之,可謂愚 偶 莫不如是。 語 之排律駢體 職 上文已引。 韻律之詞 興亡哀痛之情 是之故, 而思想 盡成堆 鄙意以為楚生之記誦 又繫乎思想之自由靈活。 再生 砌之)與再生緣續者梁楚生第貳拾卷中自述之文,兩者之高下優劣立見。其 不離於方罫之間者, 此文可認為宋 内容繁複 緣 死句, 有以致之也。 感 一書, 於一篇之中 即有真實情感, 在彈 如彈詞之體者 廣博,雖或勝於端生,而端生之思想自由,則遠過於楚生。 四六體中之冠也。 故此等之文,必思想自由靈活之人始得為之。 故無自由之思想 詞體中, 便能操筆成篇也。 今觀陳端生再生緣第壹柒卷中自序之文, 不可及矣。 能融化 所以獨勝者, 亦墮世俗之見矣。 苟無靈活自由之思想, 貫徹, 庾汪 則無優美之文學, 兩文之詞藻固 而其所以能運用此情 實由 不獨梁氏 於端生之自由活潑思 甚 優美, 以運 舉此 如 是, 用貫通 感, 其不可 例, 其 融 非 他如 於其間 可概 化 及之處, 想 通 貫通 邱 常 能 其 心 I 所以 餘。 如輩 運 則千言萬 撰述長篇 於駢 無 實在 用 所 至此 此 其 阳 兀 儷 滯

今不能 袁簡 端生再生緣之文如此, 齋在乾隆時 確 雖 言。 載 陳 頗疑再生 句 Ш 為最喜標榜閨閣 陳長生之詩 一緣中, 則平日之詩文亦非凡俗, 其對句之佳者 而絶 詩詞之人,而其所編著之隨園詩 不及端 如第壹柒卷首節中「隔牆紅杏飛晴雪, 生 可以推見。借其 字, **豈出** 於長生之不願 所著繪影閣集, 話 隨園女弟子詩及同人集 抑或簡齋之不敢 無 映榻高槐 字遺

生詩 覆晚 П 再生緣第壹 繪影繪聲 知 不 生緣第叁卷第拾回中,描寫孟 或 烟, 選 附詩 姑記 其 則 織素圖及桂馨圖(可參吳昌綬松鄰遺集陸題 二之成 午繡 於此 話。 陸 撰 是 老第陸叁回太后命孟麗君畫送子觀音 著 繪 彈詞 影閣 語)等之記 倦來還 更俟詳考。 有 小説 集尚 關 整 載 線, 而長生之集名繪聲 存 流傳, 描寫 一二於天壤間 論陳端生事蹟之可考見 春茶 人物,「惟妙惟肖」之意有關。 麗君自畫其像 則長生之工畫 試罷 更添 閣 泉」之類 亦可謂 一節, 即從其姊之集名而 由 不幸中 於葉紹楏之漸染, 一節。)前引長生寄外詩 桂馨圖後及徐世 者及其撰著 生動 即取 詳盡, 之幸 繪影 又或端生自身亦工繪 也。 閣 再生緣 乃所以反映己身者耶 集中 來, 至於繪影閣之取名 昌晚晴簃詩 或受其 早年詩 本 古 末, 不 一待論。 云年來心 並略論: 姊之影 句足成。 淮 壹 畫 然「繪影」 響 捌 其 、思 若此 事託 伍 觀 (可 陳 自與 俱 其 想 長 不 於 推

洪 録 皆流傳。 古春軒 梁德繩 伍 叁並 il 詩鈔首及閔爾昌編碑傳集補伍玖列女壹。)其所著古春軒詩鈔上下兩卷及卷後所附 專論其續撰再生緣 徐世 (參徐乃昌小檀樂室彙刻閨秀詞第壹集第柒種梁德繩古春軒 昌 正之孫女,梁敦書之女, 晚 晴 移詩 事。 匯壹捌 但德繩之性格及其家庭環境、 陸 所 選 許宗彦之室。 梁德 繩詩。)今此文關 其生平 事蹟詳見阮元所著梁恭人傳。 於德繩之事 夫婦關係等與端生頗異, 詞 又潘 蹟及著述均 衍 桐 兩 不 浙 此文遂 多所旁 輶 軒 詞 見 續 亦

構

文詞

既

竟

茲請論

再生緣續撰者梁德繩之事蹟

及其

所撰之續

本於下

亦不得不於此三事略加討論,以其有關再生緣原本及續本之特點故也。

今再 辨之便利 生緣共二十卷, 但續者為何人及何時所續, 節録之於此。 其第壹捌卷至第貳拾卷為續前十七卷之作,此續者於第壹捌卷首即)略云: 則有考論之必要。陳文述西泠閨詠壹伍(前文已引, 但因論

生、梁楚生夫婦爲足成之,稱完璧焉。 寄别鳳離鸞之感。曰,壻不歸,此書無完全之日也。壻遇赦歸,未至家,而□□死。許周 」撰再生緣南詞, 託名女子勵明堂,男裝應試及第,爲宰相, 與夫同朝, 而不合併,

合併」, 知端 此 據陳氏所言, 大不可通者也。 生撰成再生緣第壹陸卷時, 則端生必無預知其夫壻有戍邊之事, 再生緣中酈明堂與夫同朝,而不合併,乃端生所以寄其 又據續再生緣者,於第貳拾卷末節(前文已詳引, 尚未適范氏。 何從在十年之前即寄其後日「別鳳離鸞之感 今觀此卷所述孟麗君、 茲節録之。 皇甫少華亦已「同 「別鳳離鸞之感」者。)略云: 朝 耶? 而

遣, 我亦緣慳甘茹苦,悠悠卅載悟前緣。有感再生緣作者,半途而廢了生前。偶然涉筆閒消 巧續人間未了緣。

則 再生緣者, 是續者明言在其夫已死之後,有感於陳端生「別鳳離鸞」之遭遇,而續再生緣也。文述既言續 為許周生與梁楚生夫婦二人,則楚生何得於周生未死之前,預有此感?周生豈亦於

之緣起,實由於其壻范某之遺戍。(二)周生、楚生夫婦共續此書。至於此書之原作者為端生 人之著述外, 續之者為楚生,則殊不誤。不但不誤,吾人今日得知再生緣之原作者及續作者姓名, 妄,不過文述自身實未嘗詳察再生緣全書內容,故有上述兩種錯誤,即:(一)誤以為端生作書 全不可信乎?是又不然。蓋文述之言, 即書明湖飲餞圖後」,可以參證。此詩疑是嘉慶十七年楚生寓杭州時所作。)所傳必 (古春軒詩鈔上有五古一篇, 尚未見其他記載一 早為其妻作寄感之預備, 及斯事。觀於此點, 文述實有大功, 不可湮没者也。 題為「小韞甥女于歸吳門,以其愛詩 乃依據其媳汪端傳述而來, 端為楚生姊之女, 又少養於 而相與共續此書耶?此又大不可通者也。然則文述之言 為吟五百八十字送 捨文述 非虚

今刻本再生緣首載有序文略云:

楚生續再生緣之年代, 及此書之初刻在何年,

兩點頗成問題。

茲略論之於下。

道光元年季秋上浣日書。 再生緣傳鈔數十載,尚無鎸本。因惜作者苦思,删繁撮要。

香葉閣主人稿。

茲不詳考,惟此序實有兩點可疑。(一)依序所言,則今刻本已經侯芝所刪節。 香葉閣主人乃侯芝之別號, (参譚 正璧中國女性文學史第柒章第 伍節。)其 但今所見再生緣 事 蹟及著述

中必論及此點,斯可以默證推知者。若果為二十卷本之全書,則序文所署之年月為不可通。據 之刻本,其中脱誤顛倒之處頗多,當是由於抄寫不慎所致。若侯香葉果有刪削之事,恐不至前 再生緣,雖未明言為十七卷,抑或二十卷,但依其文氣言之,則似為二十卷本之全書。否則序 後文句不相連貫一至於此。然則依據今本實不能確證此書曾經刪削一過也。(二)此序中所言之

夫人梁氏,内閣大學士諱詩正諡文莊公孫女、工部侍郎諱敦書女。 [嘉慶]二十三年十二月廿二日卒。其生以乾隆三十三年正月初一日子時,春秋五十有一。

陳壽祺左海文集壹拾許君(宗彦)墓誌銘略云:

梁德繩古春軒詩鈔首載阮元撰梁恭人傳(參閱爾昌碑傳集補伍玖。)略云: 卯時,卒於道光丁未年(二十七年)三月初八日子時,年七十有七。距駕部下世已三十載 不禄。[子]延縠旋寓書於予,乞爲[恭人]傳。恭人生於乾隆辛卯年(三十六年)十月初五日 事,甫三月,以親老乞歸,不復仕。家事悉弗問,皆恭人主之。以故駕部益得覃研經史疑 予同舉[乾隆五十一年] 丙午科鄉試。[嘉慶四年] 己未科會試,駕部甫成進士。既分部視 恭人姓梁氏 矣。女三,長殤,次適海陽孫氏,三即余五(寅恪案,許宗彦鑑止水齋集首載阮元撰浙儒 義,兼精於天文算法。杜門却掃,優游林泉者,凡二十載。歲戊寅(嘉慶二十三年)駕部又 名德繩,號楚生。兵部車駕司主事德清周生許君宗彦配也。駕部年十九,與

許君 積卿傳云:「女子子三,延錦適元之子福。」則「五」字疑是「之」字之誤。)子婦。

然則嘉慶 再生緣第貳拾卷第柒柒回首節中,楚生自述其續此書之動機 二十三年周生死時,其年為五十一,而此年楚生為四十八歲也。 Z.

嗟我年近將花甲,二十年來未抱孫。藉此解頤圖吉兆,虚文紙上亦歡欣。

生五十七,「年近將花甲」之語似尚可通。至於楚生於再生緣第貳拾卷第捌拾回末節,感傷 見再生緣最初最佳之本,不敢確言。陳文述西泠閨詠自序題「道光丁亥」,即道光七年。此年楚 生之遭遇, 因自述其與周生之關係 不能比美於端生之原書也。若道光元年香葉閣主人作序時, 則楚生僅五十一歲, 斷不可言「年 是楚生續此書時,其年將近六十歲,以如是年老婦人望孫之俗見,而續再生緣, 近將花甲」。 故香葉閣主人序中「道光元年」之「元」字如非「九」字之譌,則必是書賈偽託。今未 宜其所續者,

我亦緣慳甘茹苦,悠悠卅載悟前緣。

了一番事業」, 所以表示其感傷之意也。至阮伯元作楚生傳, 謂楚生之卒距其夫之卒為三十年, 謂己身與周生有三十年夫婦姻緣之分。據上引玉釧緣第叁壹卷末載「謝玉輝在大元年間,又 一番事業, 深惜端生無「三十年」之緣,己身雖有「三十年」之緣,而周生又未能如謝玉輝之「幹 與(鄭)如昭 (陳)芳素做了三十年恩愛夫妻,才歸仙位」,楚生殆有感於「三十年」

白

餘歲,而文述不得在道光七年,即楚生五十七歲時,預知楚生之續再生緣也。「卅載悟前緣」之 即寡居三十年之意。與楚生「悠悠卅載悟前緣」之語無涉。否則楚生續再生緣時,其年必已七十

易滋誤解, 因並附辨之如此

楚生嘗於再生緣第貳拾卷第捌拾回內,借皇甫敬之言斥孟麗君之驕傲, 為然之意,前文已論之矣。今再節録此回中皇甫敬批評蘇映雪及劉燕玉之語, 即 所以暗 以見楚生之性格 示不以陳 端生

及其理想如

皇甫敬評蘇映雪云: 太王爺(指皇甫敬),又云梁氏東宮媳,他是天真爛漫人。毫無半點來裝飾,賢良温厚性和

(蓋楚生心中以蘇映雪自比, 楚生為人諒亦「賢良溫厚性和平」, 與端生之性格驕傲 激烈者,

皆以文學科第顯著,但梁許兩家經濟狀況,則與陳句山家之清貧者不同。觀王昶春融堂叁捌陳 此 浙江最有名之家族。 成對比也。 山先生紫竹山房詩文集序中: 此點恐非盡由於天生之性質所致,當亦因所處家庭環境不 儒林外史所言之婁公子家,或即指梁氏。楚生家及周生家,與端生家,雖 同使然。 德清梁氏為當時

入其家,衡門兩版,凝塵滿席,不知爲列卿之尊,與京兆之雄駿也。

傳。)而兼名士。 楚生父之昆弟輩如同書,己身昆弟輩如玉繩,皆以學問藝術知名當世。周生亦年十九已中式鄉 拾。)似其夫家經濟當亦不寬裕。否則其夫不致以圖利嫌疑之故,坐科場代倩作弊獲罪 梁侍講同書來朝慶[萬壽]節條及詩集壹貳述夢紀事詩「埋石得周梁,自誌求其書」句下自注云: 皇甫敬評劉燕玉云: 家庭環境頗不相同。兩人性格之驕激謙和,實受環境影響,無可致疑也。 撰范公璨神道碑云,「潔清之操, 少司馬周煌,侍講梁同書」,又梁玉繩清白士集貳陸送陳句山太僕還朝及輓陳太僕詩等。)而 且為貴公子,(周生父祖京仕至廣東布政使,見鑑止水齋集首所附蔡之定撰許君周生家 即 又有通家之誼,(可參紫竹山房詩文集首所附陳句山先生年譜乾隆三十五年庚 可推知端生未嫁時家庭之清貧。即適范某之後, 假定范某即范璨之子范菼, 其親家復是清代第一達官而兼名儒之阮芸臺。 晚節彌勵,菜羹蔬食,不異貧寒」,(見上引陸燿 故端生楚生兩 人 雖俱出自浙 切 則據陸燿 也。 問齋集 寅下,

回頭 連唤西宫媳, 莫須憂慮不懷姙。你爲 玲瓏幸喜多忠厚, 略有三分徒(寅恪案,

疑當作一好。)忌心。 這點小疵磨琢去, 何愁日後少收成

文集壹拾許君(宗彦)墓誌銘略云: 可知楚生心中以為不妒忌, 始能生子, 此亦所以自比並兼以屬望於其子婦者也。 據陳壽祺左海

女三,梁夫人出者二。長適原任監察御史孫球子承勳,次適現任兩廣總督阮元子福。 夫人梁氏, 生子延敬、 延縠。簉吴氏,先卒,生子兆奎、延宷、延澤。陳氏,生子延凱。

氏生女一,字現任翰林院侍讀學士胡敬子琮。

子婦之意, 並一發其「二十年來未抱孫」之牢騷也。雖然, 今觀古春軒詞蒼梧謠序云: 是周生至少有三妾,且均生子女。楚生亦生子女數人也。周生之妾既有多人,似足證楚生之不 楚生己身又生數子, 此事在楚生心中, 乃其不妒之善果, 遂藉續再生緣之書, 以寓 其

周生意有所惑,作此戲之。

燕玉 則楚生於此猶未能忘懷。不妒之古訓, 比之子婦耶 且以教人。 但臨事觸發, 不覺流露。可見其為勉強抑制, 非出自然, 固為習聞詩禮之教如楚生者,深所服膺,平日以此自 又何必以此責難於劉

君初期本為蘇映雪即梁素華之夫,蓋取梁鴻、孟光夫婦之姓,反轉互易,而梁素華及皇甫少華 蘇映雪性情柔順,為最合理想之婦女。孟麗君適與相反,固所不取。殊不知在端生書中, 尚未適人,但關於夫為妻綱之説,既力加排斥,上文已略論及,茲不復贅。所可笑者,楚生以 乃此教條下之信徒,既行之於身,復出之於口,更筆之於書矣。 夫為男子者, 可畜多妾, 而婦人則不應妒忌,此男尊女卑,吾國傳統夫為妻綱之教條也。 至若端生, 其作再 生緣時 孟麗 楚生 雖

詩, 周生往來酬唱之作,誠可以比美梁孟矣。但一檢周生鑑止水齋集貳所載答內詩,後附楚生寄外 為妻綱之古訓,楚生乃嘖嘖稱賞蘇映雪不置, 兩人名中「素」「少」二字音又相近。此雖為才女顛倒陰陽之戲筆,然可見其不服膺男尊女卑, 楚生之詩, 文句煩多, 情感深摯, 而周生答以寥寥五十四字之短篇云: 恐端生地下有靈, 亦當不覺失笑也。 又觀楚生與 夫

遠離且莫悲, 關與織女。 隔以銀河 遠歸亦勿喜。 萬八千里。 暫離復見偶然爾。世事紛紛那免此。勸君勿墮迷雲裏。不見天 脈脈相看不得語。

又同 書同 卷所載望夫岡 七古結語 云

誰能 無事輕離别 倦倚孤篷亦頗看。

之若命矣 則 周 生與楚生之情感, 已可推見。然於服膺男尊女卑,夫為妻綱之説者,固亦無可如何, 而安

生不同 至於端生之壻范某,假定即是范璨之子, 生所為者, 當無廣畜姬妾之能力, 端生一生中 則端生亦將表現其本來面 目 雖為貴公子, 然家境清寒, 亦等於 如孟 諒亦無楚生此種環境及不快之情感。 麗君也。觀再生緣第壹伍卷第伍 窮書生, 捌 假使范某而 口 與許 周

忠孝王(指皇甫少華)背靠床欄笑幾聲。 果然如此,也是孟府的家風了。

厝

岳母大人手段凶,自然他,所生之女亦相同。麗君若是同其母,少華也, 只好低頭效岳

翁。懼內名兒逃不去,能得個,重偕伉儷靠天公。

復如孟府之以懼內著聞。此為端生大膽之筆,而楚生掩耳所不敢聞者。合兩種性格絕殊之女作 可為例證。 完成一書, 取相比較, 既可觀, 然則端生之意, 不僅欲己身如孟麗君, 亦欲其母汪氏如韓氏。竟使陳句山之家風 抑可笑矣。

依據甚不完全之材料,考證陳端生之事蹟及著作,並略論梁德繩之有關於再生緣諸點既竟,請

述寅恪讀此書之別感如下。

有清一代,乾隆朝最稱承平之世。然陳端生以絕代才華之女子,竟憔悴憂傷而死,身名湮没, 變起,寅恪時寓燕郊清華園,曾和陶然亭壁間清光緒時女子所題詠丁香花絶句云: 者, 則為端生於再生緣第壹柒卷第陸伍回中, 「豈是蚤為今日讖」一語。二十餘年前, 幸而為男」(見述學別録)。 年後, (汪中生於乾隆九年, 其事蹟幾不可考見。江都汪中者,有清中葉極負盛名之文士,而又與端生生值同時 卒於乾隆五十九年。)作弔馬守真文,以寓自傷之意, 今觀端生之遭遇,容甫之言其在當日, 信有徵矣。 然寅恪所感 調樂期一 九 八事

故國遥山入夢青,江關客感到江亭。(沈乙厂先生海日樓集陶然亭詩云:「江亭不關江,偏 感江關客。」)不須更寫丁香句,轉怕流鸞隔世聽。

鍾阜徒聞蔣骨青,(蔣子文「骨青」事出干寶搜神記。 今通行本干書 青」字多誤寫, 不足據

詩成數年後,果有蘆溝橋之變。流轉西南,致喪兩目,此數年間,亦頗作詩,以誌一時之感 也。)也無人對泣新亭。南朝舊史皆平話, 說與趙家莊裏聽。

三首於下:

蒙自南湖作

事, 景物居然似舊京,荷花海子憶昇平。橋頭鬢影還明滅,樓外笙歌雜醉酲。南渡自應思往 讖」耶?噫!)黄河難塞黄金盡,日暮人間幾萬程。 北歸端恐待來生。(寅恪案,十六年前作此詩,句中竟有端生之名,「豈是蚤爲今日

昆明翠湖書所見

照影橋邊駐小車,新妝依約想京華。短圍貂褶稱腰細,密卷螺雲映額斜。赤縣塵昏人换 翠湖春好燕移家。昆明殘劫灰飛盡,聊與胡僧話落花。

詠成都華西壩

淺草方場廣陌通, 花羞翻訝漢妝紅。誰知萬國同歡地,却在山河破碎中。 小渠高柳思無窮。雷車乍過浮香霧,電笑微聞送遠風。 酒醉不妨胡舞

自是求醫萬里,乞食多門。務觀趙莊之語,竟「蚤為今日讖」矣。求醫英倫時作二詩,録之於

乙酉冬夜卧病英倫醫院,聽人讀熊式一君著英文小說名「天橋」者,中述光緒戊戌李提 摩太上書事。憶壬寅春隨先兄師曾等東遊日本,遇李教士於上海。教士作華語曰:

「君等世家子弟, 能東遊, 甚善。 」故詩中及之,非敢以烏衣故事自況也。

沈沈夜漏絶塵譁,聽讀佉盧百感加。故國華胥猶記夢,舊時王謝早無家。文章瀛海娱衰

病,消息神州競鼓笳。萬里乾坤迷去住,詞人終古泣天涯。

丙戌春以治目疾無效, 將離倫敦返國暫居江寧, 感賦。

金粉南朝是舊遊,徐妃半面足風流。蒼天已死三千歲,青骨成神二十秋。去國欲枯雙目 浮家虚説五湖舟。英倫燈火高樓夜,傷别傷春更白頭。

樂啟期之樂未解其何樂,汪容甫之幸亦不知其何幸也。偶聽讀再生緣,深感陳端生之身世,因 又所至感者,則衰病流離,撰文授學,身雖同於趙莊負鼓之盲翁,事則等於廣州彈絃之瞽女。 草此文,並賦兩詩,附於篇末,後之覽者儻亦有感於斯歟?

知者久,浙江一省徧相傳。髫年戲筆殊堪笑,反勝那,淪落文章不值錢」之語,及陳 癸巳秋夜,聽讀清乾隆時錢唐才女陳端生所著再生緣第壹柒卷第陸伍回中「惟是此書

/西泠閨詠第壹伍卷繪影閣詠家□□詩「從古才人易淪謫,悔教夫壻覓封 侯之句

地變天荒總未知,獨聽鳳紙寫相思。高樓秋夜燈前淚,異代春閨夢裏詞。絶世才華偏命 戍邊離恨更歸遲。文章我自甘淪落, 不覓封侯但覓詩。

寂, 卷悲吟墨尚 青丘金鼓又振振。 述清代光宣以來事, 新, 當時恩怨久成塵。上清自昔傷淪謫,下里何人喻苦辛。彤管聲名終寂 (再生緣間叙争戰事。 論者比之於七字唱也。)論詩我亦彈詞體,) 悵望千秋淚濕巾。 (寅恪昔年撰王觀堂先生

論再生緣校補記

范爽「以科場事,為人牽累謫戍」,而絕口不提及雲貞寄外之書及詩以作材料,可知其始終不承 時一 聯,則雲伯所言,由於傳聞稍誤, 嘉慶初年在北京題贈陳長生四律,其於端生、慶生、長生姊妹三人之身世遭遇,皆能詳悉言 寅恪初疑 真所謂 □死」,今據長生繪聲閣續稿 陳 雲貞即陳端生,後來知其不然者, 如數家珍」。至道光時作西泠閨詠詠陳端生詩,雖詩序中謂「壻遇赦歸, 「哭春田大姊」七律二首之二「可堪寶鏡重 自應訂正。但此點所關甚小, 雖無積極之確據,但具强有力之反證。因陳 不足為意。 一圓日, 已是 唯雲伯 瑶釵欲折 未至家, 止

使紅娘、

春香、

襲人、晴雯之流,

止生之楊宛叔,

薛文起之香菱,以達其最高享受之理想。此真所謂遊戲文章,斷不可視為史鑑

變作鄭康成之詩婢, 錢受之之柳如是, 許公實之王修微,

月。 留 相似之處。至於里堂之「雲貞行」及雲伯之「雲貞曲」中俱有「郎戍伊犁城,妾住仙游縣」之句 生再生緣中自述其夫之語,如「更欣夫壻是儒冠。挑燈伴讀茶聲沸, 好事之人故作狡獪,偽造新骨董,自極可能。至蓮姐之詩,尤為偽中之偽。蓋無聊文士, 兩人俱無抄襲之嫌疑也。若夫雲貞寄外書及詩,頗與再生緣類似, 由二人同用一材料,自然符會,不必出於抄襲。茲舉最近之例言之。抗日戰爭之際, 一而一」,亦太奇矣!況焦循「雲貞行」謂其夫乃一「郎本武健兒」及「一發斃雙狼」之武 雲貞 殊不知同一時代之作品,受環境影響,其格調本易相近。且再生緣一書, 百五 是時烽火連天, 京 師 與端生為 十餘年前同時同族之人,既堅決不認雲貞、端生為一人, 主講輔仁大學。寅恪則旅寄昆明, 一人也。 互不通問,然其結論則不謀而合, 任教西南聯合大學。各撰論文, 考楊妃入道年 實以同用 材料 論者遂取此 而今日反欲效方密之之「合 刻燭催詩笑語聯」者, 應有 同 為一合二而 當日已甚 之結論, ,陳垣先生 流 與 之

又沈敦三垚落帆樓文集玖外集叁簡札摭存中「與許海樵旦復」三十二通之十三云:

知人情物理,以蕩子不歸擬垚,既視垚太淺,欲以區區村婢縻垚,而不知縻之適所以緩 今春將甲午年積負一清,私心竊自喜,以爲今後可歸見江東故人。不意山妻復有納妾之 致再積百餘金之債。 此事孟浪已極,接信之後,不勝大駭。垚之親戚目不覩史策,不

回書卷首附汪剛木曰楨「沈子惇著述總録」略云:

生於嘉慶[三年]戊午,卒於道光[二十年]庚子。四十三歲。 沈垚字敦三,號子惇。浙江湖州府烏程縣人。府學廩生。道光[十四年]甲午優貢生。子惇

此社會階層之習俗影響所致,殊不足怪也 選者會稽錢三錫,亦是子惇及其妻金氏之同時人。偽作之雲貞寄外書及蓮姐寄外詩, 觀之,雖覺可憐可笑。但就此一端,足見當時浙江不得志文人,家庭風氣之一斑。粧樓摘艷 寅恪案,子惇為嘉道間人。其妻金氏,以夫久不歸家,特買一婢,預作將來之妾侍。吾人今日 皆受當時

今檢沈畏齋樹德慈壽堂文鈔伍范太學傳略云:

開府河北,招余。余乃得與君交。君於詩文,每刻苦不作猶人語。越來春(指九年甲子。 空公奇愛之。君天性孝友,伯兄[卒],君痛伯無子,以長子嗣之。乾隆[八年]癸亥春,公 君姓范氏,諱菱,字惇哉。國學生。秀水少司空仲子也。少穎悟,能屬文,出語傑特。

卯年(五十年)某月日,卒於乾隆乙丑年(十年)五月十五日,存年三十五歲。配趙氏, 遷工部,余出賀公。是時君方得脾疾。余在[澄懷]園得計,不禁悲哭失聲。君生於康熙辛 太夫人後至。公入補府憲,仍館余於邸。及君至,而余應桐城相國(張廷玉)招 將赴秋闡,乃偕余治舉子業。秋試,同赴武林。明春(指十年乙丑。)余幸計偕 以去。 泊公

光緒修歸安縣志叁貳選舉門貢生欄乾隆六年辛酉條載: 三,培、堦、臺。培嗣伯氏。

拔貢。字申培。是科副榜。甲子舉人。

寅恪案,取沈氏此傳,與陸燿撰范璨神道碑相比較,令人如墜五里霧中,疑竇百端。 茲先舉其

塏。墀又姻也。」沈氏文云:「子男三,培、堦、臺。培嗣伯氏。」璨孫三人,雖兩文皆從土旁· 既為陸燿之壻,又為請陸氏作其祖神道碑之人,故陸文所列三人次序,必無差誤。沈文列培為 長。嗣伯氏。「墀」與「堦」同義,應作「堦」為長。夫長子通例不出繼,何以長子出繼 但何以盡不相同?其改名之由,究因何故?即令前後有所改易,亦不致三人全改。且「培」與 幕客, 與菼交好。兩氏之文, 何以互異如是?此可疑者一也。陸氏文云:「孫三人, 墀、城、 可疑之點,後作假定之解釋。陸氏為范璨之姻親,又為同里後學。沈氏亦范璨同里, 城」,「堦」與「墀」,「臺」與「塏」,意義近似,實無更改之必要。又陸文「墀」為長,沈文「培」為 儀薰。且墀 又曾為其

沈氏為菼作傳, 陸文既 此可疑者二也。 不稱「文學」而稱「太學」。此可疑者三也。茲試作解釋如 稱 菼為 貢生, 陸文云:「子二人,儀薰, 則菼死時之資格為優貢或拔貢 國子監生。菱,貢生。」而沈文題作「范 無疑。 國子監生又無追贈貢生之理。 下

關, 卒於乾隆十年者, 恐因欲洗刷菼曾居樂志堂之痕跡, 指趙氏之次子及己身之子言, 元配。培、 適范菼時, (一)以通常事理言之,陸、沈兩文作成之先後, 一詳悉之傳,以證明其非犯罪之范菼。此沈文中菼之生卒年月及享年之數,自不可信。 則同一用心。既欲解脱與科場案之關係, 止言菼先璨死, 蓋其後有關樂志堂之記載, ,年二十三。菼年當已四十餘矣。故寅恪疑端生為繼室。沈文言「配趙氏」,當為菼之 堦當為趙氏所出。 而趙氏所生,出繼伯氏之子及己身之女不計在內也。 臺即端生子蓉洲敷?再生緣中端生自言「强撫雙兒志自堅」,恐是 如范來庚南潯志樂志堂條及下引董襄於嘉慶七年所作之詩 雖頗難考知, 遂改其卒年為乾隆十年, 尚嫌不足。 但欲解脱范璨與科場案之范菼有 故必須別有 即樂志堂尚 至沈文謂 人 未建 為 炎

繼伯氏, (二) 菱子三人改名之由 或者亦與科舉有關, ,雖不能確言,恐因科舉制度,改名可免發生枝節問題耶?其以長子出 並可藉此為陸燿開脱與菼之關係也。至三人名次之異,當為沈氏

可免與惇哉有所關涉也。

誤

記耳。

(三)據乾隆四十五年刑部提本陳七供詞中,菼為「宛平縣監生」,故沈文據此稱之為「太學」。 頗

疑端生之夫范菼,在浙江已取得貢生資格,故陸文稱之為貢生。但因應順天鄉試, 遂入宛平縣

籍,納粟為國子監生。陸、沈二氏撰文互有差異,遂遺此漏隙也。

又沈文盛稱范菼之穎悟,擅長詩文。此與端生述其夫「刻燭催詩笑語聯」之言符合,益可證下論

陳七供詞中范菼倩人作詩文之説為誣枉矣。

復次,周慶雲纂南潯志玖宅第門壹「樂志堂」條,後附董襄「人日集范野苹樂志堂, 澹人原韻」(題下自注「壬戌」),其「酒壘分兄弟」句下原注云: 即席次令兄

座上惟范氏昆仲及余兄弟三人。

百 書貳柒選舉門舉人欄載:

乾隆四十八年癸卯。董一經。字寶傳。號韋莊。一號韋齊。嵊縣訓導。 嘉慶六年辛酉。董應椿。

一經子。字冠英。號雲帆。

書貳伍列女門貳「張氏」條云: 一經子。應椿弟。宛平籍。順天中式。字念喬。號苕庵。

口

嘉慶十二年丁卯。董襄。

舉人董襄妾。道光[三年]癸未襄卒。

論

再

生

寅恪案,樂志堂條最可注意者,為詩題下自注之「壬戌」二字。檢乾隆七年歲次壬戌,嘉慶七年

燿之壻范墀。 小雅鹿鳴篇「食野之苹」句。「野苹」二字,與其人本名之關係,頗難揣測。或是范璨之孫,即陸 既是嘉慶七年,則此樂志堂主人野苹,果為何人?但其人既姓范,「野苹」之稱,自是出於詩經 亦歲次王戌。董詩題下之壬戌,必非乾隆七年,而是嘉慶七年。蓋乾隆七年尚無樂志堂故也。 但墀為長孫,必無「澹人」之親兄,是亦不可能也。若非墀者,則「城」「塏」二字,

又據毛詩正義叁之貳碩人篇「葭菼揭揭」句略云:

不能與「野苹」相關聯,則其人捨范菼莫屬。嘉慶七年壬戌,菼當尚在人間也。

葭蘆菱薍。釋草文。李巡曰,分别葦類之異名。郭璞曰,蘆,葦也。 薍似葦而小。大車傳 曰,荚,雕也。蘆之初生也。則毛意以葭菼爲一草也。陸機(璣)云,薍或謂之荻。 則謂之萑。其初生三月中,其心挺出,其下本大如箸,上鋭而細。揚州人謂之馬尾。 至秋堅

以今語驗之,則蘆薍别草也。

郭璞曰,菼草色如騅,在青白之間。書肆之壹大車篇「毳衣如菼」句云:

同

同書捌之壹七月篇「八月萑葦」句云:

[萑葦]二草。初生者爲菱,長大爲薍,成則名爲萑。初生爲葭,長大爲蘆,成則名爲葦。 小大之異名,故云,蔵爲萑,葭爲葦。此對文耳,散則通矣。

大者爲蘋,是水中之草。召南採蘋云,於以採蘋,南澗之濱者也。非鹿所食,故不從之。 白色,莖似箸而輕脆。始生香,可生食,又可蒸食,是也。易傳者,爾雅云,苹,蓱,其 箋: 苹, 藾蕭。正義曰, 釋草文。郭璞曰, 今藾蒿也。初生亦可食。陸機(璣)疏云, 葉青 李貴答賈政云,「哥兒已經念到第三本詩經,什麽攸攸鹿鳴,荷葉浮萍。小的不敢撒謊」之 (寅恪案,讀者苟取通行本百二十回石頭記第玖回「訓劣子李貴承申飭」所載隨寶玉上學之

吴其濬植物名實圖考壹貳隰草類「牛尾蒿」條略曰:

語相參閱,當亦與榮國府清客相公及賈政同爲之噴飯也。)

荻,郭注即蒿。李時珍本草綱目以陸疏苹爲牛尾蒿。與今本不同。 詩經「取蕭祭脂」。陸璣毛詩草木鳥獸蟲魚疏,蕭荻,今人所謂荻蒿者,是也。按爾雅蕭

同書壹肆同類「蘆」條云:

别也。 夢溪筆談以爲蘆葦是一物。藥中宜用蘆,無用荻理。然今江南之荻,通呼爲蘆,俗方殆無

此條下附毛晉詩疏廣要云:

雩婁農曰,强脆而心實者爲荻,柔纖而中虚者爲葦。澤國婦孺,瞭如菽麥。

論

再

生

稱, 學之討論此問題也。至董氏所言其兄「澹人」,或是烏程縣志范璨傳所謂「〔璨〕既貴顯 則范菼所以不用其原來「惇哉」之字,而改稱「野苹」者, 藉資掩飾敷?但斯乃昔人取義於經典訓詁而改易其稱謂。吾人今日自不必就植物分類之 蓋以「苹」與「菼」有類似之處, 讓宅於 遂取此 科

從父兄弟」之兄弟所出者。

今俱難考知,

姑附記於此

以供談

助

賦二 車桂嶺青山暮,畫舫蓮莊碧浪遙」一聯,「桂嶺」自指桂林,「蓮莊」與「畫舫」「碧浪」連文, 至家而口 今得見嘉慶二十二年丁丑重刊織雲樓合刻中陳長生繪聲閣續集有「喜蓉洲甥至京, 湖州府歸安縣之蓮花莊。 題,(此集流傳甚少,陳文述當亦未得見, □死」之誤也。)則端生之子字「蓉洲」無疑。 考乾隆修湖州府志捌古蹟門歸安縣「蓮花莊」條云 否則其詠繪影閣詩、 據西冷閨詠「繪聲閣詠家秋穀 自不致有 壻 二七律. 遇 有懷亡姊感 赦 中香 則是

蓮花莊在府治東南, 縣學南。 縣志: 元趙子昂别業。 四面陂水環繞, 水中多蓮, 絶爲幽

勝

此條下引明釋宗泐詩云:

洲渚緑縈迴,芙蓉面面開。

城傍秋水古横塘,四面蓮花學士莊。

及朱長春詩云:

]同義。古之所謂芙蓉,即荷花。鄭善果所謂[六郎面似蓮花]與白香山長恨歌[芙蓉如 趙松雪之蓮花莊建築於陂水環繞之地, 其地必是高出陂水, 即所謂洲渚者。(「蓮花」

以表示仰慕鄉里先賢之意也。 皆可為證,而非石頭記「芙蓉女兒誄」之木芙蓉也。)然則「蓉洲」之稱,始由於此,所

據上文所論,知暟為菼之少子。「塏」字之訓,依左傳昭公三年「初,齊景公欲更晏子之宅」條

爽,明。塏,燥。

請更諸爽塏者」句, 杜預注云:

孔穎達正義云:

造,高地,故爲燥。

甲第 之年齡雖高於陳兆崙,但陳氏稱范氏為「前輩」,乃就登科先後次第而言,非世俗口語所謂「前 最近人稱謂之一例。如文廷式雲起軒詞中稱李盛鐸為「前輩」。因李氏為光緒十五年己丑科第 為塏,實相關聯。若鄙説不誤,益可證科場案中之范菼,即范璨之子也。茲更有可言者,范璨 由是言之,趙松雪之蓮花莊,建築於陂水中高出於陂水之洲渚上。端生之子既字蓉洲,與其 晚輩」之義。若真為世俗口語之「前輩」,則在近代文言應稱為「父執行」,或「某丈」。試舉 二名進士, 而文氏為光緒十六年庚寅科第一甲第二名進士。可證「前輩」之稱乃登科次第,

非年 监公 高 也。 憶昔清 宣 統 間, 王豐 運 以 舉 人賜翰林院檢討, 同時名醫徐景明博士亦賜牙科進

士。湘綺戲作七律解嘲,其一聯云:

已無齒録稱前輩,賴有牙科步後塵。

又端生雖屢次由湖州歸寧其父於杭州,但其臨逝之前,得聞范菼將由伊犁赦還,必與其子蓉洲 在湖州家中坐待 室已於光緒季年停止科舉,更無同年録之刊刻,故湘綺有「已無齒録」之言也。 且范葵赦 回時, 玉敦已死, ,自不留滯杭州,以俟其夫之至。蓋范菼既有房宅在南潯,歸後當有祭掃父墓 **麥絕不先返杭州與端生會見無疑。** 至於玉敦妾施氏可能成為

,桓公葵丘之盟「毋以妾為妻」之條文可知也。(見穀梁傳僖公九年及孟子告子章下。

且「扶正」之事,雖偶有之,然以紫竹山房理法謹嚴之家

應遵

點,

則既無文獻可徵,

詩「話到鄉關倍黯然」句之「鄉」及「鄉關」,究何確指?今據繪聲閣初稿「寄懷春田家姊」七律云: 繪聲閱續稿「哭春田大姊」二首之一「捧到鄉書意轉驚」句與同書「喜蓉洲甥至京, 有懷亡姊感賦

慈壽堂文鈔肆「竹墩村記」略云:

白蓮橋畔西風冷,紅蓼灘前夕照多。

之所蓄也。 去[湖州]郡城定勝門三十里弱, 記橋曰雙小橋。一在白蓮池西,一在白蓮池東。皆木。 有村日竹墩者, 吾沈氏家焉。 記水道 日白蓮池。 南港東流

光緒修歸安縣志捌古蹟門「紅蓼汀」條引康熙縣志云:

蘋洲對岸。 宋汪藻有調小重山 詞詠紅蓼汀。

亂點鴛鴦譜, 意就吾國昔日士大夫階級之婚姻條件言之,端生與秋塘兩家,既非孔李交遊之舊, 又無彩樓抛球之緣,元夕觀燈之遇。今論者竟為之强牽紅絲,使成嘉耦,以效法喬太守之 可知端生夫家范氏與長生夫家葉氏, 中五花洞碧波仙子等,同一神話歟?然則此一奇案, 豈不異哉 ! 豈不異哉 同在湖州。 夫浙江一省,同時竟有兩范菼, 恐包龍圖再生,亦難解決矣。鄙 林薛姑姨之

一刑部

題本略云: 關 於范菼科場獲罪一案,尚有可疑者。觀乾隆四十五年東閣大學士兼刑部事務英廉等所上

收,轉交孫三懷藏,於[八月]初九日夜四更時,正在找尋范菼等號口交遞,當被查獲。查 范菼等素未熟識,恐場中傳遞錯誤,當令范菼等於衣襟上各掛小紅包爲記, 陳七因身充謄録,冀圖重謝, 暗中認識, 記明伊等所坐號舍, 以便傳遞。入場後, 華振聲[等]所作各卷, 嗣陳七復見孫三、王五,各給銀七兩五錢,言定在場內傳遞文字。陳七又恐孫三、王五與 輒包攬多人, 僱替作文, 轉輾說合, 接受過付共銀一百二十 係王五潛往接 令孫三、王五

復敢有心將僱倩在場三人,隱匿不吐,欲令出場逸逃,實屬目無法紀。陳七應情

實。

又觀雍正修大清會典柒貳禮部壹陸貢舉壹科舉通例云:

諸士領卷尋 號時 有在號外停立者, 登時扶送監臨詰問。 坐定出題, 簾外員役不許私

今見陳七口 王五被查獲時, 然則范菼似 鄙意陳七狡猾多謀 鬼 即陳文述所謂「為人牽累 供, 一不善作四書義及試帖詩之人,與上引陳端生於再生緣中自述其夫之語,殊為不 自應更正。)藉以搪塞拷問者之刑逼,並為另一僱替之人開脱。果爾, 適在范菼號口, ,既「敢有心將僱倩在場三人,隱匿不吐,欲令出場逸逃」,或者孫三、 因隨意誣指其「僱替作文」,(寅恪前以為菼因代人作文得罪。 」者敷? 范葵乃

雯」所云:「北闡中式者,多半是關節。十八名以鈔襲成文被革,其實取中亦是關節。主司 要,主事 發覺者特百分之一二, 且其尤小小者耳。 房老改, 陳 不改,而後被御史糾也。此時 及考官等牽連,故特為隱諱。(此點可參沈垚落帆樓文集拾簡札摭存下「與 七在此案中為主犯, 僅以行第稱, '風氣, 無勢力者, 竟可不必應試。本年順天科場之弊, 以有宰相子不入場而中式之事, 而不直書其名。蓋此人真名若暴露, 故發覺者概從輕比 則 與 吳半峰汝 當 朝 本屬 顯

二字,至斯為極,無勢力者,尚求進取耶?」沈氏作此書時,為道光二十年庚子,距乾隆

四十五年科場案,適為甲子一周。可見順天鄉試積弊並未稍减。及至咸豐八年戊午順天鄉試 嚴懲主事官柏葰等之後, 其弊始革矣。)即此 至范菼善作詩, 而不善作八股文之説, 則殊不然。檢嘉慶修大清會典事例貳伍禮部門乾隆二十 端, 亦可以推知此案口供, 必非完全真實也。

一年條云:

始,於第二場經文之外,加試五言八韻唐律一首。 垂爲定制,恐諸士子會試中式後,仍未能遽合程式。應自乾隆[二十四年]已卯科鄉試爲 本年欽奉諭旨, 來各省士子,甫登賢書, 會試二場表文,改用五言八韻唐律一首。 即應會試。中式後, 例應朝考。 剔釐科場舊習,務收實效。 若非預先於鄉試時, 一體用詩

同書同卷乾隆四十七年條云:

又議定二場排律

首,

移置頭場試藝後。

其性理論一道,

移置二場經文後。

之詩頗多,蓋由於此。總之,即使范菼善於作詩, 可知自乾隆 二體之詩文。今通行本一百二十回之石頭記, 二十四年己卯以後,八股文與試帖詩同一重要。 為乾隆嘉慶間人所糅合而成者。 而不精通舉子業,如沈氏一范太學傳」所言 故應試之舉子, 無不殫竭心力, 書中試站體 專

兹有可附論者, 乾隆四十七年,議定將二場排律詩移置頭場試藝後。 故兒女英雄傳作者文康 者,亦恐不至於冒大危險,倩人代作也。

於第叁伍 此事實暗指同治三年甲子順天鄉 [回[安公子占桂苑先聲]中,述安龍媒以備卷得代,錯用官韻之馬簣山中式第陸名舉 試,而非雍正年間科場規則也

前所論范菼獲歸之年有二,而以乾隆五十五年獲歸為較可能。既得此新證, 復次,今得見繪聲閣初稿「與序堂弟泛舟西湖」,「將歸 「寄懷春田家姊」及繪聲閣續稿「哭春田大姊」等題,始知范菼實以嘉慶元年授受大典恩赦獲歸。 吳興, 呈春田家姊並留贈汪嗣徽夫人」, 自應更正

至乾隆四十五年九月二十五日刑部題本所云:

又略 又因曾與鑲黄旗滿洲筆帖式恒泰、 春泰弟兄抄寫書籍, 彼此熟識

不能禁約子弟之翰林院侍講勒善[等]革職。

印清史列傳中, 但此傳乾隆五 十八年以前之事蹟, 全不記載。又於道光十五年引見時, 更名勒福, 不見勒福傳諸端, 恐有所避忌,不能無疑。姑識於此, 以待更考。 並中華書局

似此勒善與耆獻類徵初編叁叁貳將帥門所載清國史館本傳初名勒善之勒福

李桓國朝耆獻 類徵初編壹肆貳郎署肆儲大文撰汪森墓誌銘附錢載撰汪孟鋗墓誌銘略

爲冢子娶婦, 歷官大理府知府。 其諸子女皆君於父没後爲弟昏,而嫁其妹者也。 妣祝氏。 大理四子, 君其長也。 雍正 乾隆元年丙辰君年十六,侍 乙卯爲娶婦。 蓋大理惟及

之原。[十年]乙丑大理出守,遣家歸。[十一年]丙寅大理卒於官,君奔迎柩歸,合葬於新 母從父官盛京,入官京師。[六年]辛酉母没,君扶柩携弟歸里,卜壤葬母於海鹽山茶花漾

阡。

南省志職官門雲南府知府欄,列汪上堉之名,並非偽傳,亦未可知也。 寅恪案,汪上堉雖其本缺為雲南省大理府知府,然亦有調署雲南省首府雲南府之可能。如乾隆 三十五年陸燿原任登州府知府,三十六年調山東省首府濟南府知府,即是其例。依此言之,雲

又端生之母汪氏,是否嫡出,抑或庶出,未能考知。假使為庶出,則汪氏有隨其生母侍其父汪 堉往雲南之可能, 如兒女英雄傳第貳回「沐皇恩特受河工令」略云:

是相因而至的事情,可有甚麼法兒呢?」公子便說道:「請父母只管同去,把我留在家 量。萬一得了缺,或者署事,有了衙門,老爺難道天天在家不成。别的慢講, 到這裏,但是玉格此番鄉試,是斷不能不留京的。既留下他,不能不留下太太照管他。這 的主意打算暫且不帶家眷。到了明秋,我再打發人來接家眷不遲。第一件心事,明年八月 [安]老爺開口先向着太太説道:「太太,如今咱們要作外任了。」又聽老爺往下説道:「我 ,玉格務必教他去觀觀場。」太太說:「老爺纔說的一個人兒先去的話, 衙門裏要不分出個內外來,斷乎使不得。」老爺說:「何嘗不是呢? 我也不是没想 這顆 還 得商量商 印是個

主見自然不錯,就這樣定規了罷。」 從外打發他進京鄉試,難道我合太太還能跟着他不成?」太太聽了,便向老爺說道:「老爺 裏。」老爺明決料着自己一人前去,有多少不便,便向太太道:「譬如咱們早在外任

者相同。又安老爺此時不過一候補河工令,尚未得實缺,或署事。但安太太必欲分出個內外, 以保管官印。 乾隆十二年丁卯科浙江鄉試。此點與安老爺不令安公子隨己身赴淮安,而令其留京應順天鄉試 上堉不令其子孟鋗於乾隆十年,隨己身同赴雲南,而遣家歸秀水,蓋欲孟鋗留居故里, 寅恪案, 清國子監題名碑乾隆十三年戊辰科會試,則其前一年,即乾隆十二年丁卯有鄉試。 據國朝耆獻類徵貳叁貳沈大成代撰汪上堉墓誌銘略云: 預備應 汪

配祝氏 封宜人,前卒。子孟銷、仲鈖、季鏗。其簉所生則彝銘也。

紫竹山房文集壹伍「顯考皇亭府君行述」略云:

同知日省公第五女。次玉敦,聘汪氏,現任刑部河南司郎中起巖公次女。 府君終於乾隆八年三月二十四日寅時。孫六人。長玉萬,聘吴氏,雲州知州,現任大名府

同書同卷「顯妣沈太宜人行述」略云:

大名府同知日省公第五女。 玉敦錢塘學附生, 聘汪氏, 原任刑部河南司郎中、雲南大理府 先慈終於乾隆戊辰年(十三年)六月二十四日巳時。孫男六人。玉萬太學生,娶吴氏,原任 頭記中,

不合事理者頗多, 如晴雯所補之孔雀毛裘,

乃謂出自俄羅斯國之類。

若更證以才女戴

知府起巖公女。

同書同卷「冢婦吳氏行略」略云:

[乾隆十五年] 庚午秋, 玉萬暨次兒玉敦, 忝與鄉薦。 明年正月長孫女端兒生。 次子婦出

t

雲南 歸 則是端生母汪氏,乃上堉次女。嫡配或簉室所生,固難決定,但例以安老爺以候補河工令之資 或有執石 記第壹 句 以轉告再 既 北京赴雲南, 格往淮安,安太太因安老爺無側室,故須親身隨往,以分內外。何況上堉乃實缺知府, 是上 里, 山尚有男女平等之觀念,其著作關於婦女方面,亦詳載記,否則此 似仍須攜帶少數眷屬同行。苟欲攜眷屬同行 其時年齡當在十 堉次女, 回「靈根育孕源流出」由石卵迸裂而出之孫悟空矣。呵呵! 頭記述賈政放學差及任江西糧道,王夫人、 生緣之作者。 較由北京赴淮安,交通更困難。上堉嫡配祝氏,雖已前卒,往大理前,又遣孟鋗 頗有為彝銘同母姊之可能。 所可笑者, 歲以上。 以十歲以上之女子, 沈大成代撰之汪上堉墓 依上引材料綜合推計, 自然熟悉滇省之地理風俗狀況, 則此 趙姨娘、 一誌銘, 眷屬必是彝銘之母。 周姨娘皆不隨往以相難。 絕不提及上堉有二女。 端生之母汪氏, 一代才女之母, 端生之母汪氏, 果隨父母往 竟成 故後來 若非陳 當時 鄙意石 游 H 由

言 蘋南隨其翁趙老學究赴江西學政之任, 旋没於任所一事, 尤為實例實據。足見兒女英雄傳所 , 非憑虛 臆造者也。

戴蘋南「織素圖次韻」三首之一「絕勝崔徽傅裏人」句中之「崔徽」,宋元人詩詞用此典者頗多,

44

舉數例於下,以見一斑。

蘇文忠公詩合注壹伍「和趙郎中見戲」二首之一「空唱崔徽上白樓」句下王注云:

謂裴郎, 怨抑。後數月,東川幕白知退(行簡)將自河中歸,徽乃託人寫真,因捧書謂知退日,爲妾 [趙]堯卿(夔)曰,裴欽中以興元幕使河中,與徽相從者累月,欽中使罷,徽不能從, 崔徽 一旦不及卷中人, 徽且爲郎死矣! 明日遂疾, 發狂。元稹爲作崔徽歌以叙其 情懷

事

又施武子宿注云:

徽以不能從爲恨,久之成疾,寫真以寄裴。世有伊州曲,蓋採其歌成之也 張君房麗情集元微之崔徽傳云,蒲女也。裴敬中使蒲,徽一見動情,不能忍。敬中使回,

同書貳捌「章質夫寄惠崔徽真」題下施注云:

元微之作崔徽歌,世有伊州曲,蓋採其歌成之也。

楊廉夫維楨鐵厓三種之一鐵厓逸編注捌續幣集二十首之七「照畫」云:

畫得崔 一徽卷裏人,菱花秋水脱真真。 只今顔色渾非舊,燒藥燥頭過一春。

史邦卿達祖梅溪詞三姝媚云

記取崔徽模樣,歸來暗寫。

彦周顗彦周詩話云:

定爲娼婦。 詩人寫人物,態度至不可移易。元微之李娃行云, 髻鬟峨峨高一尺, 門前立地看春風。 此

之阿翁趙佑, 徽傳」之「傳」。不過蘋南更承用鐵厓此句耳。蓋蘋南學問實由其父璐處得來。至若其八股名家 人」句,亦與鐵厓同用一典。故句中之「傳」字,似當作「卷」,而非用蘇詩施注所引之麗情集「崔 寅恪案, 鐵匡「畫得崔徽卷裏人」句,出自「崔徽一旦不及卷中人」之語。戴蘋南「絕勝崔徽傳裏 必不許子婦閱讀此類雜書也

傳,元稹作崔徽歌。此唐代小説體例之原則也。(可参拙著元白詩箋證稿第壹章「長恨歌 冰 言元微之作崔徽傳者,當是行文偶誤,不足為據。至若韓愈作「石鼎聯句」,(見全唐詩第壹壹 易作長恨歌。元稹作鶯鶯傳, 又唐人小説例以二人合成之。 |聯句肆韓愈。)則以散文與歌詩不能分割,故一人兼為之。此乃變例,不可執以概全部唐人 一人用散文作傳, 一人以歌行詠其事。 李紳作鶯鶯歌。白行簡作李娃傳,元稹作李娃行。 如陳鴻作長恨歌傳, 白行簡作 。) 其 崔徽 白居

小説之體裁也。

怪矣。斯則關於風氣之轉變,特舉以告讀司馬彪續漢書五行志述「服妖」諸條之君子。 耶?寅恪曾遊歷海外東西洋諸國,所見當時所說為奇異者,數十年後,亦已認為通常 唐代社會史者之參考。 兹別有可注意者, 許彦周謂元微之「髻鬟峨峨高一尺」句,乃寫當時婦女頭髮之形態, 然則當日所謂時髦婦女之髮型,有類今日所謂原子爆炸式, 或 可供研 不足為 無 常式 究

為「嗟我今年開六秩」,則更妥適,不至令人疑惑耳。(此點可參白氏文集叁柒「喜老自嘲」詩末 歲。五十一歲可言「開六秩」,而梁德繩以「近花甲」為言,未免有語病。若易「嗟我年將近花甲」 又三益堂再生緣原本刻於道光元年。是「元」字非「九」字之誤,應據以改正。但「花甲」即六十 二句 行開第八秩, 可謂盡天年」原注「時俗謂七十已上為開第八秩」之語。)

中「夏簟清兮畫不暮,冬釭凝兮夜何長」之典,與此詩第貳句「別緒年年悵女牛」相應。今刻本 又陳文述西泠閨詠壹伍「繪影閣詠家□□」詩「苦將夏簟冬釭怨」句,乃用文選壹陸江文通 红]誤作「缸」,不可從。 別賦

論再生緣校補記後序

論再生緣 一文乃頹齡戲筆,疏誤可笑。 然傳播中外, 議論紛紜。 因而發見新材料, 有為前所未

知者,自應補正。茲輯為一編,附載簡末,亦可別行。至於原文,悉仍其舊,不復改易,蓋以 存著作之初旨也。噫! 所南心史, 固非吳井之藏。孫盛陽秋, 同是遼東之本。點佛弟之額粉,

久已先乾。 裹王娘之脚條,長則更臭。知我罪我,請俟來世。

一九六四年歲次甲辰十一月十八日文盲叟陳寅恪識於廣州金明館

(原載一九七八年七月、十月中華文史論叢第柒、捌輯)

論唐高祖稱臣於突厥事

事之本末不明顯於後世。夫唐高祖太宗迫於當時情勢不得已而出此,僅逾十二三年,竟滅突厥 吾民族武功之盛,莫過於漢唐。然漢高祖困於平城,唐高祖亦嘗稱臣於突厥,漢世非此篇所 考興亡之陳跡,求學術之新知,特為拈出此一重公案, 而臣之, 大耻已雪, 奇功遂成, 獨唐高祖起兵太原時,實稱臣於突厥,而太宗又為此事謀主,後來史臣頗諱飾之,以至其 又何諱飾之必要乎? 兹略取舊記之關於此事者, 願與當世好學深思讀史之有心人共參究 疏通證明之

舊唐書陸柒李靖傳(参新唐書貳壹伍上突厥傳貞觀政要貳任賢篇大唐新語柒容恕篇)云:

味, 皇(高祖)以百姓之故,稱臣於突厥,朕未嘗不痛心疾首,志滅匈奴,坐不安席,食不甘 太宗初聞靖破頡利 今者暫動偏師,無往不捷,單于款塞, 耻其雪乎。 大悦, 謂侍臣曰: 朕聞「主憂臣辱, 主辱臣死」。往者國家草創, 太上

寅恪案,

太宗所謂國家草創,即指隋末高祖起兵太原之時,當此時,中國與突厥之關係為何如

-

乎? 試觀通典壹玖柒邊防典突厥條上(參新唐書貳壹伍上突厥傳唐會要玖肆北突厥條)云:

諸國皆臣之,控弦百萬,戎狄之盛,近代未有也。大唐起義太原,劉文静聘其國, 王世充劉武周梁師都李軌高開道之徒,雖僭尊號,俱北面稱臣,東自契丹,西盡吐谷渾 中國人歸之者甚衆,又更强盛,勢凌中夏,迎蕭皇后,置於定襄, 薛舉寶建德 引以爲

援

則知隋末中國北方羣雄幾皆稱臣於突厥,為其附庸,唐高祖起兵太原,亦為中國北方羣雄之 豈能於此獨為例外? 故突厥在當時實為東亞之霸主,史謂「戎狄之盛,近代未有」。誠非虛 請更引史傳以證釋之。

舊唐書伍伍劉武周傳(参新唐書捌陸劉武周傳)略云: 突厥立武周爲定楊可汗,遺以狼頭纛,因僭稱皇帝,建元爲天興。

資治通鑑壹捌叁隋紀柒略云:

恭帝義寧元年(即煬帝大業十三年),突厥立[劉]武周爲定楊可汗,遺以狼頭纛。武周即皇

帝位,改元天興。

通鑑考異云:

新舊唐書武周皆無國號,惟創業起居注云,國號定楊。

通鑑此條胡注云:

言將使之定楊州也。

大唐創業起居注上云:

周竊知煬帝於樓煩築官厭當時之意, 故稱天子, 規而應之。

大業十三年二月已丑,馬邑軍人劉武周殺太守王仁恭,據其郡而自稱天子,

國號定楊。

所諱 寅恪案, 遠為勝, 故以「國號定楊」為言,司馬君實不解此意, 胡氏釋定楊為定楊州,楊揚雖古通用,然楊為隋之國姓,似以定楊隋為釋較胡説之迂 至創業起居注以「國號定楊」為言者,蓋突厥錫封劉武周為定楊可汗,溫大雅於此頗有 而疑兩唐書與創業起居注異, 其實武周之所

新唐書捌柒梁師都傳(參舊唐書伍陸梁師都傳)略云:

國

號即其所受突厥之封號也。

自爲梁國, 突厥語「大度」為「事」,「毗伽」為「解」,突厥語大度毗伽可汗即漢語解事天子也。 僭皇帝位, 建元永隆, 始畢可汗遺以狼頭纛, 號大度毗伽可汗解事天子。

新唐書玖貳李子和傳云:

資治通鑑壹捌叁隋紀柒略云: 北事突厥,納弟爲質, 始畢可汗册子和爲平楊天子,不敢當,乃更署爲屋利設。

恭帝義寧元年三月,始畢以劉武周爲定楊天子,梁師都爲解事天子,子和爲平楊天子,子

和固 [辭不敢當,乃更以爲屋利設。

胡 注

平楊猶定楊也。

寅恪案,

胡氏之意,平楊為平楊州,似不如以平楊隋為釋較勝也。

資治通鑑壹捌捌唐紀肆略云:

文與妖僧志覺有謀反語, 騎直入長安,甲戌,命皇太子鎮蒲反以備之。四年二月,并州安撫使唐儉密奏真鄉公李仲 武德三年七月驃騎大將軍可朱渾定遠告并州總管李仲文與突厥通謀,欲俟洛陽兵交,引胡 又娶陶氏之女,以應桃李之謡,諂事可汗,甚得其意,可汗許立

臟賄狼藉。上命裴寂陳叔達蕭瑀雜鞫之。乙巳,仲文伏誅

爲南面可汗,及在并州,

者,必亦受此物,所以表示其屬於突厥之系統,服從稱臣之義也。據通典壹玖柒邊防典突厥傳 未及狼頭纛者,蓋史臣略而不載耳。故突厥之狼頭纛猶中國之印綬,乃爵位之標幟,受封號 寅恪案, 綜合前引史料觀之,則受突厥之可汗封號者,亦受其狼頭纛,其有記受突厥封號, 而

上(參隋書捌肆突厥傳北史玖玖突厥傳等)略云:

旗纛之上,施金狼頭,侍衛之士,謂之附離,夏言亦狼也,蓋本狼生,志不忘舊。

述興國寺兵脅迫高祖服從突厥一事得以推知。茲不避繁冗之嫌,頗詳録溫氏之書與此 鋪 知。 可知狼為突厥民族之圖騰。隋末北方羣雄,既受突厥之狼頭纛,則突厥亦以屬部視之矣,哀 陳開國祥瑞之慣例,則不達溫氏曲為唐諱之苦心。 其述當時與突厥之關係, 最為微妙, 深堪翫味, 紀載唐高祖太宗起兵太原之事,溫大雅大唐創業起居注一書,為最重要之史料,世所共 又稱臣突厥之主謀,實為太宗, 如改旗幟 事, 辭費文繁,或者以 實可據 二事有關 為史家 其

推論之如下:

皆放此,管壁城壘幡旗四合,赤白相映若花園。開皇初太原童謡云,法律存, 多少惟命。 日 裴寂等乃因太子秦王等入啓,請依伊尹放太甲、霍光廢昌邑故事,廢皇帝而立代王,興義 配李而言,故云桃花園,宛轉屬旌幡。汾晉老幼謳歌在耳,忽覩靈驗,不勝懽躍。 旗天子出東海。常亦云白衣天子,故隋主恒服白衣,每向江都,擬於東海。又有桃李子歌 兵以檄郡縣,改旗幟以示突厥,師出有名,以輯夷夏。於是遣使以衆議馳報突厥,始畢依 帝日, 桃李子,莫浪語,黄鵠繞山飛,宛轉花園裏。 即遣其柱國康鞘利級失熱寒特勤達官等送馬千疋來太原交市, 康鞘利將至,軍司以兵起甲子之日, 誅紂之旗牧野臨時所仗, 未入西郊, 無容預執,宜兼以絳雜半續之。 又符讖尚白, 案李爲國姓,桃當作陶,若言陶唐也 請建武王所執白旗以 仍許遣兵送帝往西京 道德在, 諸軍稍旛 不突

太宗等必欲改白旗以示突厥, 寅恪案, 唐高祖之起兵太原, 則殊有可疑。 即叛隋自立, 別樹一不同之旗幟以表示獨立,其事本不足怪, 據大唐創業起居注下載裴寂等所奏神人太原慧化尼 但

童子木上懸白旛, 胡兵紛紛滿

前後。

天子出東海,太宗等乃强改白衣為白旗,可謂巧於傅會者矣。 夫歌謡符讖,自可臨 用調停之法兼以絳雜半續之者, 著之例(見舊唐書壹佰伍韋堅傳)。豈所謂效法祖宗, 是胡兵即突厥兵,而其旗幟, 蓋李唐初起兵時之旗為絳白相雜,不得止言白旛也。所可笑者,開皇初太原童 但不如因襲舊有之作稍事改換,更易取信於人,如後來玄宗時佞臣之改作得實歌 為白色之明證。 蓋欲表示一部分之獨立而不純服從突厥之意。 此歌謡之意, 師其故智者耶? 唐高祖之不肯竟改白旗 謂李唐樹突厥之白旗, 據隋書壹高 而突厥 謡 時 本作白 即是顯 因 事偽 兵從

服冕之儀 [開皇元年]六月癸未, 韶以初受天命, 而朝會之服, 旗幟犧牲, 盡令尚赤。 赤雀降祥, 五德相生, 赤爲火色。其郊及社廟,

是隋色為絳赤, 下胡注云 即是當時中夏國旗之色, 而資治通鑑壹捌肆隋紀義寧元年六月雜用絳白以示突

隋色尚 赤, 今用絳而雜之以白, 示若不純 於隋。

欲 胡 旅難 氏 知隋 幼 色尚 主 不 即革 赤, 隋 乃謂「示若不純於隋」, 命, 則旗色純用絳 赤本亦不妨, 夫唐高 祖起 其 兵 介所以 叛立, 一用絳而雜之以白」者, 其 不純 於隋自 不待言 實表 但 其 示 初尚 維持

中夏之地 位 而 不純臣服於突厥之意 胡氏之説 可謂適 得其反者也

總之, 高祖 起 兵時 改易旗色, 必與臣服於突厥有關。 高祖所以遲疑不決, 太宗等所以堅執

唐創業起 居 注 上云

請,

溫氏

所以詳悉記述歌謠符讖累數百言者,

其故正在於此。

世之讀史者,

不可視為釀

詞

而

忽 固

帝引康鞘利等禮見於晉陽官東門之側舍, 退相謂曰, 唐公見我蕃人, 尚能屈意, 受始畢所送書信, 見諸 華夏, 情何可論, 帝偽貌恭, 敬人者人皆敬愛, 厚加 響 賄 鞘利等 天

下敬愛, 必爲人主, 我等見之人,

不覺自敬。

封 入長安 寅恪案, 久已 高祖為可汗之册 」隱諱 此溫 而仲文所受突厥之封號據稱為「南面可汗」。 不傳, 氏用委婉之筆叙述唐高祖受突厥封號稱臣拜伏之事。「始畢所送書信」,即突厥敕 但據上引李仲文事 書,「帝偽貌恭」,即稱臣拜伏之義。唐高祖此時所受突厥封號究為何名, 子觀之, 則高祖與仲文俱為太原主將, 由此推之,高祖所受封號亦當相與類似 突厥 又同 欲遣兵送之

可無疑也。

總而言之,太宗既明言高祖於太原起兵時曾稱臣於突厥, 必當於創業史料中得其經過跡象。惜舊記諱飾太甚, 今祇可以當時情勢推論之耳。 則與稱臣有關之狼頭纛及可汗封號

高 祖稱臣於突厥, 其事實由太宗主持於内, 而劉文靜執行於外, 請略引史傳,

以證明之。

大唐創業起居注上略云:

已後, 但唐公欲迎隋主,共我和好,此語不好,我不能從。唐公自作天子,我則從行, 始畢得書大喜,其部達官等曰,天將以太原與唐公,必當平定天下,不如從之以求寶物, 官僚等以帝辭色懷然, 不避時熱,當日即以此意作書報帝。帝開書歎息久之曰,孤爲人臣須盡節,本慮兵行 突厥南侵,屈節連和,以安居者,不謂今日所報, 突厥之報帝書也, 莫敢咨諫。 謂使人曰, 唐公若從我語, 興國寺兵知帝未從突厥所請, 更相要逼, 即宜急報我, , 乍可絶好藩夷, 無有 往往偶語曰, 公若 遣大達官往取進

但興國寺兵,何以亦同突厥,以此要迫,考大唐創業起居注上云: 突厥之欲高祖自為天子, 即欲其受可汗封號,脱離楊隋而附屬突厥之意, 其事本不足

更不從突厥, 我亦不能從公。

」裴寂劉文静等知此議,

以狀啓聞

帝遣長孫順德趙文恪等率興國寺所集兵五百人總取秦王部分。

即册府元龜柒帝王部創業門云:

萬,文静頓於與國寺,順德頓於阿育王寺。 [唐]高祖乃命太宗與晉陽令劉文静及門下客長孫順德劉弘基等各募兵, 旬日之間, 衆且

迫脅 書壹佰伍長孫順德傳等。)等皆太宗之黨,其兵又奉高祖之命歸太宗統屬,今居然與突厥通謀, 太宗為稱臣於突厥之主謀,執行此計劃之主要人物則是劉文靜,據舊唐書伍柒劉文靜傳略 夫劉文靜長孫順德(順德為太宗長孫后之族叔,避遼東之役逃匿於太原,見舊唐書伍捌及新唐 高祖 叛楊隋而臣突厥,可知太宗實為當時主謀稱臣於突厥之人,無復疑問也。

文静使於始畢可汗, 始畢曰, 唐公起事, 今欲何爲? 文静曰, 願與可汗兵馬同入京師, 二年]裴寂又言曰,當今天下未定,外有勍敵,今若赦之,必貽後患。高祖竟聽其言, 衆土地入唐公,財帛金寶入突厥。始畢大喜,即遣將康鞘利領騎二千隨文静而至,[武德 隋末爲晉陽令, 煬帝令繫於郡獄, 太宗以文静可與謀議, 入禁所視之。 以文静爲軍司馬,文静勸改旗幟,以彰義舉,又請連突厥,以益兵威, 高祖並從之。因遣 高祖開大將軍府,

及大唐創業起居注上略云:

殺文静。

乃命司馬劉文静報使, 所防之者, 恐武周引爲邊患, 並取其兵,静辭, 取其聲勢,以懷遠人,公宜體之,不須多也 帝私誠之日, 胡兵相送, 天所遣來, 數百之外,

傳 中 即 敢侵襲太原, 祖於遣劉文靜 與突厥始畢 -略云: 實由 事 裴寂 而新 即可推知 未 解文靜與突厥之關 謂 若唐與突厥之關係疏遠, 使突厥時, 以防劉武周為言, 唐書捌捌劉文靜傳及通鑑壹捌陸 可汗議訂稱臣之約者,實為劉文靜,其人與太宗關係密切,觀太宗往視文靜於獄 「當今天下未定, 文靜即為李唐與突厥連繫之人, 及高祖入關後漸與突厥疏遠, 係所致也。 外有勍敵」,「天下未定」指劉武周王世充竇建德等, 則武周必倚突厥之助略取并州。據舊唐書壹玖肆上 李唐與突厥之連繫人劉文靜雖死, 則唐與突厥關係親密, 唐紀武德二年殺劉文靜條俱省略「外 武周自當受突厥之約束, 而太宗 猶在 而文靜乃被 有勍 外有勍 突厥 觀 高

武 年始畢授馬邑賊帥 立其弟俟利弗設 是爲 劉武周 處羅 兵五百餘騎, 可 汗。 遣入句注, 又追兵大集, 欲侵太原。是月始

口 知突厥 漸變前 始 畢 此之恭遜, 可汗初與 故始畢又改命武 劉文靜 定約 立唐 周 奪取 高祖 太原矣。 為可汗, 約束劉武周, 不得侵襲太原。 迨唐入關

武 周既得突厥之助, 奪取太原, 兵鋒甚盛, 將進逼關中, 唐室不得不使劉文靜外, 其他唯

論

李唐與突厥之連繫人即太宗出膺抗拒劉武周之命, 此不僅以太宗之善於用兵, 實亦由其與突厥

有特別之關係也。觀舊唐書壹玖肆上突厥傳上云:

太宗在藩,受韶討劉武周,師次太原,處羅遣其弟步利設率二千騎與官軍會。 六月處羅

卒。

至并州,

總管李仲文出迎勞之。 留三日,

城中美婦人多爲所掠。仲文不能制,

俄而處羅

特別關 則突厥昔之以兵助劉武周者, 今反以兵助李世民, 係, 前後態度變異至此, 其關鍵在 太宗與突厥之

又據舊唐書貳太宗紀上略云:特別關係,可推知也。

效 在京師,故突厥來,若燒却長安而不都, 可居之地, [武德]七年秋,突厥頡利突利二可汗自原州入寇,侵擾關中。 取彼頡利。 即欲移都。 若一兩年間不繫其頸,徐建遷都之策, 蕭瑀等皆以爲非, 然終不敢犯顏正諫。太宗獨曰,幸乞聽臣一申微 則胡寇自止。高祖乃遣中書侍郎宇文士及行山南 臣當不敢復言。高祖怒,仍遣太宗 有説高祖云, 祇爲府藏子女

及新唐書柒玖隱太子傳云: 將三十餘騎行剗。還日固奏,必不可移都,

高祖遂止。

突厥入寇,帝議遷都, 秦王苦諫止。建成見帝曰,秦王欲外禦寇, 沮遷都議, 以久典兵,

可見太宗在當時被目為挾突厥以自重之人,若非起兵太原之初,主謀稱臣於突厥者, 何得致此

而謀篡奪。帝寖不悦。

疑忌耶?斯亦太宗為當時主謀者之一旁證也。

又舊唐書壹玖肆上突厥傳上(參册府元龜玖捌壹外臣部盟誓門)略云:

利,突利悦而歸心焉,遂不欲戰。其叔侄内離,頡利欲戰不可, 王不須渡, 我無惡意, 亦不對。太宗前, 可汗誓不相負, 何爲背約深入吾地? 我秦王也, 故來一決。可汗若自來, 我當與可汗兩人 [武德]七年八月,頡利突利二可汗舉國入寇,太宗乃親率百騎馳詣虜陣, 爾往與我盟, ",若欲兵馬總來,我唯百騎相禦耳。頡利弗之測,笑而不對。太宗又前,令騎告突利 將渡溝水, 頡利見太宗輕出, 又聞香火之言, 乃陰猜突利, 急難相救,爾今將兵來,何無香火之情也?亦宜早出,一決勝負。突利 更欲共王自斷當耳。於是稍引却,各斂軍而退。 因遣突利及夾畢特勒(勤) 太宗因縱反間於突 告之日, 國家與

有特別關係。然則太宗當日國際地位之重要,亦可想見矣。至太宗與突利結為兄弟疑尚遠在此 寅恪案,太宗在當時不僅李唐一方面目之為與突厥最有關係之人,即突厥一方面亦認太宗與之 據舊唐書壹玖肆上突厥傳上略云:

阿史那思摩奉見請和,許之。突利因自託於太宗,願結爲兄弟。

無愧。又義軍入京之初,爾父子(指頡利突利言, [武德]九年七月, 二可汗總兵百萬, 頡利自率十萬餘騎進寇武功, , 今已至矣。太宗謂之曰, 我與突厥, 面自和親, 汝則背之, 我實 頡利遣其腹心執失思力入朝爲覘, 因張形 如昔人稱漢疏廣受父子之例,蓋頡

然則所謂香火之盟,當即在唐兵入關之時也,通鑑壹玖壹唐紀柒武德柒年胡注釋香火之盟固 但仍未盡,考教坊記(據説郛本)坊中諸女條云:

利爲叔父及從子也。)並親從我。

對同日, 垂到内門, 車馬相逢, 坊中諸女以氣類相似,約爲香火兄弟,每多至十四五人,少不下八九輩。有兒郎娉之者 輕被以婦人稱呼, 兒郎既娉一女, 其香火兄弟多相奔, 云學突厥法。又云, 即所娉者兄見呼爲新婦,弟見呼爲姣也。兒郎有任官僚者,官參與内人 或搴車簾呼阿娞若新婦者, 同黨未達,殊爲怪異,問被呼 我兄弟相憐愛

中國人, 則太宗與突利結香火之盟,即用此突厥法也。故突厥可視太宗為其共一部落之人,是太宗雖為 亦同時為突厥人矣! 其與突厥之關係, 密切至此, 深可驚訝者也

欲得嘗其婦也。主者知亦不妬,他香火即不通。

亦自不必為之諱也。至後來唐室轉弱為强, 建功雪耻之本末, 軼出本篇範圍, 故不涉及。嗚 記中李唐起兵太原時稱臣於突厥一事,可以推見者,略如上述,此事考史者所不得為之諱,

不世出人傑之所為也。又何足病哉!又何足病哉!

·! 古今唯一之「天可汗」,豈意其初亦嘗效劉武周輩之所為耶? 初雖效之,終能反之,是固

呼

(原載一九五一年六月嶺南學報第拾壹卷第貳期)

我们以大人的有人的教徒而死。 人名法库里奇法 好情以我想以外 医现在的现在分词 医小体

韋莊秦婦吟校箋

警急。 避。 斂袂謝 中 起 自 色。 紅 停 和 緑 紫氣 北鄰諸 玉 楊 癸卯 嬰兒稚女皆生棄 已見白旗來 十二官 皆言 陰 趾 行 已見 潛 春 隨帝 前 歇。 街 博野自相持, 婦 月, 煙 咸 街 年 喪 座 市 中 蜀 烘 庚 鳳 相 側鸞欹 洛陽 地 漂 移 凑 **温金鼓**。 烔 7 淪何 臘 東鄰 户 城 扶羸 妖 月 H 盡道 外花 光 五 堪 譽 輪 外 脚 説 居人走出半倉皇 有 暗 西 崩 攜 正閉 斜 女眉 賊軍來未及。 如 射 騰 幼 下 雪。 競 臺 如 寒 年陷 金籠 紅 新 光 走 相 星 攢 東 響。 畫 坼。 白 呼 黛斂 教鸚 西 賊 留 南 上屋 傾 家 F 轟 須臾主父乘奔至, 鵡 秦地 眉 北 國 家 帝 轟 朝士 路 心 傾 流 崑 緣 無 斜 折。 Y 崑乾 牆不 城 言 血 歸來尚疑 開鸞 依 絶 不 如 空 借 稀 知次。 知 泉 脈 坤 緑楊悄 鏡 問 記 價。 沸 脈 動 得 女郎 懶 誤。 秦 梳 長戈 處 陰 萬 南鄰走 下馬入門 悄香 中 頭 何 處 雲 馬 是時 事。 處 擁 冤 量 雷 來, 閒 塵 入北鄰 得 聲 氣 聲 西 憑 君能 滅。 L 若 從 聲 含颦 癡 面 雕 戎 動 地 重 官軍 欄慵 為妾 路旁 似 車 地 韋 湧。 藏, 醉。 欲 解 忽 語 不 火迸 東鄰 舞伎 宦者 見如 口 語。 金鞍, 適 聲 首 逢 擬 先 香閨 歌 流 金 走向 花人, 咽。 紫 向 忽看 星 妾亦 姬 星 蓋 潼 淚 盡 如 西 去 累 П 外 與 盈 暗 m 九 鄰 為 頭

愛。 井 憂 喜 城 史 精 載 顧 來 行 恥 翡翠 蘭 牽衣 昨 蓬 欲 北 旋 旋 言 鄰 省 梳 1 H 抽 面 郎 F 冤憤 簾 從 官 奏 諸 驚 蟬 117 横 金 几 面 迥 不 茲多 鬢 梯 婦 憂 波 線 郎 軍 學 郎 垢 間 肯 皆 梯 此 心 逐 空 出 翦 學 猪 抱 收 行 又 朝 膽 見 眉 軍 厄 鞍 時 赤 鼠 相 朱 秋 縫 束 泣 堂 躰 赤 碎 摧 促 影 門 旗 銷 水 行 水 幾 赤 暮 還 夜 强 煙 忽 紅 妝 纔 沉 必 旋 見 將 轉 函 謂 水 卧 展 中 解 看 粉 成 1 沉 夫 喧 横 T 蛾 庭 雕 黄 數 妖 短 大 雲 香 只 徒 影 鬢 際 鞍 日 波 眉 HH 脂 金 城 呼 重 学 今 來 看 劍 出 猶 拭 鏡 教 無 戴 刀 刀 戟 門 走 升 消 H 百 酒 華 不 求 眉 1 1 中 去。 粟 息 死 里 簪 得 韋 救 緑 鳴 死 春 馬 市 尚 不 衣 朝 舊 梁 E 身首 年 有 必 逡 朝 南 謂 若 裳 里 F 聞 鄰 巛 朝 脱 湌 幼 讓 時 從 懸 擊 支 走 來 朝 顛 馬 軍 Fi. 不 廚 有 中 前 兮 鼓 味 茲 離 知 L 馬 衣 倒 界 託 女 見 食 己 傳 暮 X 纏 言 人 不 E 壞 在 不 門 銜 應 驚 語 得 作 記 良 聲 繡 肝 高 俄 外 木 璧 急 被 灰 門 姓 事 人 皮 至 異 膾 起 歸 頃 黄 鴛 六 妾 昨 簸 又 X HH 翻 面 不 仰 不 道 徒 身 幃 親 巢 旗 持 覺 夫 嘯 1 天 H 敢 幸 机 掉 官 馬 象 誇 縱 自 攀 掩 良 跳 喧 迴 軍 此 得 緣 媒 躍 眸 爭 笏 X 劍 F 功 面 贵 哭 空 卻 全 暗 如 作 無 全 1 F. 劃 雕 新 成 金 X 來 竊 作 尋 淚 陣 吞 IJ 重 納 入。 字。 歡 鋸 階 肉 歸 聲 公 處 屋 聲 聘 下。 議 寶 夜 X 女 柏 不 須 女 琉 斜 西 東 大 倒 道 彭 伴 貨 從 臾 弟 南 來 佩 臺 敢 璃 衵 鄰 官 多 陷 女 階 半 金 斷 1 閨 探 雖 踟 几 有 名 兄 軍 馬 魚 絍 彭 中 + 賊 躇 面 肩 女 無 悉 相 潛 Y 為 盡 非 經 久 火 同 不 欲 真 糧 敗 顧 失 皇 光 聞 AA 狐 所 相 仙

絶, 聲。 間 聞 得。 枿 户。 骨 秀 色 由 行 道 花 溝 隱 朝 頓 神 筵 殿 中 鄉 樹 來 隱 袁 攜 覺 落 鎖 時 萼 椎 叡 婦 在 F 身 徒 金 樓 能 本 寶 肼 Ili 犧 驅 曉 砍 漸 炊 藏 貨 清 中 歆 1/ 貫 牲 罏 康 111 出 前 盡 紅 金 東 蓬 無 天 猶 無 奠 牛 们 城 荆 杏 黍 畿 處 響 有 翠 東 漸 荻 X 地 部 暗 棘 袁 問 少。 飯 縣 中 閑 難 覓 恩 塵 蒿 滅 滿 花 陌 干 暮 危 摧 昔 歲 間 陜 旋 大 城 修 六 何 歲 翁 教 時 從 道 外 時 軍 插 州 殘 寨 須 誅 耕 金 書 魘 俱 門 倉 狂 繁 本 主 不 竹 風 兮 望 外 桑 鬼 助 樹 盛 是 釵 帥 寇 成 煙 殘 萬 陷 皆 棘 臨 何 唯 忠 東 傍 神 如 皆 御 倚 絲 沂 鄉 獨 H 諸 鄉 中 無 子 寒 埋 溝 僵 涌 尸 箱 貞 力 没 甸 曲 林 色。 柳 行 侯 村 È 黄 底 我 華 歲 明 不 前 誅 天 路 行 路 舉 七 巢 動 事 今 架 種 朝 年 剥 地 旁 X 旁 目 軒 调 良 寒 X 干 X 牛 愧 晦 試 夜 時 凄 繡 營 後 戈 出 宿 見 H 天 调 靈 愿 冥 問 凉 齠 中 猶 调 牆 皆 霜 新 惟 楊 抽 金 游 無 填 風 殘 百 露 安 守 為 天 王 奕 故 震 朝 水 銷 餓 半。 夕。 廛 宿 東 城 神 黑 神 月 關 軍 物 散 殍 自 年 老 路 舉 妾 案 金 坡 長 蒲 H 明 甲 内 從 輸 翁 聞 F 津 向 前 天 朝 庫 安 頭 1 第 洛 户 暫 5 雲 曉 朱 主 此 神 Ш 無 寂 燒 寂 稅 耙 漿 帥 際 為 門 1 語 中 水 語 至 無 寂 屯 浲 見 愁 深 呪 錦 欲 能 秋 i印 無 今 干 師 陳 戢 荆 更 於 峰 送 報 不 繡 何 * 旅 翁 兵 愁 路 客 有 署 成 萬 詞 111 人 灰 蒼 H 1 卻 Ŧ 如 天 寰 辟 廟 百 霸 天 含 發 姑 育 里 從 遣 1 夜 坐 中 萬 陵 街 市 兀 巡 支 慣 晏 地 肼 簫 陰 古 東 踏 殿 荒 面 X 兵 帶 然 管 柏 家 織 随 府 555 兵 望 盡 1 街 裾 苔 無 A 仰 無 到 非 不 騙 有 X 公 狐 麥

曾

不殘

村

絁

天

蘚 犬

苗

免

烟

卿

塢。 今日 中 垂 秋 年 TK 拔 身苦。 蛇 旗 身苦 E 高 分 風 吹 何 白 足 嗟 虎 Ш 門 中 F 更 有 馬 若 T 萬 旋 家 風 朝 罄 室 湌 傾 Ш Ł 囊 尋 如 蓬 卷 子 夜 家 宿 財 霜 既 中 盡 骨 卧 荻 內

異。 絶 花。 妾聞 又道 自從 大寇 此 門 父 犯 傷 中 相 13 原 殺 語 戎 野 竟 馬 ム H 徒 不 闢 曾 銷 T 生 戰 淚 + 刀 如 鄙 魂 誅 泂 出 津 門 鋤 竊 * 惟 是 見 盗 若 第 屬 神 梟 X 血 功 鳴 惠 適 更 愛 聞 欲 生 有 東 客 奔 金 何 赤 陵 處 子。 所 至 見 仍 説 聞 汴 江 路 南 舟 風 景 車

秦婦 吟 卷

鬼。

願 賦

君 稅

舉 如

棹

東復

東 壘。

詠 奈

此

長歌獻相

湯

雲送

軍

何

四

海

杰

滔

滔

湛

然

鏡平

如

砥

避

難

徒

為

闕 如

下人

懷

安

卻

羨 護

江

南 金

靈

城

壕

古

斅

復 伍 年 乙丑 歲 + 月十 Ħ. 敦 煌 郡 金光 明 寺 學 仕 張 龜 寫

之甚 述從 詠, 戊辰 及從洛陽東 經 長 之春 调 不 輒若 安達洛陽 口 未 解 不 奔之 俞銘 及 解 得 計 確 路 衡 知 賢之説之殊 雖 段經 程, 君 於 是以 為 二字句 過。 本寫當日 寅恪 於端 此 口 寫 E 疑者 點 稍 韋 南 為 X 有 端 民 所校 遊 近 E 事 亦 H 避 秦 略 論 釋 跡 難之慘狀 婦 申 此 不 吟卷 詩 能有 然皆 鄙 見 者 子, 所 瑣 所 考 附 未 而 細 張 見 詳 無 綴 其 於 於 晚 關 屋 後。 年 但 遂 宏 壁 依 不 所 旨 Ü 地 茲請 自 11 理系統以 量 獨端 諱 年 先言從洛 言 以 此 欲 來, 詩 此 有 所妄説 為 之由 詩 課 陽 推 所 業 證 東 述 從 奔 餘 之路 繫 亦有 長 暇 至 詩 於 安 裨於 程 中 詩 至 偶 字 洛 中 此 諷 明 所 陽 句

瞭當日徐淮軍事之情勢及詩中文句之校釋也。

(甲)從洛陽東奔之路程

詩云

魂, 出門惟見亂梟鳴,更欲東奔何處所。仍聞汴路舟車絶,又道彭門自相殺。野色徒銷戰士 河津半是冤人血。適聞有客金陵至,見説江南風景異。

王國維氏校本(北京大學國學季刊第壹卷第肆期)云: 汴路一作洛下。羅振玉氏校本(敦煌零) 汴路作汴洛。 周雲青君秦婦吟箋注云:

汴洛謂河南開封至洛陽也。

寅恪案, 元和郡縣圖志玖徐州條云:

水。輿地記:「徐州南控埇橋,以扼汴路,故其鎮尤重。」唐於其地置鹽鐵院。建中二年, 按自隋氏鑿汴以來,彭城南控埇橋,(在宿縣北二十里,一名符離橋,亦名永濟橋, 淄青帥李正已拒命, 屯兵埇橋。元和四年, 議者以埇橋當舟車之會, 因置宿州以鎮之。)

回書同卷宿州條略云:

以扼汴路,

故其鎮尤重。

其地南臨汴河有埇橋,爲舳艫之會。

白氏長慶集肆肆杭州刺史謝上表云:

屬汴路未通,取襄漢路赴任。

據此,汴路乃當時習用之名詞,不可改為汴洛,亦不得釋為開封至洛陽明矣。

李文公集壹捌來南録云:

帆,及盱眙, 風逆, 天黑色, 波水激, 順潮入新浦。壬戌至楚州, 丁卯至揚州, 戊辰上栖 永城。甲寅至埇口,丙辰次泗州,見刺史,假舟轉淮上河如揚州。庚申下汴渠入淮,風 又。二月丁未朔,宿陳留。莊人自盧又來,宿雍丘。[二月]乙酉次宋州。 汴梁口,遂泛汴流,通河於淮。辛丑及河陰,乙巳次汴州,疾又加,召醫察脉,使人入盧 别。既食,韓孟别予西歸。戊戌,余病寒,飲葱酒以解表。暮宿於鞏。庚子出洛下河,止 和四年正月] 乙未去東都,韓退之石濬川假舟送予。明日及故洛東,弔孟東野,遂以東野 靈浮圖。辛未濟大江至潤州。 元和三年十月翔既受嶺南尚書公之命。四年正月已丑自旌善弟(第)以妻子上船於漕。[元 濬川以妻疾自漕口先歸。黄昏,到景雲山居,詰朝,登上方,南望嵩山, 題姓名記 疾漸瘳。 壬子至

又同書同卷題桄榔亭云:

翔與監察御史韋君詞皆自東京如嶺南, 翔以[元和四年]正月十八日上舟於漕以行。 以二月策馬疾驅,追我於汴宋之郊。或不能及,約自宣州會我於常州以偕行。 韋君期

元和郡縣圖志玖徐州條云:

今爲徐泗節度使理所。 西至東都一千二百二里。

南取埇橋路至宣州五百里。

又同書貳伍潤州條云:

今爲浙西觀察使理所。

西北至東都一千八百一十里。

北渡江至揚州七十里。

正南微西至宣州四百里。

又同書貳捌宣州條云:

西北至東都取和滁路二千一百五十里。今爲宣歙觀察使理所。

正北微東至潤州四百里。

當塗縣。

里, 西接 111 在縣 鳥 江 北 北連 三十五里, 建業城 突出 在牛 江 渚山 中, 上, 謂 之牛 與和州横 渚圻 江渡 津 渡 相 處 對 也。 採石 成, 在縣 西 北

三十五

襄漢 吟中 能。 於中 遊作 據 渡 道當塗縣 此 江 (浣花集叁新正日商南道中 和三 路迁 也。 然皆 中 一一前白 雖言 和二年二月後始離長安 知李 一年新 未詳 曲瀅 Fi 迴太甚。 其 但 居易及秦婦吟所謂汴路 此 一律一首(浣花集肆 翺 艱 詩語意太泛 言 生君韋莊 阻 南 IE 其故。 行自身由 H 又浣花集中 而 經過商 端己之南投周寶 鄙見此 年 譜 揚州 南 不易證明。 則 0 是年 疑 詩若果為端 渡 未能確 作寄李明府一首, 贵 夏承 江 此詩為光啟二年 取襄 至潤州 新 亦即 IE 燾君韋 切發見其中 百何 或仍 故由 漢路赴潤 端己弔侯補闕 己中 緣在商南道 由 何 端已年譜(詞學季刊第壹卷第肆號)列之中 而 此 處 約 和 西遊所作。 韋 路。 渡 和三年春襄漢之行踪也。 州耶? 夏君韋端己年譜列於中和二年。 年 詞 江 春 [詩句注(浣花集肆)所謂汴宋 由 蓋白樂天長慶一 中 點可 和州 間之作, 但 ? 又謂: 不 詩語無明確之表示, 疑是中 渡江至宣州 必多作揣 則是 此詩 和三年之作。 年 由汴 或有 赴 測 杭州 之論 路 蓋 為初次 姑存 南 一塗皆 刺 行 東來時 此 路 果爾 史 至 故不 復取 也。 任 汴 寅恪案 疑 經 路 埇 和三年南 敢 以 則端己 所 則 和 作之可 端己有 橋 遽 俟 取之 秦婦 滁 端 路 即

也。)

吟之考證與校釋(原文載通報第貳肆卷第肆第伍合期。茲所據者為燕京學報第壹卷第壹期 汴路之界説既已確定, 彭門之地望因之可以推知, 而野色之校改亦得佐證矣。 翟理斯 公子秦婦 張蔭

四川彭縣有彭門山,詩中之彭門不知是指此否?

麟君譯本)云:

愈熾侵 殺」,復於措詞為失體。故知彭門非指天彭門也。 闕或天彭門,(見元和郡縣圖志叁壹彭州導江縣灌口山西嶺有天彭闕條。 奔,而彭州在洛陽之西南,既與地望不合。詩又云:「自相殺。」以官軍平阡能, 寅恪案 淫入蜀州條及崔致遠桂苑筆耕集壹賀處斬草賊阡能表等。 中和二年冬蜀中阡能之亂蔓延及於雙流新津, (見通鑑貳伍伍中和二年十一)則彭門指彭州導江)似亦可能: 而謂之「自相 但詩 縣之天彭 月阡能黨 言東

考舊唐書壹捌貳時溥傳云:

年 移軍向徐州。既入,軍人大呼,推溥爲留後, 時溥彭城人,徐之牙將。黄巢據長安,韶徵天下兵進討。中和二年(寅恪案,二年應作元 岑氏校勘記失校。)武寧軍節度使支詳遣溥與副將陳璠率師五千赴難。 剽河 陰縣迴。 溥招合撫諭, 其衆復集。 懼罪, 送詳於大彭館。 屯於境上。 溥大出資裝, 詳遣人 迎犒 行至河陰 遣陳璠援詳歸 悉恕之。 溥乃 軍

荆榛撲地。

璠。 (參考舊唐書壹玖下僖宗紀廣明元年九月條, 詳宿七里亭,其夜爲璠所殺,舉家屠害。溥以璠爲宿州刺史。 新唐書玖僖宗紀, 竟以違命殺詳, 溥誅 中和元年八月條。

捌捌時溥傳及通鑑貳伍肆中和元年八月條等。)

崔 [致遠桂苑筆耕集代高駢所作書牒, 關於汴路區域徐州時溥泗州于濤之兵爭及運道阻塞之紀載

俱兩唐書及通鑑等所未詳, 實為最佳史料。 茲擇録於下, 亦足徵當日徐淮之間軍事交通

之情勢也。

甚多,

桂苑筆耕集捌致泗州于濤常侍別紙略云:· 况屬彭門叛亂,仍當汴路艱難,獨守危城,終摧敵壘。

書玖致泗州于濤尚書別紙略云:

司

書壹壹告報諸道徵促綱運書略云:蠢彼徐戎,聚茲餘燼,敢侵貴境,再逞姦謀。

同

城。時溥罔遵韶旨,尚搆奸謀。去年曾犯淮山,今夏又侵泗水。乃作黄巢外應,久妨諸道 既裝運舡,將扣飛檝,言遵汴道,徑指圃田,必值徐戎,來侵淮口,扼斷河路,攻圍郡

進軍。先須剗當道之豺狼,後[方]可殄壞堤之螻蟻。冀使隋皇新路,楊柳含春,漢祖舊

同書同卷答徐州時溥書略云:

忽睹來示云:泗州獨阻淮河,自牢城壘,使四方多阻,諸道莫通。其於淮河久阻, 皆因貴府出兵,不是泗濱爲梗。是非可辨,遠近所聆。去歲夏初,早蒙侵伐, 道路不

於連水,拒虎旅於淮山。

同書同卷答襄陽郄將軍書略云:

諸道綱紅曾過泗州本路。今則皆因此寇, 却滯諸綱。近則浙東浙西, 遠則容府廣府, 州。)則城孤氣寡,劣保疲羸。彭門則地險兵强,恐行狂悖。以茲斟酌,可見端倪。 聆饋運, 何濟急難。 見當軍臨發,即將兇黨奔衝, 州。)忽興戎役,先侵泗境, 兵於大梁,遂傳檄於外鎮,練成軍伍,選定行期,便被武寧(寅恪案,武寧軍節度使治徐 中和二年七月四日具銜高某謹復書於將軍閣下:某自去年春知寇侵秦甸,帝幸蜀川,欲會 後犯淮壖。細察徐州所爲,是作黄巢外應。 又乃執稱泗濱, 阻絶汴路, 且臨淮(寅恪案, 不然, 臨淮郡 則何以每 況無 即 泗

又吳融唐英歌詩上有七言律詩三首, 其題為:

新唐書伍捌藝文志史部雜史類載:

彭門用兵後經汴路。

據此,彭門相殺之語及彭門與汴路之關係,可得其確解矣。

又「野色徒銷戰士魂,河津半是寃人血。」二句造語既不晦澀,用意尤為深刻, 信稱佳構。

唐書壹貳拾郭子儀傳略云:

飲冰傷骨。

子儀既謝恩上表, 因自陳曰:[臣]東西十年,前後百戰。天寒劍折,濺血霑衣。 野宿魂

宿州條略云: 則「野色徒銷戰士魂」句與郭表所云「野宿魂驚」之義相同,似可無須校改。然細繹上下文義, 「野色」二字疑是「宿野」二字之譌倒,翟君謂「野色」丙本作「野宿」。據元和郡縣圖志玖河南道伍

其地南臨汴河,有埇橋爲舳艫之會。(前文已引)

又同書同卷泗州條略云:

秦爲泗水郡地。 漢與,改泗水爲沛郡。武帝分置臨淮郡。後漢下邳太守理此。自晉迄後魏

並爲宿豫縣。

宿遷縣。

春秋時宋人遷宿之地,晉立宿豫縣。寶應元年以犯代宗廟諱改爲宿遷縣。

韋

新唐書叁捌地理志云:

州臨 淮郡上,本下邳郡, 治宿預。開元二十三年徙治臨淮。

考據, 則是「河津」為汴河之津,「宿野」為宿州或宿遷即泗 人」為黃巢同里冤句之人, 與泗州于濤之兵爭。此乃依地理系統及歷史事實以為推證, 以致佳詩盡成死句見責者, 則似可不必, 所不敢辭罪也。 蓋「冤人」與「戰士」為對文,冤字非地名也 州之野。 至「冤人」自當作冤死之人解, 故此二句俱指汴路區域, 不得不然之結論。 若有以説詩專主 而周 徐州時溥 注謂 第

陵, 詩中之金陵即指潤州之丹徒言。 周注引唐書地理志 江南道昇州縣本江寧為釋。 李衛公別集壹鼓吹賦序云 其實唐人亦稱節將治所潤州之丹徒為金

余往歲剖符金陵。

端己年譜。 杜牧樊川詩集壹杜秋詩序 李德裕曾任浙西觀察使, 江東西為二)因恐讀者於此句中金陵之語有所誤會, 道條等。 茲不備舉。 而潤州之丹徒為浙西觀察使治所, 馮集梧注 端己中 及錢大昕廿二史考異壹柒下唐書方鎮表 和三年在上 元賦詩頗多, 特附辨正於此 故云剖符金陵。其餘例證, 見浣花集肆, 伍 及夏承 貞元三年分浙 燾君韋 可參閱

北夢瑣言陸以歌詞自娛條云:

吟障子,

以此止謗,

亦無及也。

蜀相韋莊應舉時, 」爾後公卿亦多垂訝, 遇黄寇犯闕, 莊乃諱之, 時人號秦婦吟秀才。他日撰家戒, 著秦婦吟一篇。 内一聯云「内庫燒爲錦繡灰, 内不許垂秦婦 天街踏盡公

如 則端己「撰家戒不許垂秦婦吟障子」之説尤屬可信。但端己晚年所以深諱言此詩, 號為秦婦吟秀才」之言為不妄。且此詩為端己平生諸作之冠,而其弟藹所編之浣花集竟不收入, 書館伯希和號叁柒捌拾及叁玖伍叁兩本,故寅恪間接直接所得見者,共有七本。德化李氏尚藏 寅恪案,此事最為可疑,以今日敦煌寫本之多,(除翟君所舉五本外,王重民君近影得巴黎圖 本,已售於日人,未得見,不知與所見之七本異同如何。)當時必已盛傳,足徵葆光子「時人 孫氏所指詩中「內庫燒為錦繡灰,天街踏盡公卿骨」二句為其主因,則似不然。何以言之? 據 朝庭詔書尚不以此為諱,更何有於民間樂府所言之錦繡成灰,公卿暴骨乎。即以詩人之篇什 [唐書壹捌貳高駢傳載中和二年僖宗責駢之詔, 杜子美諸將之「早時金盌出人間」即高千里之「園陵開毀」、「洛陽宮殿化為烽」,亦等於「宗 , 亦引駢表中「園陵開毀, 宗廟焚燒」之語。是當 要必有故,

可知其 然則其竟以內庫 疑為端己避謗後所改者, 使此二句果有所甚忌諱, 暴骨於廣明中和之世耶? 端己生平心儀子美,至以草堂為居,浣花名集, 而用心之苦矣。 八忌諱 豈子美可言「園陵開毀,宗廟焚燒」於廣德大曆之時,而端己不得言錦繡成灰, 所在 公卿一 有關全篇主要之結構 聯為說者, 乃不能顯言其故, 亦無不可也。何至併其全篇而禁絶之。今端己取全篇而悉禁絶之者, 則删去之可也。或逕改易之,如唐才子傳作「天街踏盡卻重 既不能删去, 遂作假託之詞耳。以是愈知其所諱之深、 復無從改易, 實不僅繫於此二句已也。 豈得謂 不識 回」即羅氏

秦婦吟者之教正 安達洛陽之路程互證, 寅恪昔年曾與俞君論此,所疑殊不能釋。近日取兩唐書王重榮及楊復光傳,與秦婦吟所述從長 並參以其他史籍,綜合推究,恍然若有所悟,於是假設一説,以求喜讀

茲節録有關史籍之文於下:

舊唐書壹玖下僖宗紀云:

[中和]二年二月(通鑑繫此事於元年四月,詳見考異。)涇原大將唐弘夫,大敗賊將林言於 分佔第宅,俘掠妓妾。賊自灞上分門復入,處存之衆蒼黃潰亂, 王處存率軍二萬徑入京城,賊僞遁去。京師百姓迎處存,歡呼叫譟。是

敗。黄巢怒百姓歡迎處存,凡丁壯皆殺之,坊市爲之流血。自是諸軍退舍,賊鋒愈熾。

又同書壹捌貳王重樂傳云:

州,重榮合勢攻之,擒祥以徇。俄而朱温以同州降, 陰至,數萬攻之。重榮戒勵士衆,大敗之,獲其兵仗,軍聲益振。朝廷遂授節鉞,檢校司 重榮知[河中]留後事,乃斬賊使,求援鄰藩。既而賊將朱温舟師自同州至,黄鄴之兵自華 兵數萬至梁田坡。時重榮軍華陰南,楊復光在渭北,犄角破賊,出其不意, 時中和元年夏也。俄而忠武監軍楊復光,率陳蔡之師萬人與重榮合。賊將李祥守華 賊既失同華, 狂躁益熾。 黄巢自率精 大敗賊軍。

又同書壹捌肆宦官傳楊復光傳云:

逆戰,復光敗之,進收鄧州,獻捷行在,中和元年五月也。復光乘勝追賊至藍橋,丁母憂 鹿晏弘、晉暉、李師泰、王建、韓建等,皆八都之大將也。進攻南陽,賊將朱温、何勤來 時秦宗權叛[周] 岌,據蔡州。復光得忠武之師三千入蔡州,説宗權,俾同義舉。宗權遣將 還。尋起復, 王淑率衆萬人,從復光收荆襄。次鄧州,王淑逗留不進,復光斬之,併其軍,分爲八都。 受韶充天下兵馬都監,押諸軍入定關輔。王重榮爲東面招討使, 復光以兵會

又同書貳佰下黄巢傳略云:

時京畿百姓皆砦於山谷,累年廢耕耘。賊坐空城,賦輸無入,穀食騰踊,米斗三十千。官 乘勝入京師, 軍皆執山砦百姓鬻於賊爲食,人獲數十萬。[中和]二年王處存合忠武之師,敗賊將尚讓, ,賊遁去。處存不爲備,是夜復爲賊寇襲,官軍不利。賊怒坊市百姓迎王師,

新唐書壹捌柒王重榮傳云:

乃下令洗城,丈夫丁壯殺戮殆盡,流血成渠。

將李祥於華州,執以徇。賊使尚讓來攻,而朱温將勁兵居前,敗重榮兵於西關門, 即拜檢校工部尚書,爲節度使。會忠武監軍楊復光率陳蔡兵萬人屯武功,重榮與連和擊賊 韶即副河中行營招討,賜名全忠。[黄]巢喪二州,怒甚,自將精兵數萬壁梁田。重榮軍華 光欲斬之,重榮曰:今招賊,一切釋罪。且温武鋭可用,殺之不祥。表爲同華節度使。 兵夏陽,掠河中漕米數十艘。重榮選兵三萬攻温,温懼,悉鑿舟沉於河,遂舉同州降。復 復光軍渭北, 犄角攻之, 賊大敗。 於是出

又同書貳佰柒宦者傳上楊復光傳云:

俄起爲天下兵馬都監,總諸軍, 與東面招討使王重榮并力定關中。

舊唐書壹玖下僖宗紀云:

中和元年九月,楊復光、 王重榮以河西(中?)昭義忠武義成之師屯武功。

通 貳伍肆云:

中和元年[九月]辛酉,忠武監軍楊復光屯武功。

夢瑣言玖李氏女條云:

甫撰金溪閒談拾貳卷,即見北夢瑣言。) 甚明敏, 唐廣明中黄巢犯闕, 幸蒙提挈, 遂下其山矣。識者謂女子之智亦足稱也。見劉山甫閒談。(寅恪案, 骨肉分散, 善於承奉, 以至於此。 得至於蜀。 無所依託。 大駕幸蜀, 失身之事, 尋訪親眷, 適值鳳翔奏將軍董司馬者, 衣冠蕩析, 非不幸也。人各有偶, 寇盗縱横。 知在行朝, 始謂董生曰: 有西班李將軍女, 乃晦其門閥, 難爲偕老, 喪亂之中, 以身託 奔波隨人, 請自此 閩從事 女弱 之, 劉山 不能

無論其是否為端己本身之假託,抑或實有其人,所經行之路線,則非有二,金溪閒談之李氏 氏女條所紀,亦當日避難婦女普遍遭遇, 匪獨限於李氏女一人也。由是言之, 安東奔之路線, 苟存。端己之出長安, 之出長安, 秦婦吟中述一婦人從長安東奔往洛陽,其行程即端己所親歷也。依秦婦吟所述, 約在中和一 應亦與詩中所言者不殊。此觀於平時交通之情況, 一年二月所謂「黄巢洗[長安]城」之後。蓋長安經此役後,凡非 亦當 在此相距不久之時。但即在此前或此後, 可以推知者也。 大多數之避難者, 秦婦吟之秦婦 +巢黨, 北夢瑣言李 其從長 此婦

寅恪案,

狀, 屯 州 傳 女, 子 軍之八都大將之中, 線自須 軍 此 王重 武 及重 路 適 疑不能不有如秦婦避難之人,及李女委身之事。端己之詩 即使其非從長安西奔達成都, 禁其傳佈者 觸 功 經 線避難之婦女, 近楊 皆前日楊軍 新 一榮軍華陰復光軍渭北 一榮為東面 朝宫閩之隱情。 則從長安西 軍 防 地。 招討 前蜀 其故儻在斯歟? 八都之舊將,後來王蜀開 所遭 出奔於成都者, 復依舊唐書僖宗紀新唐書王 使,復光以兵會之。 創業垂統之君, 遇之情勢,亦應有與金溪閒談所述者, 所以諱莫如深, 犄角敗賊。是從長安東出奔於洛陽者, (若由此路, 儻在斯歟? 如金溪閒談之李氏女, 端己 志希免禍, 又據兩唐書王重榮傳, 國之元勳也。當時復光 北 則唐人謂之南奔也。)而從長安東奔達洛陽 面親事之主(王 重榮傳及通鑑中 以生平之傑構, 流行 其路 建)即 略相 線 和元年[九月]之紀 復光與重榮合攻李祥 是其 世, 亦須 屯軍武功, 近似。 古今之至文, 如秦婦吟之秦婦 0 經近 本寫故國 其 據舊 楊 或會 餘若 軍 唐 防 而竟 晉暉 事 書楊 亂離之慘 兵 地 華 垂戒 一渭之 復光 其路 於華 李 而楊

(丙)詩句校釋

忻 其 關 可信從 於詩中文句之校釋,尚 或無關重要者 皆不贅述。 有須略綴數語, 申述鄙見者, 列舉如下。 至其他校釋,

詩云

翻持象笏作三公,倒佩金魚爲兩史。

周注 Z;

兩史爲柏臺(御史大夫)蘭省(御史中丞)也。

寅恪案, 通典貳壹職官典叁宰相門中書令條略云:

書令,亦置二人。龍朔二年改爲右相。

隋初改中書爲内史,置監令各一人,尋廢監置令二人。大唐武德初爲内史令。三年改爲中

詩意也。 據此,兩史與三公為對文,自指宰相而言。若御史中丞則官階僅正四品下,職位太卑,非端己

Z

寅恪案, 水經注壹玖渭水篇云: 昨日官軍收赤水,赤水去城一百里。

逕望仙宫東, 又北與赤水會。

據此,並參考楊守敬水經注地圖第肆册南伍卷南伍西伍上,準諸地望,此二句與舊唐書僖宗紀

韋

莊

秦婦

吟校箋

[中和]二年二月,涇原大將唐弘夫大敗賊將林言於興平,俘斬萬計。

之事適合。

詩云

逡巡走馬傳聲急,又道官軍全陣入。大彭小彭相顧憂,二郎四郎抱鞍泣。

寅恪案,安友盛本作「官軍」,似較他本之作「軍前」者為佳。下文云「又道官軍悉敗績」可證也。

又王氏校本云:

「彭」倫敦殘本作「臺」,巴黎圖書館伯希和號叁柒捌拾作「大鼓」。

寅恪案,「臺」及「鼓」皆是「彭」之形譌,自不可據以校改。但「大彭小彭」語不易解, |大彭小彭」謂黄巢部下之將時溥及秦彦。 周注

蓋據舊唐書時溥秦彦傳,二人皆彭城人也。又云:

「二郎四郎」即謂黄巢及弟揆。

舉兩唐書黃巢傳為證。

取與時溥傳並觀 寅恪案, 舊唐書壹捌貳時溥傳, 前於論從洛陽東奔路程一節中已詳引, 茲不復録, 以見周説之難通。舊唐書壹捌貳高駢傳附秦彦傳略云 僅就秦彦傳

秦彦者,徐州人。聚徒百人,殺下邳令取其資裝入黄巢軍。巢兵敗於淮南, 乃與許勍俱降

高駢,累奏授和州刺史。中和二年宣歙觀察使竇潏病,彦以兵襲取之,遂代潏爲觀察使,

朝廷因而命之。

故知「大彭小彭」必不謂秦彦時溥。「二郎四郎」疑與「大彭小彭」同是泛稱,非實指黃巢黄揆也 月也。)二人既均不在長安,又俱非黄巢部將,何得在圍城之中,聞官軍將入而相顧以憂乎。 蘇鶚蘇氏演義上云: 月時溥在徐州,秦彦在和州或宣州,(秦彦襲取宣州事, 度入黄巢軍, 中和二年二月以前, 早已降於高駢, 郄將軍書。 此 時溥雖高駢謂其為黃巢外應,(見前引桂苑筆耕集壹壹,告報諸道徵促綱運書及答襄陽)是否詆誣之詞,猶待考實。但其始終未作黃巢部下之將,則事跡甚明。秦彦雖 奏授和州刺史。故以時地考之, 中和二 通鑑繫於中和二年之末, 蓋難定其日 年一

俗呼奴爲邦,今人以奴爲家人也。凡邦家二字多相連而用。時人欲諱家人之名,但呼爲邦 言君但言邦,此皆委曲避就之意也。今人奴拜多不全其禮, 而已,蓋取用於下字者也。又云:僕者皆奴僕也,但論語云: 此文疑有脱誤,俟求善本校之。) 邦字從半拜, 邦君樹塞門。樹猶屏也。不 因以此呼之。

李匡乂資暇集下奴為邦條云:

呼奴爲邦者,蓋舊謂僮僕之未冠者曰豎。人不能直言其奴,因號奴爲豎。高歡東魏用事

時, 門,以句内有樹字,假豎爲樹,故歇後爲言,今兼删去君字呼之。一説邦字類拜字, 杖之。歡諱樹而威權傾於鄰下,當是郡(羣?)寮以豎同音,因目奴爲邦,義取邦君樹塞 相府法曹卒(寅恪案,卒當作辛,見北齊書貳肆北史伍伍杜弼傳。)子炎(?)誤犯歡奴

非唯

之音義釋之,然則「大彭小彭」者,殆與大奴小奴同其義也。 (亦見晁志),濟翁所述,又顯為山東之俗,則當時呼奴為邦,東西皆然。夫俗語之用,原無 見晁公武郡齋讀書志叁下。)濟翁亦唐末人,與端己所處時代近同, 彭邦二音相近,故書為邦者, 蘇氏諱家人為邦, 郎主,是賓則拜。(此文疑有脱誤,俟求善本校之。) 李氏避高歡父樹生諱之説, 宜亦得書為彭。是韋詩中之俗語,似可以蘇李書中所記 雖未必可從, 且德祥居武功之杜陽川 但德祥為光啟中進士, 當時 定

又舊唐書玖陸宋璟傳 Z

當時(武則天時)朝列皆以二張内寵不名官,呼易之爲五郎, 五郎爲卿? 璟曰:以官言之,正當爲卿。若以親故,當爲張五。足下非易之家奴, (據通鑑考異壹壹長安三年九月鄭杲謂宋璟奈何卿五郎條應作鄭杲。)謂璟曰: 昌宗爲六郎,天官侍郎鄭善果 中丞奈何呼 何郎之

通 [鑑貳佰柒唐紀則天后紀長安三年九月鄭杲謂宋璟奈何卿五郎條胡注云::

門生家奴呼其主爲郎,今俗猶謂之郎主。

只謂主人及奴僕, 蓋奴呼主為郎,主呼奴為邦,或彭。故端己以此二者對列,極為工整自然。可知此二句詩意, 即舉家上下全體憂泣而已,非有所實指也。

\(\frac{1}{2}\)

四 面從茲多厄束,一到黄金一升粟。尚讓厨中食木皮,黄巢机上刲人肉。

升粟, 羅氏校本作斗粟,王氏及翟君校本作升粟。巴黎圖書館伯希和號叁柒捌拾及叁玖伍叁俱

作勝粟,周君箋注本從羅校作斗粟。

斗言。故斗粟或斗米值若干,乃當時習用之成語。茲列舉例證,如舊唐書柒肆馬周傳,唐會要 寅恪案,作斗粟雖亦可通,作升粟者疑是端己之原文。考唐人以錢帛估計米粟之價值時, 概以

捌叁租稅上皆載貞觀十一年周上疏云:

舊唐書捌玄宗紀上云: 貞觀之初,率土荒儉, 匹絹纔得一 到米, 而天下帖然。

(開元十三年)十二月已已,至東都,時累歲豐稔,東都米到十錢,青齊米到五錢

又同書壹壹代宗紀云

永泰元年三月庚子,夜降霜,木有冰,歲饑,米斗千錢,諸穀皆貴。秋七月庚子,雨。時

久旱,京師米斗一千四百,他穀食稱是。

又同書壹壹肆魯炅傳云

[南陽郡]城中食盡,煮牛皮筋角而食之,米卧至四五十千。

又同書壹貳叁劉晏傳云

時新承兵戈之後,中外艱食,京師米價斗至一千。

又同書壹捌貳高駢傳云:

既而蔡賊楊行密自壽州率兵三萬乘虚攻[揚州]城,城中米到五十千。

又同書貳佰上安禄山附慶緒傳云:

[相州]城中人相食,米斗錢七萬餘。

又同書貳佰下黃巢傳(前文已引。又通鑑貳伍肆中和二年條亦略同。)云: 穀食騰踊,米斗三十千。

新唐書伍壹食貨志略云:

納錢度道士僧尼萬人,而百姓殘於兵盗,米斗至錢七千。 貞觀初,戶不及三百萬,絹一匹易米一斗,至四年米斗四五錢。及兩京平,又於關輔諸州

又同書伍叁食貨志云:

又同書玖柒魏徵傳云:

於是帝(太宗)即位四年,歲斷死二十九,幾至刑措,米斗三錢。

又同書壹肆柒魯炅傳云:

[南陽郡]城中食盡,米斗五十千。

又同書壹肆玖劉晏傳云:

時大兵後,京師米斗千錢。

又同書貳貳伍上安禄山傳附慶緒傳云:

陸宣公諫苑集奏議貳,請减京東水運收脚價於緣邊州鎮蓄儲軍糧狀略云:

决安陽水灌[相州]城,城中棧而處,糧盡易口以食,米斗錢七萬餘。

故承前有用一斗錢運一斗米之言,至使流俗過言,有用一斗錢運一斗米之說。

又同集奏議叁,請依京兆所請折納事狀云:

度支續奏,稱據時估豌豆每斗七十價已上,大豆每斗三十價已下。

王楙野客叢書捌云:

嵇叔夜養生論曰:「夫田種者一畝十斛,謂之良田,此天下之通稱也。」不知區種可百餘

而損益三升,又何其寡也。 皆斗字耳。蓋漢之隸文書斗爲斗,字文絶似升字。漢史書斗字爲母字, 安有一畝收百斛之理? 僕嘗以二説而折之理, 俱有一字之失。嵇之所謂斛, 前漢書食貨志曰:「治田勤則畝益三升, 不勤損亦如之。 字文又近於斛 漢之所謂 一畝

字,

恐皆傳寫之誤

若依羅氏校本作一斗黃金一斗粟, 猶是唐人常語, 不足為奇。今作一斗黃金一升粟, 之一字, 敦煌寫本之故, 故甚其詞 以致計算幾全不合。 又劉復君敦煌掇瑣中 差別至微, 即第貳陸壹頁叁行之斗字,係依原寫之形, ·特意形容之筆,此一字頗關 聯類牽及校正敦煌掇瑣之誤, 故易於誤認 寅恪初頗致疑 輯陸陸, 天寶四載豆盧軍和糴帳所載之斗估,除二處外,餘悉誤作升估 並舉其近日讀漢簡之經驗為例。 以未見原寫本, 重要,因恐讀者等閒放過,遂詳引史籍以闡明之。又以 附識 於此 尚未改易者, 不敢臆斷。後承賀昌羣君告以古人所書斗 寅恪復證以劉書之幸而 遂豁然通解。 然則端己此詩 則是端己 未誤

復次, 尚 及叁玖伍叁俱作勝粟, 可多舉 唐人寫本之多作卧勝者, 例證 以其關係較遠, 尤足證端己詩本作升粟, 且前所舉諸例已足證明, 乃因斗升二字形近易誤之故。 而非斗粟也。 故不復詳具焉。 今巴黎圖書館伯希和 至其他舊籍中升斗二字之誤者。 號叁柒捌拾

藏洞玄部記傳類(第叁貳柒册恭上)杜光庭録異記叁忠(此條承周一良先生舉以見告者。)略

工劉萬餘[等]竊相謂曰:「大寇所向無敵,京師糧貯甚多,雖諸道不賓,外物不入,而支 持之力,數年未盡。吾黨受國恩深,志効忠赤,而飛竄無門,皆爲逆黨所使。吾將貢策, 十文。日計左右軍支米四千石,錢八千貫。歲餘功不輟,而城未周,以至於出太倉穀以支 之安也。」黃巢喜,且賞其忠節。即日使兩街選召丁夫各十萬人築城。人支米二升,錢四 爲難,請自望仙門以北,周玄武白虎諸門,博築城池,置樓櫓却敵,爲禦捍之備,有持久 直左右。因從容言曰:「長安苑囿城隍,不啻百里。若外兵來逼,須有禦備。 請竭其糧。外貨不至,内食既盡,不一二年,可自敗亡矣。」萬餘,黄巢憐其巧性, 士等,潛議奔行朝,爲羣盗所覺,誅戮者至多。自是阨束,内外阻絶。京師積糧尚多,巧 僖宗幸蜀,黄巢陷長安,南北臣僚奔問者相繼。無何,執金吾張直方與宰臣劉鄴于悰諸朝 然後剥榆皮而充御厨。城竟不就。萬餘懼賊覺其機,出投河陽,經年病卒。 不爾 固守

同,廣成浣花兩作品之間,亦有關係耶? 杜記韋詩所言多足參證,而「阨東」及「剥榆皮而充御廚」等語,尤可注意。豈以時地相

詩云

六軍門外倚僵尸,七架營中填餓殍。

韋莊秦婦吟校箋

翟君云, 乙本架作策, 其他校本皆作架。巴黎圖書館伯希和號叁柒捌拾作賈,旁注架。

翟君又云:

七架營之地址不可考,惟長安志卷六有七架亭,在禁苑中,去宫城十三里,在長安故城之 未知即其地否。

寅恪案,穆天子傳壹云:

天子乃樂□賜七萃之士戰。

郭注云:

故七萃即禁軍之義, 唐人文中頗習用之。如白氏長慶集叁陸駙馬都尉鄭何除右衛將軍制云, 萃,集也, 亦猶傳有興大夫,皆聚集有智力者,爲王之爪牙也。

俱為萃字之形誤,而賈字又係架音之譌轉也。蓋六軍門外,七萃營中,皆相對為文,若作七架 集陸,扶風馬公(存亮)神道碑銘云,「取材能於七萃」等,皆是其例,不待多舉。然則策字架字 「周設七萃」,同集叁柒除户部尚書王泌充靈鹽節度使制云,「且司七萃」,李衛公會昌一品集別

營,則不可解矣。

詩云

路旁試問金天神,金天無語愁於人。

翟君謂丁本金天神下有注云,華嶽三郎。

期秦婦吟補注),皆是也。但均未徵引最初出典,茲特逐録唐大詔令集柒肆典禮類嶽濱山川門 先天二年八月二日封華岳神為金天王制,以資參考。 寅恪案 周注引西嶽華山志,黄仲琴君引逸史金天王葉仙師事(中山大學文史月刊第壹卷第伍 制云

門下惟岳有五,太華其一。表峻皇居,合靈興運。朕惟恭膺大寶,肇業神京, 至誠所祈

神契潛感。頃者亂常悖道, 厥功茂矣,報德斯存。宜封華岳神爲金天王。仍令龍景觀道士鴻臚卿員外置越國公葉 有甲兵而竊發。 仗順誅逆,猶風雨之從助。 永言幽贊, 寧忘仰

詩云

法善, 備禮告祭, 主者施行。

旋教魔鬼傍鄉村, 誅剥生靈過朝夕。

寅恪案, 安友盛寫本作魘。其有作魔者非是。何以言之,據北夢瑣言壹壹關三郎入關條 通亂離後,

苦。[弘]農楊玭挈家自駱谷路入洋源,行及秦嶺, 坊巷訛言關三郎鬼兵入城,家家恐悚。罹其患者,令人寒熱戰慄, 回望京師, 乃曰, 此處應免關 三郎相隨 亦無大

也。語未終,一時股慄。斯又何哉。夫喪亂之間,陰厲旁作,心既疑矣,邪亦隨之, 正謂是也。愚幼年曾省故里,傳有一夷,迷(據端已詩「天遣時災非自由」語,「迷」字

而

止。

疑當作「遣」)鬼魔人, 間巷夜聚以避之, 凡有窗隙悉皆塗塞。 其鬼忽來即撲人驚魘。 須臾

則 「知端己所謂「旋教魘鬼傍郷村」即瑣言所謂「陰厲旁作」及「傳有一夷,遣鬼魘人」也。

字, 合, 又王劉修業夫人秦婦吟校勘續記(學原第壹卷第柒期)謂丁巳兩本「金天神」,下注「華岳三郎」四 是華岳三郎與關三郎實非有二, 三郎遂亦得以關 而端己詩「天(「天」即金天神之「天」)遣時災非自由」及「旋教魘鬼傍鄉村」與瑣言所記者適 為號耶? 俟考。 明矣。至華岳三 郎亦可稱關三郎之故, 豈亦潼關距華岳不

理, 獻詩為質於忠於唐室之大臣如周寶,豈有作斯無君之語,轉自絕其進謁之路者乎?此説甚乖事 高駢者, 金天神一節之本旨,在述當時「時災」即時疫流行之事, 必非端己詩旨, 尚為附帶之筆。至以此節乃指斥僖宗為言者, 不待詳辨也。 鄙意不然。蓋以避黄巢之士人如端己, 其責望山東藩鎮之殘民肥己不急國難如

詩云

前年又出楊震關 舉頭雲際見荆山。 如從地 府到人間, 頓覺時 清天地閒。

取道出關 此言脱 途中望見荆山,遂述及荆山所在地之陝虢主帥能保境安民, 出黄巢勢力範圍,轉入別 一天地。 實為端己痛定思痛之語, 此亦聯想措詞之妙也。 其感慨深矣。

[元鼎]三年冬徙函谷關於新安。(應劭曰,時樓船將軍楊僕數有大功,耻爲關外民。 乞徙東關,以家財給其用度。武帝意亦好廣闊。於是徙關於新安,去弘農三百里。)

又據水經注壹伍洛水篇云:

散關鄣, 自南山横洛水, 北屬於河, 皆關塞也, 洛水自枝瀆又東出關, 惠水右注之。 世謂之八關水。戴延之西征記謂之八關澤, 即楊僕家僮所築矣。 即經所謂

及同書壹陸穀水篇云:

僮七百人築塞, 徙關於新安, 即此處也。 函谷關西, 關高險陋, 路出廛郭。漢元鼎三年樓船將軍楊僕數有大功, 恥居關外, 穀水又東逕函谷關南,東北流,阜澗水注之。水出新安縣東,南流逕毋丘興墓東, 請以家 又南逕

又元和郡縣圖志伍河南府新安縣條略云:

本漢舊縣,屬弘農郡。

函谷故關在縣東一里, 漢武帝元鼎三年爲楊僕徙關於新安。 今縣城之東有南北塞垣, 楊僕所

及同書陸虢州湖城縣條云:

韋莊秦婦吟校箋

荆山在縣南,即黄帝鑄鼎之處。

然則楊僕關正在新安之地,與下文「明朝又過新安東」之句行程地望皆相符合。頗疑「楊震關」乃 有西京之樓船將軍, 楊僕關」之譌寫,始由傳寫者習聞東京之「關西夫子楊伯起」,(見後漢書捌肆楊震傳。)而不知 遂以致誤耶?

詩云

明朝又過新安東,路上乞漿逢一翁。

Z

鄉園本貫東畿縣,歲歲耕桑臨近甸。歲種良田二百廛,年輸户稅三千萬。小姑慣織褐絁 中婦能炊紅黍飯。

寅恪案,元和郡縣圖志伍河南道壹河南府條云:

新安縣畿

四州,未諦。「年輸户稅三千萬」句,翟君謂「羅校易千為十,似是」。 籍,故曰「鄉園本貫東畿縣」也。周注引唐書方鎮表至德元載置東畿觀察使, 據此,新安縣為隷屬東都河南府之畿縣。此老翁既遇於新安以東之路上,自是新安縣或河南府 領懷、 鄭、汝、

寅恪案,羅氏意三千萬為數太多,故易以三十萬,不知詩尚有:

明朝曉至三峯路, 百萬人家無一户。

所可注意者,良田二百廛,及户税三千萬一聯,正指唐代地户兩稅。據唐會要捌叁租稅上略 之句,其實三峯之下, , 豈有百萬户乎, 詞人之數字,僅代表數量衆多而已, 不必過於拘泥也。

户四千文,下下户五百文。 大曆四年正月十八日敕,天下及王公已下,自今已後,宜准度支長行旨條,每年稅錢上上

則廣明以後,當更有增益,而周注引通典武德元年詔上户丁稅年輸十文之語,謂:

原本作三千萬,數過多,羅校易千爲十,似是。户稅三十萬則有三萬户。

據通典陸賦稅下大唐條云:

蕃人(册府元龜作蕃胡乃原文未經改易者。)内附者,上户丁税錢十文,次户五文,下户免

較大曆時增多,豈可以武德時內附蕃胡之稅率以計算廣明一般平民之户數乎?丁、戊兩本作 然則通典此節乃專指蕃胡內附者而言,不可以概括當時一般稅率。況廣明以後, |褐絁袍」,他本作「褐絁袍」,羅王校本皆易「絶」為「絁」。 一般稅率當更

寅恪案,作「絁」是也。據敦煌掇瑣中輯陸陸,載天寶四載和糴准旨支二萬段出武咸(威)郡帳

致辨,特拈端已所以諱言秦婦吟之公案,以待治唐五代文學史者之參究。 近人秦婦吟之解釋,及韋氏年譜之編載,鄙見尚有不敢苟同者。以其無關本篇主旨,故不一一 内,有伍佰伍拾匹河南府絁。此翁本貫河南府新安縣,則「絶」之校改作「絁」,信有明徵矣。又

南學報拾卷貳期;章莊秦婦吟校箋,一九八〇年上海古籍版寒柳堂集收錄, 秦婦吟校箋,一九四〇年昆明刊本,係據前文增訂改名;秦婦吟校箋舊稿補正,一九五〇年嶺 (陳寅恪先生關於秦婦吟一詩的校箋, 先後發表過數次: 讀秦婦吟, 清華學報第拾壹卷肆期; 續有補正。)

狐臭與胡臭

舉事例 通解 醫書中有所謂腋氣之病,即狐臭者,其得名之由,或與此端有關,但平生於生理醫藥之學絶 中古華夏民族曾雜有一部分之西胡血統,近世學人考證之者,頗亦翔實矣。寅恪則疑吾國中古 ,故不敢妄説,僅就吾國古來腋氣之異稱,及舊籍所載有腋氣之人,其家世種族兩點, , 聊供談助而已, 尚希讀者勿因此誤會以為有所考定。幸甚幸甚! 無

人有血氣不可,液下有如爭呱之氣,謂之呱臭,石隋巢元方諸病源候總論伍捌小兒雜病諸候陸狐臭條云:

人先有此病, 人有血氣不和, 染著小兒。 腋下有如野狐之氣, 謂之狐臭,而此氣能染,易著於人。小兒多是乳養之

有腋氣, 唐孫真人思邈千金要方柒肆之玖胡臭漏腋第五論曰: 寅恪案,腋氣今仍稱狐臭,如報紙藥品廣告及世俗語言中猶常見之。其得名之由,依巢氏之 言,以為「有如野狐之氣」,義自可通。但今日國人嘗遊歐美者,咸知彼土之人當盛年時, , 必非血氣不和。其與染著無涉, 更不待言也 大抵

有天生胡臭者, 爲人所染胡臭者。天生臭者難治,爲人所染者易治。

草綱目編著之時,既不可認「胡」為「狐」之同音假借,而諸書俱作「胡」,不作「狐」,亦不得謂以 之。「胡臭」之「胡」,自是胡人之「胡」,蓋古代「胡」「狐」二字雖可通用,但在千金方仁齋直指本 音近之故, 傳寫致譌。 頗不易決。 南宋楊士瀛仁齋直指有腋下胡氣之目,李時珍本草綱目壹壹金石類緑礬條附方中 考唐崔令欽教坊記 然則腋氣實有「狐臭」及「胡臭」不同之二名可知也。惟二名孰較原始與正 Z 亦引

范漢女大娘子亦是竿木家, 開元二十一年出内, 有姿媚, 而微愠羝。

文下原注云:

世擅其業者也。(詳舊唐書貳玖音樂志貳,史浩鄮峯真隱漫録肆伍柘枝舞大曲附柘枝舞小考等, 及柘枝舞者,而此種伎舞乃中央亞細亞輸入我國藝術之一,其伎舞之人,初本西胡族類,又多 寅恪案,范漢女大娘子其先代之男女血統,無從得知,但竿木之伎本附屬於唐代立部伎之雜戲 茲不贅述。)據此, 則范漢女大娘子之血統, 殊有西胡人種混雜之可能。其「微愠羝」者,

字德潤, 本蜀中土生波斯也。 少小苦心,屢稱賓貢。所吟詩句往往動人。

録肆斥亂常條

先世

|西胡血統遺傳所致耶? 五代何光遠鑑誡

錦城烟月之士,與李生長爲善友,遽因戲遇嘲之, 李波斯强學文章。假饒折得東堂桂, 胡臭薰來也不香。 李生文章掃地而盡。詩曰:

異

北宋黄休復茅亭客話貳李四郎條云:

玹舉

止温雅,

頗有節行,

以鬻香藥爲業,

善弈棋,

好攝養,

以金丹延駐爲務。

暮年以爐鼎

李四郎名弦, 字廷儀。 其先波斯國人, 随僖宗入蜀, 授率府率。 兄珣有詩名, 預賓貢焉。

血 足與千金方仁齋直指本草綱目等書互相印證,而李珣本人則因此條記載之故,亦發生體有腋氣 寅恪案, 為不合。因其復似野狐之氣 統確 種與華 珣本身是否實有腋氣,抑尹鶚僅假「胡臭」之名以為譏笑,誠難確定。但鑑誡録之作「胡臭」, 疑也。總之,范漢女大娘子雖本身實有腋氣, 自不待言。 即以前述之二人而論, 是西胡, 夏 何黄兩書皆謂珣出自波斯, 家無餘財, 民族 血統混淆既久之後,即在華人之中亦間有此臭者,儻仍以胡為名, 但我國中古舊籍, 而本身則僅有腋氣之嫌疑。 唯道書藥囊而已。 遂改「胡」為「狐」矣。若所推測者不謬,則「胡臭」一名較之「狐 則不得謂腋氣與西胡無關。疑此 明載某人體有腋氣, 且其兄玹又以鬻香藥為業。故珣為西胡血統,絶無可疑。 證據之不充足如此,而欲依之以求結論 ,而其血統則僅能作出於西胡之推測。 而其先世男女血統又可考知者, 腋氣本由 西胡 種人得名, 自宜有人疑 迨 其 李珣雖 恐 不易 西 不

臭」,實為原始,而且正確歟?

未嘗一及腋氣,故略舉事例,兼述所疑如此。 又孫思邈生於隋代,與巢元方為先後同時之人,故不可據巢書作「狐臭」而孫書作「胡臭」,遽謂 「狐臭」之稱尚先於「胡臭」也。世之考論我國中古時代西胡人種者,止以高鼻深目多鬚為特徵

(原載一九三七年六月清華大學文學會編語言與文學)

獨能 劉注 乖 無善本。 校定楊記。 寅恪昔年嘗與徐君高阮論六朝人合本子注之書,因舉洛陽伽藍記為例證。 義之合本子注也。 不知徐君於意云何? 裴世期受韶采三國異同,以注陳志。其自言著述之旨,以為注 每多舛互。凡承祚所不載,而事宜存録者,則罔不畢取, 恢復楊記之舊觀 或出 雖清儒校勘至勤,蔚成顯學,惜合本子注之義,迄未能闡發。 知其書亦廣義之合本子注也。 近得來書云, 事本異, 劉孝標世説新語 而疑不能判者 兼可推明古人治學之方法。他日讀裴劉酈三家之書者,寅恪知其必取之 將刊行之,以質諸世之通識君子,並徵序言。寅恪請更推 注 則並皆抄内, 經後人删略, 酈善長之注水經, 以備異聞。 非復原 本。 其體制 據此 以補其闕。又同説一事,而辭 幸日本 言之, 蓋 同 然則徐君是 裴劉 猶存 裴氏三國志注 徐君謂鄙説 殘卷 而此 得藉 書傳 論 本之出,不 不謬, 以 世 以 實一廣 復徐 窺見 記 有 遂

千九百四十八年歲次戊子三月十五日陳寅恪書於北平清華園

相參證無疑也

原載 九四八年中央研究院歷史語言研究所專刊之四十二重刊洛陽伽藍記書首

朱延豐突厥通考序

敵於中 朱君延豐前肄業清華大學研究院時,成一論文,題曰突厥通考。寅恪語朱君曰,此文資料疑尚 浪漫之文學, 朱君從三台東北 曩以家世 損之又損之義,捐棄故技。凡塞表殊族之史事,不復敢上下議論於其間。轉思處身局外,如楚 寅恪平生治學,不甘逐隊隨人,而為牛後。年來自審所知,實限於禹域以內, 西北 所謂馮軾而觀士戲者。是今日之不欲更置詞於是書之篇首而侈言得失,亦已明矣。雖然 原矣。 藏之簽 論斷或猶可商 因緣, 史地。 中, 蓋當 殊有連繫。此稍習國聞之士所能知者也。 後來今文公羊之學, 獲聞光緒京朝勝流之緒論。 大學以書來告日, 前所為突厥通考已詳悉補 隨時 日欲 ,請俟十年增改之後,出以與世相見,則如率精鋭之卒,摧陷敵陣, 修正。 痛矯時俗輕易刊書之弊, 雖或過慎, 迄於今日, 忽已十年。 遞演 為改 其時學術風氣, 制 疑古, 值南海 西北史地以較為樸學之故,似不及今文 流風 治經頗尚公羊春秋, 乙部之學, 正,將刊佈於世, 亦有所不顧也。朱君不以鄙見為不 所被, 戦起, 與近四十年間變幻之政治: 寅恪歸自香港 願得 故僅守 寄居雁 一言以為序 可無

但以嘗與朱君初治西北民族史之時,一相關涉,終亦不得不勉徇其請,為置 疑 經 大 死 不可更遲刊行, 振海之不可禦遏。 學其句,為朱君誦之。兼藉以告並世友朋之欲知近日鄙狀者。 刊佈之所由也。龔自珍詩云,但開風氣不為師。寅恪之於西北史地之學,適同璱人之所志 學流被之深廣。惟默察當今大勢,吾國將來必循漢唐之軌轍,傾其全力經營西北,則可 考自古世局之轉移,往往起於前人一時學術趨向之細微。 以與世相見,而寅恪今雖如退院老僧,已不躬預擊鼓撞鐘, 然則朱君是書乃此日世局潮流中應有之作。 從事 迨至後來,遂若驚雷破柱, 補正, 既歷十年之久, 一詞,以述是書遲 高唱伽陀之盛集 以無

一九四二年歲次壬午十二月三日陳寅恪書於桂林雁山別墅

(原載一九四三年一月讀書通訊第伍捌期)

俞曲園先生病中囈語跋

嘗與平伯言:「吾徒今日處身於不夷不惠之間,託命於非驢非馬之國,其所遭遇,在此詩第貳 值 可移易。 故以觀空者而觀時, 曲 理也。此詩之作, 摩尼教語), 為奇者亦未為得也。天下之致賾者莫過於人事,疑若不可以前知。然人事有初中後三際 ·其氣機觸會,探演微隱以示來者,宜所言多中,復何奇之有焉! 園先生病中囈語不載集中,近頗傳於世。或疑以為偽,或驚以為奇。疑以為偽者固非, 當時中智之士莫不惴惴然睹大禍之將屆,況先生為一代儒林宗碩, 猶物狀有線面體諸形。 ,在舊朝德宗景皇帝庚子辛丑之歲,蓋今日神州之世局,三十年前已成定而不 天下人事之變,遂無一不為當然而非偶然。既為當然, 其演嬗先後之間, 即不為確定之因果,亦必生相互之關係。 則因有可以前知之 湛思而通識之人,

Ш

雖不

一可即,

但知來日尚有此一境者,

|離意別傳(見後漢書列傳叁壹鍾離意傳章懷注所引)略云:「意為魯相,〔發〕孔子教授堂下牀

未始不可以少紓憂生之念。然而其用心苦矣。」

第陸首之間,

至第柒首所言,

則邈不可期,

未能留命以相待,

亦姑誦之玩之, 譬諸遥望海上神

六四

首所懸甕中素書, 文曰, 後世修吾書董仲舒。」所言記莂名字, 失之太鑿, 不必可信。而此詩 之當然而非偶然者歟? 戊辰三月義甯陳寅恪敬識。 末首曰:「略將數語示兒曹。」然則今日平伯之録之詮之者,似亦為當時所預知。此殆所謂人事

(原載清華週刊第叁柒卷第貳期五二九號,一九三二年三月五日版)

讀吳其昌撰梁啟超傳書後

人家國 緣, 怪之奇觀。深感廉耻道盡,至為痛心。至如國體之為君主抑或民主,則尚 者, 實有不獲已之故。 任公先生殁將二十年, 腐惡之政治絕緣, 勢不得不然。 m 異哉所謂國體問題者」一文出,摧陷廓清,如撥雲霧而覩青天。然則先生不能與近世政治 死。 以為先生之不幸。 事。 傷哉 況先生少為儒家之學, 任公先生高文博學, 是説也, 此則中國之不幸, 非獨先生之不幸也。 其弟子吳子馨君其昌,始撰此傳。其書未成,僅至戊戌政變,而子馨 憶洪憲稱帝之日, 余竊疑之。 本董生國身通一之旨, 近世所罕見。 嘗讀 然論者每惜其與中國五 元明舊史, 余適旅居舊都, 慕伊尹天民先覺之任 見劉藏 又何病焉? 其時 春姚逃虚皆以世外閒身而 頌美袁氏 十年腐惡之政 為其 次者。 功德者 其 不 能與 治 迨 不能 先 當 絶 極 生 醜 時 與 絶 幅

子馨此

叙戊戌政變,

多取材於先生自撰之戊戌政變記。

不

盡實

子

馨撰

此傳時

亦為一

時之情感所動盪

故此

傳中關於戊戌政變之記

述,

猶有待於

此記先生作於情感憤

激之時, 所言

他日之考訂增改者也。

一六六

先祖許之。 堂。先祖 至長沙 夫戊 變法者 不敢以舊 為漢奸 干霄之火, 邪堂答問 其與 惟先 燭 新會先生 極 (戌政變已大書深刻於舊朝晚季之史乘, 主 燼 相 、歷驗 生至 以 及油 事 講 或 傾 蓋有 不過有開議會等説而已。 大 為 時 服 」駁斥南海公羊春秋之説, 長沙主 1 痛哭 聘新會至長沙。 詢之先君, 先君對以曾見新會之文, 其所論説 務學堂本末。 污之跡 問 居 不同之一 務欲借鏡西國以變神州舊法者,本自不同。故先祖先君見義烏 羣欲得殺之而甘心者也。 許為孤忠閎識。 長沙時, 丁丑春 南 歸。 講時務學堂之始末, 源 蓋崇陵 余隨宦巡 其 先是嘉應黃公度丈遵憲, 余偶 後治 未可混一論之也。 新會主講時務學堂不久, 多患發熱病, 乙夜披覽之餘所遺留者也。 先君亦從郭公論文論學, 遊 軍 故宫 惟隨來助教韓君之評語, 署, 治民 時 深以為然。 博 至南海康先生治今文公羊之學, 則關 方 物 益知 其一時之成敗是非, 院 童 咸豐之世, 稚, 係先世之舊聞, 不得不補叙 中國 見清 據是可知余家之主變法 懵 「舊法之不可不變。 力薦 德宗 無 知 先祖 南海先生於先祖 歸寓舉以奉告先君 而郭公者, 識。 所 頗涉民族革命之意。諸生家 閱 亦應進 後遊學 似勝 舊 天下後世, 書 中, 於其師, 亦頌美 士舉 其所評學生文卷, 歸 後交湘 國 有 附會 於此, 時 其思. 西 居京 請聘其 自有公論, 不如捨 務學 而 陰郭 先 法 朱 孔 先 君 鼎 子改 想源流之所在 師 並明當 堂 君 È 因言 甫 當 筠 晚歲 章 先生 仙 講 制 時 親 程 而 辭意未 屬 時 侍 見 纮 聘 以 士 時之言 多病 聘梁。 不必 新會 言 大 郎 員 務 册 夫 明

與 新會亦去長沙。 長 沙 Ŧ 吾 祭酒先 此 新 謙 會 主 相 講 與 往 時 還者。 務學堂之本末, ·葵園 先生 一見之, 而其所以至長沙者, 大 得 挾 以 詆 實由先君之特薦。 新 政。 韓 君 因 其 職 後先 未

坐「招引奸邪」鐫職,亦有由也。

者發令而解散之矣。 戌政變後十 而 復甚 迫 則 於事 知 囂 Ŧī. 其憂 勢, 塵上。 + 年來, 餘年 噤不 傷苦痛, 余少喜 自新會殁, 又十餘年 一得發。 如 而 車 中 不僅 國始 臨川 輪 因讀 之逆轉, 如陸務觀所云, 新法之新, 開 國會 此 傳 ,其紛亂 似有合於所謂退化論之説 略書數 而老同 中日戰起。 語, 以元祐黨家 妄謬,為天下指笑,新會 凍 付稚女美延藏之。 水迁叟之迁。 九縣三精, 話 貞元朝士之感 者。 蓋驗 飆回 是以 美延當知乃 霧 以人心之 所嘗目 塞 論 已也。 學 而 祖, 論 厚 所 乙酉 治 翁 薄 謂 此 民 亦 孟 時 迥 民 主 助 生之 悲 異 政

曳

陳寅恪書。

蓮花色尼出家因緣跋

義, 譬喻經卷下第叁柒節,有大婦因妒以針刺殺小婦兒,致受惡報事。與此篇 誓惡報」二句,其中「七」字先後再見。若言俱「六」字之譌,似不可能。又鳩摩羅什譯衆經撰雜 緣也。佛教故事中關於蓮花色尼者頗多。此寫本所述,即其一種。寅恪初取而讀之,見所謂七 花色尼前生宿業適相符合。其為與此篇故事有關,自無疑義。茲節録彼經大意,並其文中涉及 種呪誓惡報僅載六種。疑「七」字為「六」字之譌。或寫本有脱文,遺去一種惡報。及玩首尾文 平圖書館藏敦煌寫本諸經雜緣喻因由記第一篇,其末云「號稱蓮花色尼」。蓋蓮花色尼出 ,乃知其不然。何以見「七」字非「六」字之誤? 以此篇有「設盟作七種之誓」及「作如是七種呪 佛答阿難問中所 述蓮 家 因

知爲大婦所傷,便欲報讎。 昔有一人兩婦。大婦無兒,小婦生一男。大婦心内嫉之,以針刺兒顋上,七日便死。小婦 關齋。即從比丘受八戒齋,後七日便死,轉身來生大婦爲女。端正,大婦愛之。年一歲 問諸比丘,欲求心中所願,當修何功德?諸比丘答言,當受持

七」字者,以資比較

端正, 兒,汝今(令)懊惱已七返,汝前後過惡皆可度。此婦今行受戒,汝斷其道。汝世世當入泥 婦聞此語, 大,垂當出門,便復死亡,令我憂愁。沙門言,汝家小婦本坐何等死?小婦兒爲何等死? 從乞。沙門見婦顏色憔悴,言,何爲乃爾?婦言,前後生七女,黠慧可愛,便亡。此女最 犁中。今現蛇身,何如此婦身? 蛇聞沙門語,自知宿命。持頭著地,不喘息。沙門廐願 前後七返,是汝怨家欲以憂毒殺汝。汝試往視棺中死女,知復好否?婦往視之,便爾壞 棺中,不肯蓋之。 命終。便生人中,受戒作優婆夷。 女死, 沙門知之。沙門謂蛇曰,汝後世世更作他小婦,共相酷毒,不可窮盡。大婦一反殺 大婦悲咽摧感, 劇於小婦。如是七返, 或二年, 或三年, 或四五年, 或六七年。 今汝二人宿命更相懊惱,罪過從此各畢,於是世世莫復惡意相向。二俱懺悔訖, 臭不可近。問何故念之?婦即慚愧,便藏埋之,從沙門求受戒。沙門言, 倍勝於前。 默然不答,心中慚愧。沙門言,汝殺人子,令其母憂愁懊惱,故來爲汝作子, 便作毒蛇, 日日看視, 死屍光顏益好, 勝於生時。有阿羅漢往欲度脱, 最後年十四,已許人。垂當出門,即夜便卒死。大婦憂惱不 知婦當行受戒,於道中待之,欲嚙殺之。 婦行, 蛇遂遮前, 不得前 可言, 明日來詣寺 到其

據此,

七之為數,乃規定不移之公式。故作呪誓惡報,亦應依此公式作七種。然則此篇之「七」

明, 此篇 字,非「六」字之誤 經 傳寫之為 能全部遺去 時容有無意中 於篇首起, (三)被水溺 雑緣 乃知 所舉 殊無關少之痕 種者, 喻 其説 惡 大 逐節詳悉叙述, 報之數 由 不載一字。且篇中歷叙各種惡報,至蓮花色尼投佛出 安知 亦不 記者 或無心之脱 脱 (四)自身生埋。(五)自食兒肉。(六)父母被火燒。共六種惡報, 漏之事。前者則記一 H 非 跡。則此篇七種惡報,只載六種者 能。 傳寫 益可因此證明。或謂「七」字固非「六」字之誤,但七種惡報,僅載六種, 有所惡忌 與所叙惡報之事 時, 蓋此 漏,二種假定俱已不能成立。 復於篇末佛答阿難問中, 無意中 ,故意逈削 篇蓮花色尼前生所設之(一)夫被蛇槃殺。 惡報, 所脱漏乎? 為此説者,頗似言之成理。 不相符合。 種惡報。 必累百言,或數十言。傳寫時無意中縱有脱 茲從印度原文資料中, 重舉各種惡報之名。 而未及改易文中之「七」字為「六」字, ,其非傳寫時無意中脱漏 僅餘 一可能之設想, 家止 (一)生兒被 皆意義聯貫, 次序分 後者其文甚簡 補其所闕之一 即編集或録寫 迨詳繹此篇首尾文 皆 ,又可知矣。 應驗 狼 喫, 種惡 遂致 此 傳寫 及 ifij 何 既

伍 檢巴利文涕 述母女共嫁一夫, 其夫即其所生之子事。又見於涕羅伽陀(此名亦依善見律毘婆沙壹序)第壹貳肆恆河岸比丘篇第壹貳柒及第壹貳捌偈。 利伽陀(此名依善見律毘婆沙壹序品之音譯。)第陸肆蓮花色尼篇第貳貮肆及第 據法護撰涕利伽陀此篇注 解

報,

測

其所以逈削之故於下。

異而 共嫁於其所生之子。 學會本第壹玖伍至第壹玖柒頁。)所載此尼出家因緣,與敦煌寫本 為敦煌寫本所無者, 迨既發覺, 即蓮花 乃羞惡而出家焉 色尼屢嫁。 而所生之子女皆離失, 不復相識 大抵相同, 惟其中有一事绝 復與其所生之女

意之逈 但蓮花色尼與其女共嫁其子之事,見於偈頌之本文,決非注解中其他後來傅會之本事可比。 印度佛教經典注解,每喜徵引往昔因緣。若一考其實,則多為後來所附益,而非 難説處胎會壹叁(法護譯胞胎經與此經同,而其文較簡。 煌寫本備載蓮花色尼出家因緣中其他各節, 為全篇最要之一 用是激發羞惡之心, 而非 事, 傳寫時無心之脱漏 即蓮花色尼出家關鍵之所在。凡叙其出家始末者,斷不容略去此節。今敦 且可藉之闡明不得不斷欲出家之理。 似不容疑。 考佛藏中往往以男女受身之由, 大抵與巴利文本相同。 · 云: 如大寶積經卷五十五佛為阿 獨關此聚隸之惡報, 推本於原始聚 原始所應有。 其為故

是己有。若不起此瞋愛 如是中陰欲受胎時, 先起二種顛倒之心。 於父生瞋, 父流胤時, 謂是已有。 云何爲二? 所謂父母和合之時, 若是男者, 若是女者,於父生愛,於母生瞋,母流胤時,

又大寶積 經 卷 伍 陸 佛説 八胎藏 會壹肆

心者,

則不受胎。

又彼中有欲入胎時, 心即顛倒。 若是男者, 於母生愛, 於父生憎。若是女者,於父生愛,

又瑜伽師地論壹本地分中意地第貳之壹云:

心亦復爾。生此欲已,或唯見男。或唯見女,如如(如是如是?)漸近彼之處所。如是如 父母行此邪行,乃起顛倒覺,見已自行。見已自行,便起貪愛。若當欲爲女, 彼於爾時, 若欲爲男,彼即於母起貪亦爾,乃往逼趣。若女於母,欲其遠去。若男於父, 見其父母共行邪行所出精血, 而起顛倒。起顛倒者, 謂見父母爲邪行時,

供養佛祖之報恩章轉居在後。(式咸至大清規序云:「始此書之作, 門不應拜俗議), 皆以委婉之詞否認此土君臣父子二倫之議論。然降及後世, 國家頒佈之法典, 初唐二百數十年間,「沙門不應拜俗」及「沙門不敬王者」等說見於彦悰六卷之書者(唐彦悰集沙 則所言更詳顯矣。 僧徒改訂之規律,如禪宗重修之百丈清規。其首次二篇,乃頌禱崇奉君主之祝釐章及報恩章 既有僧尼應拜父母之條文。(見薛允升唐明律合編玖及清律例壹柒禮律儀制「僧道拜父母」條。 入院首之。 壬午, 則不待言。 是,漸漸不見父母餘分,唯見男女根門。即於此處,便被拘礙。死生道理如是應知 佛法之入中國,其教義中實有與此土社會組識及傳統觀念相衝突者。 此種學説, 依覺菴先師於承天, 朝夕扣問, 其是非當否, 姑不置論。 因得以祝聖如來降誕二儀冠其前。 惟與支那民族傳統之倫理觀念絕不相 或以為僧受戒首之。 如東晉至 其餘 或以住

蓮

色尼

出家因緣跋

見删 因以「在家人勿看」之語標識之。(高僧傳壹康僧會傳云:「〔孫皓〕因求看沙門戒, 當其初期 地而變為枳 性交諸要義 夫僧徒戒 類 蓮花色尼 不可輕宣。」疑與此同。)蓋佛藏中學説之類是者,縱為篤信之教徒 聚 削之故, 本本從釋 釐 亦復 未嘗無高僧大德, 為十卷。 則此 出家 吾民 庶幾可使遊於方内之士, 不能奉受。 族同 因緣中聚麀惡報不載於敦煌寫 土自來佛教著述, 迦部族共 」據此, 可知百 化之力可謂 特以其為聖典之文,不敢昌言詆斥。惟有 和國之法制 不顧 大矣。 大原 切忌 大抵噤默不置一語。如小乘部僧尼戒律 得知貝多真實 蜕 書猶略存 但支那佛教 諱 蟬 而 , 公然出 來, 本者 毘奈耶本意。 今竟數 語中 而辯護其教中 信徒, 即 固有非常 由 典忘 於此 關於君臣父子之觀念, 祖 自元以後, 則全部支那化矣。 異議 茲為 無父無君之説者。 輕 隱秘閉藏, 重倒置 補其 以經神 可怪之論 闕 中, 至於 略, 禁絶 州 頗 在也。 會以 並 傳統道 、斯極。 後雖 有涉及者 獨至 附 其流佈 戒文禁 同 橘遷 德所 而

附注

便佛報)賢愚 此 恩經 因 經雖皆載有呪誓惡報之事, 伍 緣經叁微妙比 慈 品 中 華 色尼 丘 自 尼品壹陸所載故事與敦煌本略同,而比丘 述出 家因 然均無記其若干種之文。敦煌本所以獨異者 緣, 僅當 敦煌 本故事 之前半, 而比丘 尼之名與敦煌本異。 尼之名則與敦 或出於編 煌本

纂者所臆加,或別有原本可據,今固不能知。但以鳩摩羅什譯衆經撰雜譬喻經所載故事證之,

則呪誓惡報七種之語恐非編纂者自增。尤可注意者,即賢愚因緣經本無原本,實為支那僧徒遊 學中亞時 聽講之筆記撰集而成。(見僧祐出三藏記集玖賢愚經記。)大方便佛報恩經 内容 既 與賢

附識於此 或足以見鄙説之不甚謬也。 可参清寬壽不拜世祖事。 見康熙時所修廣濟寺新志中湛祐所作玉光壽律師

(二)沙門不拜俗事,

作品

俱經支那僧徒之手, 有所改易,

愚

因緣經

相似

而特重行孝報恩之義。

其經序品之後即為孝養品。

非復原來之舊。

故與巴利文所載之較古而近真者不同

又失譯者之名,

疑為同

類之

(原 載一九三二年一 月清華學報第柒卷第壹期

二國志曹沖華佗傳與佛教故事

國輸入者耳。今略舉數事以證明之,或亦審查古代史料真偽者之一助也。 陳 多議之者。 承祚著三國志, 實則三國志本文往往有佛教故事, 下筆謹嚴。 裴世期為之注, 雜糅附益於其間,特蹟象隱晦, 頗採小説故事以補之, 轉失原書去取之意, 後人 不易發覺其為外

魏志貳拾鄧哀王沖傳云:

鄧哀王沖字倉舒,少聰察歧嶷,生五六歲,智意所及,有若成人之智。時孫權曾致巨象, 物以載之,則校可知矣。太祖大悦,即施行焉。 太祖欲知其斤重,訪之羣下,咸莫能出其理。沖曰,置象大船之上,而刻其水痕所至,稱

葉水心適習學記言貳柒論此事曰:

或本有此法。邵二雲晉涵據吳曾能改齋漫録引苻子所載燕昭王命水官浮大豕而量之, 是直信以為事實。何義門焯以倉舒死於建安十三年前,知其事為妄飾,而疑置水刻舟 倉舒童孺, 而有仁人之心, 並舟稱象,爲世開智物理,蓋天禀也。

謂其事已

算術中

在前。 (見梁章鉅三國志旁證壹肆。)然皆未得其出處也。考北魏吉迦夜共曇曜譯雜寶藏經壹棄

老國緣云:

斤兩。即以此智以答天神。 天神又問 父言, 置象船上, 著大池中, 此大白象有幾斤? 畫水齊船,深淺幾許, 而羣臣共議,無能知者。亦募國内, 即以此船量石著中, 復不能知。 水没齊畫, 大臣問父

卷壹之棄老國緣亦當別有同一內容之經典,譯出在先。 後譯出之佛典中。如卷捌之難陀王與那伽斯那共論緣與那先比丘問經之關係,即其一例。因知 象為南方之獸 或雖未譯出, 寅恪案, 雜寶藏經雖為北魏時所譯,然其書乃雜採諸經而成,故其所載諸國緣,多見於支那先 而此故事僅憑口述, 非曹氏境内所能有, 亦得輾轉流傳至於中土,遂附會為倉舒之事,以見其智。但 ,不得不取其事與孫權貢獻事混成一談,以文飾之,此比較 或雖經譯出, 而書籍亡逸, 無可徵考。

又涵芬樓影印百衲本三國志貳玖魏書貳玖華佗傳(可參後漢書列傳染貳下華佗傳。)略云:

爲專也。)曉養性之術,時人以爲年且百歲,而貌有壯容。又精方藥,其療疾,合湯不過 華佗字元化,一名專。(裴注:古敷字與專相似,寫書者多不能別。尋佗字元化,其名宜

煮熟便飲,語其節度,捨去輒愈。若病結積在內,針藥所不能及,當須刳割者, 便

飲其 須盡服之。 坐, 見佗北壁縣此蛇輩約以十數。又有一士大夫不快, 佗云: 「君病深, 當破腹取。然君 三升飲之, 日差 得家書,方欲暫還耳。」到家,辭以妻病,數乞期不反。太祖累書呼,又敕郡縣發遣。佗 篤重,使佗專視。佗曰:「此近難濟,恒事攻治,可延歲月。」佗久遠家思歸,因曰:「當 佗脈之曰:「府君胃中有蟲數升,欲成內疽,食腥物所爲也。」即作湯二升,先服 人車載欲往就醫。 必欲除之。 壽亦不過十年,病不能殺君,忍病十歲,壽俱當盡,不足故自刳裂。」士大夫不耐痛癢 佗常在左右。 麻 ,厭食事,猶不上道。太祖大怒,使人往檢。 小人養吾病,欲以自重。然吾不殺此子, 佗遂下手,所患尋差,十年竟死。廣陵太守陳登得病,胸中煩懣,面赤不食。 病自當去。」即如佗言, 立吐蛇一枚, 縣車邊, 欲造佗。佗尚未還, 疾者前入 食頃, 便收送之。 人亦不自寤, 一月之間即平復矣。 須臾便如醉死無所知, 因破取。 佗聞其呻吟, 駐車往視, 語之曰:「向來道邊有賣餅家蒜齏大酢, 太祖苦頭風,每發,心亂目眩,佗針鬲,隨手而差。 吐出三升許蟲,赤頭皆動,半身是生魚膾也。所苦便愈。 於是傳付許獄,考驗首服。 病若在腸中, 佗行道見一人病咽塞, 嗜食而不得下. 若妻信病, 賜小豆四十斛, 亦終當不爲我斷此根原耳。」及後愛子 佗死後, 便斷腸消洗, 太祖頭風未除。 後太祖親理, 得病 縫腹膏摩, 太祖曰:「佗 太祖聞 寬假限日。 從取 而 斯 召

杭大宗世駿 三國志補注肆引葉夢得玉澗雜書略云:

華佗固神醫也。 然范曄陳壽記其治疾, 皆言若病結積在内, 針藥所不能及者云云,

安有如是而復生者乎?審佗能此,則凡受支解之刑者,皆可使生,王者亦無所復施矣。 刳割,與能完養,使毀者復合,則吾所不能知。然腹背腸胃既以破裂斷壞, 之理。人之所以爲人者以形, 而形之所以生者以氣也。佗之藥能使人醉無所覺, 則氣何由含 可以受其

日本漢音亦讀「華」為「か」。則「華佗」二字古音與「gada」適相應, 其渻去「阿」字者, 以學術進化之史蹟,當時恐難臻此。其有神話色彩,似無可疑。 舊譯為「阿伽陀」或 「阿羯陀」,為内典中所習見之語。「華」字古音, 。然斷腸破腹,數日即差,揆 檢天竺語「agada」乃藥之義。 據瑞典人高本漢字典為r"a 猶 阿羅漢

是昔人固有疑其事者。夫華佗之為歷史上真實人物,自不容不信。

華佗」,實以「藥神」目之。此魏志後漢書所記元化之字,所以與其一名之旉相應合之故也。

僅稱「羅漢」之比。蓋元化固華氏子,其本名為旉而非佗,當時民間比附印度神話故事,因稱為

便愈, 披腸結處。治迦羅越家女病,以金刀披破其頭,悉出諸蟲,封著甕中,以三種神膏塗瘡, 又考後漢安世高譯標女耆域因緣經所載神醫耆域諸奇術,如治拘睒彌長者子病,取利刀破腸 乃出蟲示之,女見,大驚怖。及治迦羅越家男兒肝反戾向後病,以金刀破腹,還肝向 ,七日

佛典 記尤相似。 記載華佗事 可參裴注引佗別傳中 之人物, 以三 則耆 及治 賴佛成神, 經扶南交廣襄陽至於洛陽,復取道流沙而返天竺(見高僧傳玖)。 種神膏塗之, 」域為佛同時人, 有:「漢末開 陳 不經比附事實或變易名字之程序,)然此尚為外來之神話, 登疾,令吐出 僅 三日便愈。 而得免。 腸, 佗治劉 若其來遊中土, 亦當在春秋之世, 洗五藏, 赤頭蟲三升許, 勳女膝瘡事。 則其遭際符 其斷 附益於本國之史實也。 劈腦出蟲, 腸 破 合, 腹,固與元化事不異,)至元化為魏武療疾致死, 亦與耆域之治 而竟以為本國歷史之人物, 尤不能令人無因襲之疑。 乃為魏武帝所殺」之語, 若慧皎高僧傳之耆域, 迦羅越家 而非典午之時 而元化壁縣 女病 耆域亦以醫暴君 然據榜女耆域因緣等 與棕女耆域 則較華佗傳 事 (敦煌本 斯蓋 不無 病者所吐之蛇以 直取 勾道 則於晉惠帝 類 因緣 似之處。 外國 興 經 搜 神 更

釋迦牟尼説 史上之人物也。 因名詞之沿襲, 戴達竹林七賢論,孫盛魏氏春秋, 外來之故事名詞, 法處 獨七賢所遊之「竹林」,則為假託佛教名詞, 而推知事實之依託,亦審查史料真偽之一例也。(聞日本學者有論此事之著 歷代所譯經典皆有記 比附於本國人物事實, 臧榮緒晉書及唐修晉書等所載嵇康等七人, 載 而法顯(見佛國 有似通天老狐, 記)玄奘(見西域記玖)所親歷之地。 即 | Velu | 或 | Veluvana | 之譯 醉則見尾。 如袁宏竹林名 固皆支那

有不同

所當注意之事,固不獨與此二傳之考證有關而已也。 之源本。夫三國志之成書,上距佛教入中土之時,猶不甚久,而印度神話傳播已若是之廣 然巨象非中原當日之獸, 華佗為五天外國之音, 其變遷之跡象猶未盡亡, 作,寅恪未見。)總而言之,三國志曹沖華佗二傳,皆有佛教故事,輾轉因襲雜糅附會於其間 會所受之影響已若是之深,遂致以承祚之精識,猶不能別擇真偽,而並筆之於書。則又治史者 ,故得賴之以推尋史料

(原載一九三〇年六月清華學報第陸卷第壹期)

贈蔣秉南序

耶? 澆漓 永叔 夢寐 疏屬 垂死 十五叟陳寅恪書於廣州金明館。 無所成。凡歷數十年, 於乾撼坤岌之際, 之南 靖之憂, 蔣子秉南遠來問 少學韓昌黎之文, 唯深美 緒之季年, 將就木矣。默念平生固未嘗侮食自矜,曲學阿世, 返之淳正。 存乎 遐想而已。 汾水之曲, 其 果未及十稔, 事 寅恪家 故天水 以為 不謂為天下之至樂大幸, 疾, 嗚呼! 守先哲之遺範, 託末契於後生者, 晚撰五代史記 遭逢世界大戰者二, 魏丘 居白下, 一朝之文化, 聊師 神州沸騰, 諸子值明清嬗蜕之際, 古人朋友贈言之意 此豈寅 日偶檢架上舊書, 見有易堂九子集, 俗少時所自待及異日他人所望於寅恪者哉? 作義兒馮道諸傳, 寰宇紛擾。 竟為我民族遺留 内戰更不勝計。 不可也。 寅恪亦以求學之故 猶能兄弟戚友保聚一 草此奉胎, 當讀 之瓌寶。 似可告慰友朋。至若追 貶斥勢利, 則有如方丈蓬萊, 渺不可即, 徒寄之 是 集時, 其後失明 庶可共相策勉云爾。 孰謂空文於治道 朝野 尊崇氣節, 臏足, 地, 奔 尚 取而讀之, 不甚喜其 走東西洋 稱 棲身嶺 苟安, 相與從容講文論學 遂 蹤 學 一匡五 雖然, 昔賢, 寅恪 甲 數萬 表, 術 辰 夏五七 已奄 里, 無裨益 獨懷辛 歐陽 幽居 奄

[附]寒柳堂記夢未定稿

所寄, 係」三部分,所用均係初稿,無可校。將來如能發現全稿,將另印單册附後。 家先世中醫之學」,及「清季士大夫清流濁流之分野及其興替」「戊戌政變與先祖先君之關 僅存本章之前半部。(六)「戊戌政變與先祖先君之關係」,全;所缺引文亦補齊。 言」,全。(一)「吾家先世中醫之學」,全。(二)「清季士大夫清流濁流之分野及其興替 曾由助教黄萱繕寫謄清稿兩份, 寒柳堂記夢未定稿原共七章,一九六五年夏至一九六六年春間所寫,為先師最後之 僅存殘稿如許,不其痛歟! 茲將殘文併全文目録, 大都在混亂中佚失, 迄今僅存零星殘稿, 計:「弁 附印於寒柳堂集之末。 晚年心血 又, 「吾

九七九年十二月及門蔣天樞識

録

言

(一)吾家先世中醫之學 (三)孝欽后最惡清流(佚) (二)清季士大夫清流濁流之分野及其興替 四)吾家與豐潤之關係(佚)

(六)戊戌政變與先祖先君之關係

(五)自光緒十年三月至二十年十一月間清室中央政治之腐敗(佚)

(七)關於寅恪之婚姻(佚)

八四

東坡詩云:「事如春夢了無痕。」但又云:「九重新掃舊巢痕。」夫九重之舊巢亦夢也。舊巢之舊

可掃, 則寅恪三世及本身舊事之夢痕,豈可不記耶?

昔年康更生先生(有為)百歲紀念,因感吾家與戊戌政變事, 曾為賦 一律云:

此日欣能獻一尊,

種, 江潭騷客已無魂。玉谿滿貯傷春淚,未肯明流且暗吞

百年世事不須論。看天北斗驚新象,記夢東京惜舊痕。元祐黨家猶有

今歲又賦「題紅梅圖」一律,圖為寅恪與內子唐瑩結褵時曾農髯丈(熙)所繪贈,迄今將四十載

鏡臺畫幅至今存,偕老渾忘歲序奔。紅燭高燒光並照,緑雲低覆悄無言。 面 , 度曲能留月夜魂。珍重玳甿香茜影, 他生同認舊巢痕。 栽花 幾换湖山

然則 夢痕 不僅可記, 其中復有可惜者存焉。 復次, 寅恪童時讀庾信哀江南賦序云:

辭賦,先陳世德。信年始二毛,即逢喪亂。藐是流離,至於暮齒。 昔桓君山之志事,杜元凱之平生,並有著書,咸能自序。潘岳之文采,始述家風,陸

深有感於其言。後稍長偶讀宋賢涑水記聞及老學庵筆記二書,遂欲取為模楷,從事著述。今既

[附]寒柳堂記夢未定稿

之義。既不誣前人,亦免誤來者。 屆暮 證諸 齒, 史料, 若不於此時成之, 参以平生耳目見聞 則恐無及。 知我罪我, 任之而已。 以闡 因就咸同光宣以來之朝局, 明之。 並附 載文藝瑣事, 以供談助, 與寒家先世直接 庶幾不賢者識 或間 接 有 關

其所以取君實之書, 7馬光撰。是編雜録宋代舊事,起於太祖,訖於神宗。每條皆注其述說之人,故曰 以為模楷者, 蓋四庫全書總目提要壹肆零凍水記聞條略云:

記

宋司

此文所記 聞。 或如張詠請斬丁謂之類, 皆有證驗, 竊比於溫公是書也。 偶忘名姓者, 則注曰, 不記所傳。 明其他皆有證驗也。

其所以取務觀之書, 陸游務觀撰, 生識 以為模楷者, 前輩, 年登耄期, 蓋陳 振 所記見聞殊可觀也。 孫直 齋書録解題壹壹老學 庵筆記條云:

與寅恪之家世及草此文之時日, 銘桃華聖解盦日記辛集貳 云 頗亦相合。故不揣淺陋,藉作模楷也。然復有可論者,據李慈

放翁此 王氏及字説俱無貶辭, **誚鄭毅夫不識字。** 間考舊文, 在南宋時足與猗覺寮雜記 俱爲謹嚴。 又不樂滕元發, 不免曲筆。 所論時事人物, 今考其書, 曲洧 亦多平允。 舊聞, 於荆公亦無甚稱 梁谿漫志, [四庫]提要譏其以其祖左丞之故於 賓退 述。 録諸 如云輕沈文通 書並 稱。 其雜 以

目爲滕屠鄭酤,

及裁减宗室恩數諸條,

俱不署斷

僅中乙科,以家貧養親,不得已而就末職。其仕清朝,不甚通顯,中更挫跌,

度。今日追思,殊可惜矣。至寒家在清季數十年間,與朝野各方多所關涉,亦別有其故。先祖

親多為當時勝流,但不敢冒昧謁見。偶以機緣,得接其丰采,聆其言論,默而識之,

説 直」則本説文義也。其論詩數十條,亦多可觀。劍南於此事本深,尤其談言微中。 以及故相吴元中,門下侍郎薛肇明等詩文之用字説, 字説音訓十卷。 亦祇 而言外似有未滿意。惟一條云,「先左丞言荆公有詩正義一部,朝夕不離手,字大半 世謂荆公忽先儒之説,蓋不然也。」則荆公本深於經學,所記自非妄説。其言字 一條云,「字說盛行時,有唐博士耜, 劉全美作字説偏旁釋一卷, 字説備檢一卷。又以類相從爲字會二十卷。」 韓博士兼皆作字説解數十卷。太學諸生作 而未當加論斷, 至所舉「十目視隱爲

排除恩怨毀譽務求 黨之得失最為公允。清代季年,士大夫實有清流濁流之分。 籍。(見王昶金石萃編壹肆肆元祐姦黨碑。)是放翁之家世,與臨川凍水兩黨俱有關聯。其論兩 抑更有可附言者, 由此言之,放翁之祖陸農師(佃),為王荆公門人,(見宋史叁肆叁陸佃傳。)後又名列元祐黨 於此清濁兩黨, 寅恪幼時讀中庸至「衣錦尚絅,惡其文之著也」一節,即銘刻於胸臆。父執姻 一持平之論斷。他日讀者儻能詳考而審察之, 皆有關聯 故能通知兩黨之情狀並其所以分合錯綜之原委。 寅恪本人或以世交之誼, 當信鄙言之非謬也 因草此文, 或以姻姬

罷廢八稔。

但終有限

代。清季各省初設提學使,先君摯友喬茂萱丈樹柟為學部尚書榮慶所信任 提學使。是時熊秉三丈希齡適在京師, 始得 一併革 巡 職 撫湖南小省。 後雖復官 在位 迄清之末, 不逾三載, 聞其事,即告當局謂先君必不受職。 未嘗 竟獲嚴譴。 出。 然以吏能廉潔及氣節文章 先君 雖中 中科, 不數 遂改授其時湖南 故擬 月即告終養。 頗 定先君 負 重名 為湖 於當 戊戌 南

寅恪以家世之故, 又清帝遜位後, 益藩)。 朱丈亦陳 陳 稍稍得識數十年間興廢盛衰之關 公寶琛任師傅, 公光緒八年壬午主贛省鄉試 欲引先君 相佐,先君辭以不能操京語。陳公遂改薦朱艾卿丈 所取 鍵。 ±, 今日述之, 與先君為齊年生也 可謂家史而兼信史歟?

政吳子修丈慶坻

(一)吾家先世中醫之學

而用之, 由外域傳 先祖先君遂亦通醫學, 吾家素寒賤,先祖始入邑庠,故寅恪非姚逃虚所謂讀書種子者。先曾祖以醫術知名於鄉村間 祖敷? 曾撰三 則可。 入者。 一國志中印度故事, 然不信中醫, 若矜誇以為國粹 為人療病。寅恪少時亦嘗瀏覽吾國醫學古籍,知中醫之理論方藥, 以為中醫有見效之藥, 崔浩與寇謙之及元白詩箋證稿第伍章法曲篇等文, 駕於外國醫學之上,則昧於吾國醫學之歷史, 無可通之理。若格於時代及地區,不得已 殆可謂數 略申鄙見

以中醫治人病,豈不異哉?孟子曰:「君子之澤,五世而斬。」長女流求,雖業醫, 茲不贅論。小戴記曲禮曰:「醫不三世,不服其藥。」先曾祖至先君,實為三世。然則寅恪不敢 但所學者為

[醫。是孟子之言信矣。郭筠仙嵩燾養知書屋文集貳壹陳府君墓碑銘略云:

者踵門求治,望色切脈,施診無倦。配李淑人。子三人,樹年某官,觀瑞殤,寶箴[咸豐] 生其季也。先生以太淑人體羸多病,究心醫家言,窮極靈樞素問之精蘊,遂以能醫名。病 陳琢如先生諱偉琳。祖鯤池由閩遷江西之義甯州,再傳而生先生。考克繩,生子四人,先

翁文恭公日記「光緒二十一年乙未正月二十日」條云:

補牌要藥,可常服。(自注:「脈以表上十五杪得十九至,爲平。余脈十八至,故知是虚。」) 晚訪陳右銘,未見。燈後右銘來辭行,長談。爲余診云,肝旺而虚,命腎皆不足。牛精汁白术皆

君侍先祖母留寓武昌, (先祖母事蹟見馬通伯丈(其昶)所撰「陳母黄夫人墓誌銘」。 病。自後吾家漸不用中醫。蓋時勢使然也。猶憶光緒二十一年乙未,先祖擢任直隷布政使,先 寅恪少時多病,大抵服用先祖先君所處方藥。自光緒二十六年庚子移家江甯,始得延西醫治 據此,中醫之學乃吾家學,今轉不信之,世所稱不肖之子孫,豈寅恪之謂耶? 工攜魚翅一榼,酒一甕並一紙封,啟先祖母曰,此禮物皆譚撫臺所贈者。紙封內有銀票伍佰 日忽見傭

吾家境 復生嗣 兩 請查收。 同丈之父繼洵 先祖母曰,銀票萬不敢受,魚翅與酒可以敬領也。傭工從命而去。 先祖又遠任保定, 時任湖北巡撫。曾患疾甚劇 恐有 必需 特饋以 重金。 服用先祖所處方藥,病遂痊癒。譚公夙 寅恪侍先祖母側 時方五六歲 譚撫臺者, 頗訝 知 譚

應。 時先 所載甚 曾祖 價貴, 售者肯以賤價出賣, 又光緒 為人治 是後 母多卧 母告之日, 明。 病, 二十五年己亥先祖寓 見有舊刻醫藥諸 疾, (見本草綱目壹貳「薺苨」條。)特世人未嘗注意及之耳。寅恪自是始知有本草之書 尚 得如 案頭常置本草綱目節本一部, 前患咳嗽, 此 酬 報。 書, 皆略加 此必非真人參,乃薺苨也。 南昌 在童 適門外有以人參求售者 稚心中, 一日諸 披閱, 固為前 孫 侍側 但 取便翻閱。 所未知, 知半解, 閒話 購服之即痊。 蓋薺苨似人參,而能治咳嗽之病。 舊事, 寅恪即檢薺苨一 遂至今不忘 不以此等書中所言者為人處方治病 略言昔年自京師 先祖 也 詫 藥, 日, 果與先祖之言符 吾家 返 義 甯 2 鄉 居

先

(二)清季士大夫清流濁流之分野及其興替

唯藉

作考證古史之資料,

如論胡臭與

八狐臭一

文

即是其例也。

晚 此後, 同光朝士大夫有清流濁流之分,黄秋岳花隨人聖庵摭憶論之詳矣。 即光緒之末至清之亡,則未述及。其實光緒之末至清之亡, 士大夫仍繼續有清濁之 黄氏書所論迄於光緒中

返清 未得見。及蘆溝橋事變,北平淪陷, 華園 至太平洋戰起, 請依次論之。秋岳之文本分載於當時南京中央日報,是時寅恪居北平,教授清華大學,故 始得讀秋岳 乃由香港至桂林成都。 日本投降, 之書, 深賞其暘臺山看杏花詩「絶艷似憐前度意, 寅恪隨校南遷長沙昆明,後又以病暫寓香港, 復遠遊倫敦, 取道巴拿馬運河歸 繁枝留待後來人」之 講學香港大 或

當年聞禍費疑猜,今日開編惜此才。世亂佳人還作賊,劫終殘帙幸餘灰。 斷句猶牽後死哀。見説暘臺花又發,詩魂應悔不多來。 荒山久絶前遊

句

律

Z

故諸 秋岳 著作中, 坐漢奸罪死,世人皆曰可殺。然今日取其書觀之,則援引廣博, 實稱 上品,未可以人廢言也。 論斷精確, 近來談清代掌

有待説 茲先節録黄氏書與 則 亦略補正並解釋之於下。 此問 題有 關之數則, 然後再續述黄氏所未言及者。 至黄氏所論間 有舛誤,

以 官以瞿鴻機張之洞等, 洞等為清流。京官以醇親王奕譞孫毓汶等,外官以李鴻章張樹聲等為濁流。至光緒迄清之亡,京 簡要言之, 唐 馥楊士驤等為濁流。 自同治至光緒末年,京官以恭親王奕訢李鴻藻陳寶琛張佩綸等,外官以沈葆楨張之 外官以陶模岑春煊等為清流。京官以慶親王奕劻袁世凱徐世昌等,外官 但其間關係錯綜複雜先後互易, 亦難分劃整齊, 此僅言其大概,

不必過於拘泥也。黄氏之書(花隨人聖庵摭憶)略云:

譬如擔夫争道,智者則擊穀價車矣。試以晚清言,曾文正見扼於祁文端,微肅順左右之, 宴樂,騃不知事,官闡亦相阨,以速其亡。蓋宦途未有不相擠者,特視爲何如人。愚者, 戰而戰,所失倍甚。(頁五十五) 查,覆奏,李鴻章心實無他, 甚大。當時高陽常熟陰相阨, 葉帝后兩 幾不能成功,是一例。曾氏兄弟,與左文襄沈文肅交惡,雖無大影響,亦是一例。光緒初 淮南彭孫貽客舍偶聞 歷歷如繪。 康熙諸主輒利用之以成大業。及晚清同光以來,則漢大臣互相齮虧,而滿大臣驕奢 黨交関,而李高陽與翁常熟交惡,其終也,促成中日甲午之戰, 嘗謂有清一代, 開國時滿大臣互相擠軋, 而漢大臣新進, 一帙, 順德李芍農侍郎(文田)注之。所記康熙初年滿人互相擠軋之 ,事見宋芸子詩自注。其後翁力主戰,李欲格之, 而合肥李文忠居外, 其時有言文忠有異心者, 兢兢業業 所關於國運者 旨令常熟密 不能。不可

黄書又云:

皮未作覆。當時士論沸騰,主此說至多,散原老人今年八十三,是時年裁四十一,與丁叔 尚録其時散原老人自武昌致南皮一電,以馬關和約簽定,請籲奏誅合肥以謝 前所採拔可先生尊人次玉先生在南皮兩江督幕中録藏光緒甲午乙未間中東戰役諸電 天下, 此電南 册後 按:此章殘稿,係從另一册初稿殘稿中録出。此章未完,以下缺。樞識。

開府直隸,而散老忠憤所迫,不遑顧慮,輒敢以危言勸南皮也。予初未讅散老此電命意, 十可七八回聖聽, 近讀散原精舍文存,自爲其尊人右銘先生行狀,有云:「其時李鴻章自日本使還,留天津, 雅(慧康)譚復生(嗣同)吴彦復(保初)號四公子,風采踔發,物望所歸。故其時右銘先生雖 再圖補救,以伸中國之憤,以盡一日之心,局外哀鳴,伏維賜察。三立。」按散老此電, 存。原電云:「讀銑電愈出愈奇, 今起合肥於九京, 休戚,所自處寧有是耶?其世所蔽罪李公,吾蓋未暇爲李公罪矣,卒不往。」得此一段, H 羣謂且復總督任。府君憤不往見,曰,李公朝抵任,吾夕掛冠去矣。人或爲李公解, 乙未五月十七日由武昌發, 戌刻至江寧者。(頁二一四) 下刦於書生貪功之高調,忍以國家爲孤注,用塞羣昏之口,不能以死生争, 不啻兼爲散老電下一註解。蓋義寧父子,對合肥之責難,不在於不當和而和,而在於不當 ,勛舊大臣如李公,首當其難, 以合肥之地位,於國力軍力知之綦審,明燭其不堪一戰,而上迫於毒后之淫威 亦無以自解也。 今猥塞責望謗議,舉中國之大,宗社之重,懸孤注,戲付一擲,大臣均 國無可爲矣,猶欲明公聯合各督撫數人, 信由斯説, 極知不堪戰, 當投闕瀝血自陳, 則散原當日之憤激, 自在意中, 争以死生去就, 力請先誅合肥 義甯之責 固卓然可

(六)戊戌政變與先祖先君之關係

碑傳集補壹貳黃尚毅撰楊叔嶠先生事略略云:

後, 留心掌故之學, 感憤時事, 不肯託諸空文。而代人作奏議獨多, 不備舉, 舉其關係天 慮朝士水火,非得有學術通知時事大臣,居中啓沃,弗克匡救。當時徐公世昌以翰林佐今 先生乃激勵侍御王鵬運,並代作書上之,語頗切直。戊戌新學之士漸起,言論過激, 下者。甲午乙未中日戰後,孝欽復幸頤和園,内監寇良才上書諫,被殺。朝士無敢言者。 隋史簡略,著隋史補遺四十卷,楷録成册,藏於家。詩文約數十篇皆散見無存稿。三十以 堂,直省在京立學自蜀始也。先生在軍機章京時,決疑定難,樞垣舊僚皆拱手推服。每一 大總統袁臬司治兵於小站,亦與先生書云:自中日戰後,合肥坐困,日本伊藤來京師, 爲救亡之策。上感其誠,韶立京師學堂。而川人李徵庸在津辦賬,先生勸捐二萬金立蜀學 瞰中國無人。此時欲求抵禦之策,非得南皮入政府不可。先生得書, [戊戌六月]十三日,朝旨以湘撫陳寶箴薦,韶先生預備召見。十四日召對,極言與學練兵 條理精密,往往數百言無一字移易。其學與年俱進如此。三十以前,經史辭章原於 [兄]聽彝先生著説經堂叢書,倡起蜀學,得先生而益盛,人咸以軾轍許之。先生以 乃與喬樹柟說大學士

有爲 H 騤懷塔布等阻格不奏。先生歎息曰:皇上始誤聽於志銳,繼誤聽於李盛鐸,今又誤聽於康 審擇施行,不勝焦慮之至。欽此。」七月二十六日因禮部司員王照請代上封事。堂官許應 如何而後能進此英勇通達之人,使新政及時舉行,又不致少拂聖意,即具封奏以聞, 朕權力所不能及,若必强以行之,朕位且不能保。 已謂太過。 焚草,其公恕如此。尚毅戊戌留京,住先生寓齋,每侍談燕,故得備聆也。 若有不測,決無可去之義。初九日晨起,先生被逮。慶昶及毅亦同被拘。至坊上, 通達之人。 進退俱難。先生得書, 張已至上海,奉旨折回。先生匡救之懷乃弗遂矣。 德宗召見賜手韶云:「近日朕仰觀聖母意旨,不欲退此老耄昏庸之大臣,而進用英勇 禍不得息也。先生既下值,王彦威京卿來函云:與此輩少年共事, 並代作疏薦張。得旨陛見。樞府翁同龢不悦張, 故孝欽突然回宫也。次日,先生云:我等定出軍機。 亦不欲將法盡變。 朕豈不知中國積弱不振, !覆奏上即召見。於是有旨派康有爲至上海。 急邀林旭至寓齋, 雖朕隨時幾諫, 非退此老耄昏庸之大臣而力行新政不可。 切責之。 而慈意甚堅。即如七月二十六日之事, 爾與劉光第譚嗣同林旭等詳悉籌議 林默然。 先生代人作疏, 會沙市有教案, 樞臣皆慶幸,以不召對先生康不 初五日訓政韶下, 若皇上無事, 乃與張蔭桓密謀中 不肯受名, 有損無益。 先生既值樞 然此 我即 蓋因 事後即 時 候朕 聖母

見賜。 三言進退大臣,不宜太驟。生當時所聞封奏情實止此。 宜。併蒙特旨召見,親賜手韶,令詳議覆。生時留侍京寓。故父下直後,一日唤生入室, 閣候補侍讀於光緒戊戌年七月,仰蒙先皇帝特擢四品卿衡軍機章京上行走,參預新政事 慶昶扶柩出京回籍。宣統元年,毅同慶昶繳手韶於都察院,其詞云:竊生故父楊鋭 第同時被逮。止謂是非一訊即明,不料邂逅就死。生慘痛昏迷,無術請代。故父門人黄尚 后親挈天下以授之皇上,應宜遇事將順,行不去處,不宜固執己意。二言變法宜有次第。 敬將手韶令生恭藏。云已覆奏。 遂出就刑。 屈。先生呼劉曰:裴村, 第入獄,殊泰然。至十三日,乃各加以凶服,劉固刑部司官,詫曰:就刑矣!至法庭,不 曰:彼公車也,何故拘之?故毅及慶昶得釋,而下先生刑部獄。同鄉喬樹柟乃電知張文襄 必不免見焚,異日且無昭雪之據。乃將手韶密縫於尚毅衣領中。至八月二十五日,同 · 請榮轉奏: 願以百口保楊鋭。次日已宣佈行刑而轉電始至, 已無及矣。 生敬叩:覆奏如何?故父云:事關重要,當[時]未存稿,略舉大綱三條:一言皇太 刑部以案情重大,請派大臣會審,十二日,直隸總督榮禄入京,召見。 先生既致命, 尚毅同喬樹柟等棺殮。殯於清字庵。念先生僅一子,若搜得手 且聽旨。剛毅宣旨畢,先生曰:願明心跡。剛云:有旨不准説。 生敬叩: 手韶理當恭繳。生故父云, 本已面繳, 聖恩仍復 嗣是年八月初九日, 先生與劉光 是夜文襄電

當時封奏諒已詳明。其生平論學制行,實與劉光第同其本末, 所奉先皇帝手韶尚庋藏臣家未繳,無以對先皇帝在天之靈。是以約同故父門人黄尚毅,敬 棺耳。今十三年矣!慘念生故父生平志行,惟與劉光第相契相規,此外並無苟同之處。且 毅語生云:故父忠悃,官有封奏,私有家牘,他日尚可呈請别白,惟手韶關係重要, 亦所深見。謹懇奏請昭雪。奏入,留中。次年,又由資政院陳寶琛提議昭雪, 宜謹密藏。即以是月扶柩歸里。道途霖雨積雪,所重者惟先皇帝手韶及故父一 籲懇代呈,以光先皇帝聖德。至生父拳拳臣節, 今大學士張之洞撫晉督學督 所圖仰報先皇帝於萬一者, 日後 通院

散原精舍文集伍巡撫先府君行狀略云:

贊成。奏入, 政府卒閣不行, 以迄於亡。

畢具。營一隅爲天下倡立富强根基,足備非常之變,亦使國家他日有所憑恃。 人猶是也。」府君蓋以國勢不振極矣,非掃敝政,興起人材, 間,爲士民所信愛。 念湖南據天下上游,號天下勝兵處。其士人率果敢負氣可用。 [光緒廿一年]八月, 韶授湖南巡撫。府君故官湖南久, 習知其利病。而功績聲聞昭赫耳目 獨竊喜自慰,而湖南人聞巡撫得府君,亦皆喜。是時湖南旱饑,赤地且千里,朝廷以 尤與其縉紳先生相慕嚮。平居嘗語人曰:「昔廉頗思用趙人,吾於湘 又土地奥行, 與天下更始, 煤鐵 無以 故聞 圖 五金之産 存。

利公司,輪舟公司,以及丈勘沅江漲地數十萬畝,皆已萌芽發其端。由是規模粗定。 通電竿, 圓局,以朱公昌琳領之。 然,遂改觀。既設礦務局,别其目曰官辦,商辦,官商合辦,又設官錢局,鑄錢局,鑄洋 縣以下昏墨不職二十餘人,而代以榦良者。桃源令貪暴無人理,上其罪至遣戍。羣吏懍 以爲其要者在董吏治, 君甫視事, 綱紀放弛, 製造公司之屬, 得次第振活都百數十萬人。當是時, 遣某總兵持符亟遮之, 誠立誅其首梗令者。由是悉挽而上, 人心大定。凡府君所設 趣府君赴任,勿入覲。遂取海道入長沙。 接鄂至湘潭, 首大振三縣。瀏陽伏匪倚災數倡亂,用縣人歐陽君中鵠領振,得無事。初, 即嚴販米出境令。亡何,米舟逾千艘聚岳州,譁變,且竄出。府君以米禁大係 府君先傳電各行省大吏,乞互助。旬日達復電, 草定章程。又選取赴日本學校生五十人,待發。其他蠶桑局, 吏益雜進, 以次畢設。 闢利源;其大者在變士習, 開民智, 飭軍政, 以張君祖同領之。 朱公七十餘,負榦略,以義俠聞四方,老謝客,獨爲府君出。 貪虐窳偷之風相煽, 又設保衛局, 而時務學堂,算學堂, 非府君爲巡撫, 附遷善所, 而公私儲藏既耗竭, 蓋湖南所被災州縣二十餘, 以鹽法道黃君遵憲領之。 有助金五六十萬, 湖南幾大亂。府君承困 湘報館, 公官權。 萬事壞廢待理。 南學會, 府君用是稍 瀏陽、 工商局, 於是察劾府 又屬黄 醴陵、 府君

時, 已任。其士紳負才有志意者,復慷慨奮發,迭起相應和,風氣幾大變。湖南之治稱天下, 負海内重謗,獨府君推爲孤忠閎識,殆無其比。及巡撫湖南,郭公已先卒,遇設施或 締造者,蕩然俱盡。獨礦務已取優利,得不廢。……與郭公嵩燾尤契厚,郭公方言洋務 周内猶不絶。於是府君所立法,次第寢罷,凡累年所腐心焦思,廢眠忘餐,艱苦曲折經營 誅四章京而府君所薦楊鋭劉光第在其列,韶坐府君濫保匪人,遂斥廢。既去官, 意方嚮用府君,噤不得發。二十四年八月康梁難作,皇太后訓政, 之初直軍機亦然 而謡該首禍亦始此。 復電達大學士榮禄, ……復密陳籌餉振海軍, 尤無所謂新黨舊黨之見。康有爲之初召對也, 江君標爲學政,徐君仁鑄繼之,黄君遵憲來任鹽法道,署按察使, 輒自傷曰:郭公在不至是也。 疑謗漸興。……復以學堂教習與康有爲連,愈益造作蜚語, 曾疏言,變法事至重,四章京雖有異才, 先是府君既鋭興庶務, 競自强, 類爲湘人耳目所未習, 不便者遂附會 諷其遵主庇民, 聯與國之策。 其爲治, 故府君獨知時變所當爲而已, 規模遠大,務程功於切近。視國家之急逾其 即疏言其短長所在, 要資望輕而視事易。 彈章遂蠭起。 怪幻不可究詰。徒以上 皆以變法開新治爲 推其疵弊。 不復較孰爲新 會朝 ……政既 言者中傷 四 廷所 牴

.朝東華録光緒二十四年二月壬戌條略云:

息黨禍維元氣。

故, 制 徽巡撫鄧華熙奏,籌議添設學堂,請撥常年經費一摺,均奉旨依議諮飭通行。仰見我皇上 識卓之舉人梁啓超,候選州判李維格,爲中學西學總教習。另設分教習四人。現已開學數 爲當務之急。 其民氣之勇,士節之盛,實甲於天下。而恃其忠肝義膽,敵王所愾,不願師他人之長,其 獎勵實學,培養人材之至意。欽感莫名。自咸豐以來,削平寇亂,名臣儒將,多出於湘。 理衙門諮議覆刑部左侍郎李端棻奏請推廣學校一摺,本年三月,又承准總理衙門諮議覆安 陳寶箴奏:臣於光緒二十二年,准禮部咨山西撫臣胡聘之奏請變通書院章程一摺, 義憤激烈之氣, 法律,格致,測算等實學。額設學生一百二十人,分次考選。而延聘學兼中西,品端 因材而造就之。當於本年秋冬之間,與紳士籌商,在省設立時務學堂,講授經史掌 而紳士中復有聯合公司以機器製造者,士民習見,不以爲非。臣以爲因勢利導, 以備將才而肄武 切規模均已粗具。省城舊有求賢書院,現據改爲武備學堂,略做天津湖北新設規 臣自到任,迭與湘省紳士互商提倡振興之法:電信漸次安設 鄙夷不屑之心, 亦以湘人爲最。近年聞見漸拓, 風氣日開, 頗以講求實學 小輪亦已舉 承准總 宜及

深秀為剖辨之。上以特旨褒寶箴。寶箴廼得行其志。]等語)略云: 同書光緒二十四年六月甲辰條(可參清史稿肆柴零楊深秀傳:「湖南陳寶箴圖治甚急,

紳, 古義 在, 愆其本旨, 切曉諭,勗以講求時務,勿蹈宋明積習。諄諄訓誡,不啻三令五申。惟是朝廷用意之所 其各精白乃心, 即如陳寶箴,自簡任湖南巡撫以來,銳意整頓,即不免指摘紛乘。此等悠悠之口,屬在搢 目今時局艱難,欲求自强之策,不得不捨舊圖新。前因中外臣工,半多墨守舊章,曾經凱 折衷一是。 大小臣工恐尚未盡深悉。 仍隨聲附和 ; 毋固執成見,隱便身圖。 甚非朕所望於諸臣也。 深惟窮變通久之義,創辦一切,實具萬不得已之苦衷,用再明白申諭, 力除壅蔽, 上下以一誠相感, 庶國是以定, 治理蒸蒸日上, 遇有交議事件, ,則是有意阻撓,不顧大局,必當予以嚴懲,斷難寬貸。當此時事孔棘, 現在應辦一切要務, 倘或面從心違, 希冀敷衍塞責, 内外諸臣,務當周諮博訪, 總之,中國現在病在痿痺,積弊太深, 造端宏大,條目煩多,不得不衰集衆 詳細討論。 致令朝廷實事求是之義 毋緣飾經術, 諸臣所宜力戒。 朕實有厚望 爾諸臣

同書光緒二十四年七月甲子條略云:

諭:陳寶箴奏:遵保人才,開單呈覽一摺:湖南候補道夏獻銘、試用道黃炳離、降調前內 閣學士陳寶琛、 補道楊樞、試用道王秉恩、江蘇試用道歐陽霖、江西試用道惲祖祈、杜俞、湖北候補道徐 内閣候補侍讀楊鋭、 禮部候補主事黄英采、刑部候補主事劉光第 廣東候

衙門傳知該員,預備召見。其餘均由各該督撫飭知來京, 江蘇候補道柯逢時、 湖北試用道薛華培、候補道左孝同:以上各員, 一體預備召見。 在京者著各該

同書光緒二十四年七月辛未條云:

同, 諭 均著賞加四品卿銜,在軍機章京上行走,參預新政事宜。 内閣候補侍讀楊鋭、 刑部候補主事劉光第、內閣候補中書林旭、江蘇候補知府譚嗣

同 書光緒二十四年八月乙未條略云:

諭 主事康有爲,實爲叛逆之首, 大學士榮禄著管理兵部事務並節制北洋各軍, 由禮部頒給關防。

,現已在逃。舉人梁啓超,

與康有爲狼狽爲奸,

所著文

林旭、楊鋭、劉光第等,實係與康有爲結黨,隱圖煽惑。楊鋭等每於召見時,欺蒙狂悖、 語多狂謬,著一併嚴拿懲辦。康有爲之弟康廣仁,及御史楊深秀、 軍機章京譚嗣同

密保匪人。實屬同惡相濟,罪大惡極。前經將各該犯革職,拿交刑部訊究。旋有人奏:若

稽時日,恐有中變。朕熟思審處,該犯等情節較重,難逃法網。倘語多牽涉,恐致株累。

是以未俟覆奏, 於昨日諭令:將該犯等即行正法。

百 書光緒廿四年八月辛丑條略云:

湖南巡撫陳寶箴,以封疆大吏,濫保匪人,實屬有負委任。陳寶箴著即行革職,永不

叙用。伊子吏部主事陳三立, 招引奸邪,著一併革職。

同 書光緒廿四 年八月甲 辰 條 云:

諭 陳寶箴昨已革職永不叙用。 榮禄曾經保薦, 兹據自請處分, ……榮禄,

口 書光緒廿 四年八 月丁未條略 云

及北洋各軍,悉歸榮禄節制, 提督董福祥所部甘軍、 現在時事艱難 以練兵爲第一要務, 以一事權。 提督聶士成所部武毅軍、 是以特簡榮禄爲欽差大臣, 候補侍郎袁世凱所部新 所有提督宋慶所部 建陸軍,

以

二十四年九月辛亥條 云

府, 禧外紀言及此事,寅恪昔舉以詢先君,先君答言不知。但其時先君摯友李木齋丈盛鐸在榮禄幕 可收拾矣。那拉后所信任者為榮禄,榮禄素重先祖,又聞曾保舉先君。(西人Backhouse 所著慈 權實屬於那拉 能悉改變, 寅恪案, 慈禧外紀所言, 諭 綜合上列資料, 吏部奏遵議處分一 故欲先以湘省為全國之模楷 后, 如那拉 或非無因。 先祖關 后不欲變更舊制, 光緒帝既無權力, 更激起母子間之衝突, 摺,大學士榮禄應得降二 又湖南文史館所輯參考資料中皮鹿門丈(錫瑞)日記 於戊戌政變始末, 至若全國改革, 可以概 級調用處分。 則必以中央政府為領導。 見矣。蓋先祖以為中國之大, 著加恩改爲降二 一級留 當 大局 謂當 時 中 非 時館 央政 遂

世 勸引那 此故歟? 母 中 為此計 學 憂 當政變後, IE 劃之先導也。 拉 依 張 例 后亦贊成改革,故推夙行西制而為那拉后所喜之張南皮入軍機。首薦楊叔 公百熙保薦 先君苟入京者, 丁憂人員 都中 盛傳先祖必受發往新疆之嚴譴 觀黄尚毅 不列 二人,首為康 八保薦, 當與四章京同及於難。 所記 故張公薦剡未列先君之名。 南海, 知南皮與榮禄本無交誼, 次即先 君。 可謂不幸中之大幸矣。)先祖之意欲通 但先君於光緒二十三年丁酉十二 如李端棻奏保康有為及譚嗣同之例 榮禄之薦先君, 而先祖與榮禄之關 不見於公牘 係, 則不 月丁 過 (見東 相 先 即 祖

華 然止於革 一録光緒 職永 十 不叙用 几 年八 八月庚子 之薄懲, 條 實由 榮禄及王元和碰頭乞請所致也。

黨 凱 卯 先祖先君 (成君主立憲 入軍機 人之舊 以次年 不附 又當時資政院初設, 和立 怨。 革 為慈禧 其意以為廢光緒之舉既不能成,若慈禧先逝,而光緒尚存者, 職是之故, 憲之説。 欲他日自任内閣首相, 歸寓南昌, 七十壽辰 是時 先君已被舉為議員, 立憲之説興, 不久, 江 戊戌黨人除康梁外,皆復原官, 西 巡 無吳 先祖 重惠致 當日盛 逝世, 而光緒帝僅如英君主之止有空名。 電 亦推卸不就也。 流 先君移居金陵, 以詩歌自遣。光緒二 政 如 府, 張謇鄭孝胥皆贊佐其説 謂素 號 袁氏知先君摯友署直隸布政使毛 維 但先君始終無意仕 新 之 陳 主 身將及禍。 政 方面 獨 亦以 先 進, 君 欲先修好 為 窺 故一方 未幾 十九年 17 見 憲 袁 袁 氏之 戊 可緩 面

池」及「贈順循」詩。)至天津,歸途復過保定,(可參同書同卷「保定別實君順循,三日至漢口登 (可參散原精舍詩卷下「〔光緒三十二年丙午〕四月下旬至保定。越閏月二日實君布政兄讌集蓮花 非先得三君誓言,決不啟行。三君遂復電謂止限於舊交之晤談,不涉他事。故先君至保定後: 督楊士驤寓天津,皆令其電邀先君北遊。先君復電謂與故舊聚談,固所樂為,但絕不入帝城。 實君丈(慶蕃),署保定府知府羅順循丈(正鈞)及吳長慶提督子彦復丈(保初),依項城黨直隸總

江舟望月」詩。)遂南還金陵也。

寒柳堂記夢未定稿(補)

月所寫按語 謹 古籍出版社 [按:寒柳堂記夢未定稿在蔣天樞教授編定之先師遺著寒柳堂集(陳寅恪文集之一,上海 一八二頁,本書一八三至二〇五頁,以下簡稱「蔣本」)。前有蔣先生於一九七九年十二 一九八〇年版)附録中已發表一部分,計共四篇(見上海古籍版寒柳堂集一六三 略云

「弁言」,全。(一)「吾家先世中醫之學」,全。(二)「清季士大夫清流濁流之分野及其 興替」,僅存本章之前半部。(六)「戊戌政變與先祖先君之關係」,全;所缺引文亦補 作。曾由助教黄萱繕寫謄清稿兩份,大都在混亂中佚失,迄今僅存零星殘稿,計: 寒柳堂記夢未定稿原共七章,一九六五年夏至一九六六年春間所寫,爲先師最後之

光緒十年三月至二十年十一月間清室中央政治之腐敗」及(七)「關於寅恪之婚姻」四篇: 在按語後之全文目録中,其(三)「孝欽后最惡清流」;(四)「吾家與豐潤之關係」;(五)「自

齊。(中略)茲將殘文併全文目録,附印於寒柳堂集之末。

夫清流濁流之分野及其興替」中頗大一部分(與黄秋岳所記述史事有關者)刪除之;更將第

「文革」初期,於「造反派」限期迫交情況下,曾經先師匆促刪節,抽出第(二)章「清季士大

為後來改定原目後所另寫者,

疑此「新稿本」係

同,「新稿本」之目録則為先師母之手跡,

品 期被强索去的寒柳堂記夢未定稿之另一稿本(以下簡稱「新稿本」),其内容較「蔣本」所收之 一號樓上,時年七十六。」則此「新稿本」之最後修訂以成今日所存之形式, 云「佚」。一九八七年,先師哲嗣陳美延師妹從中山大學落實政策辦公室收回在「文革」初 亦近千字,末署:「一九六六年六月二十三日端午, 寅恪書於廣州康樂中 頗有增益, ,約達七千餘字;而將「蔣本」中有關黃秋岳花隨人聖庵摭憶之記述全部刪 山大學東南 自當在「蔣

編號,下分七章,其篇目及編號見本書一八四頁。「新稿本」之目録則共為七篇,以「弁言」 八日函所云, 為第(一)篇;「蔣本」(一)、(二)、(三)章之篇目在「新稿本」中則為(二)、(三)、(四),而 此兩本之目錄及篇章編號,彼此不甚一致。「蔣本」目錄中共有八篇,以「弁言」為篇首,不 三章,兩本又全同。據美延師妹不久前(今年八月十日及十九日)來函,及黄萱先生八月十 蔣本」中之(四)「吾家與豐潤之關係」則不見於「新稿本」。於是此以下之(五)、(六)、(七) 先師此遺稿之定本(當時由黄萱先生用方格稿紙謄清抄正 者)目録與「蔣本」

之腐敗 新稿本」收回時,已被人與其他四篇文章合訂為一册,而此合訂本中其他各篇均保持查抄時)章「吾家與豐潤之關係」及第(五)章「自光緒十年三月至二十年十一月間清 」全部删去, 借以應付「造反派」之檢查,而免生枝節也。或於交出後,復又失去若干内容。 而保留第(五)章之篇名, 却將第(四)章之後半劃與第(五)章, 室中 以 -央政治 蓋此 足

原裝釘, 成 都是用很粗的直行紙録下來的, 該稿共七章,已完全寫就, 惟獨此「新稿本」則為拆除原裝釘綫重新組裝者。關於內容,上述黃萱先生函云: 我未曾再見過。(中略)現存的稿子, 並令我謄清一份。其後再經修改或删去, 我認爲是初稿, 因爲我記得當時 均由師 陳 師的 母手筆寫 初稿

與原本不一樣。

據此, 並認真對照兩本異同之後,僅依以下原則及方法進行整理:

與豐潤之關係」一篇及引用黄秋岳書的引文,第(四)章及第(五)章界限好像分不清,

而謄清稿則用方格的稿紙抄。

因删掉第

一四

)章 吾家

一、原則:

稿本 其全被删去, 甲、以蔣 」所刪 本」為基礎,「蔣本」原 主要為引用黄秋岳書中搜集之史料與評述, 乃迫於當時之不正常環境,非出先師本意。黃萱先生函中亦云:「陳師對於 有,而為「新稿本」所删改者,全依「蔣本」保留之, 以及先師對之所作的某些 蓋

黄秋岳的摭憶備極讚賞,他說:『秋岳雖坐漢奸罪死,不當以人廢言。』」係屬實情,適憶 九四七至一九四八年間從先師習作中國近代史方面學位論文時, 「為弄清史事真相,什麼材料都可用,只看你會不會用。」「假中有真, 先師即有 真中掺假之史 此 並

料,隨處都有,要在善於鑒別。」

凡兩本同有的內容,不再照錄原文,以免與已出版之「蔣本」重複;只以「新稿本」校訂

「蔣本」之誤字、漏字,作校勘記。

改之文字後,全文照録,補入之。 丙、「新稿本」有而「蔣本」無者,在核實存真,保持先師本意,復原在不正常情況下被迫删

一、各篇章之整理辦法:

甲、

稿本」在不正常情況下删改篇目以應付困難環境的情況後,更應如此

目錄及各篇章之標號概依「蔣本」, 尤其在已確知全文八篇七章皆已完成而又缺失

知,「蔣本」所據,實有二源。黃萱先生估計:「(前略)此殘稿有可能是現存稿件(適按:指 於此篇之末又有按語云:「此章殘稿係從另一册初稿中録出。此章未完,以下缺。 「弁言」及(一)「吾家先世中醫之學」二篇,兩本内容一致,不再引録原文, (二)「清季士大夫清流濁流之分野及其興替」一章,「蔣本」按語云:「僅存前半部。 只作校勘記。 而

只以「新稿本」校訂之, 寫出校勘記 前半部亦較「蔣本」增百餘字。今將引録「蔣本」所無部分,其「蔣本」已有者,不再録原文, 新稿本」)中删下來的一部分。」「新稿本」於此章後半部有千餘字的記載為「蔣本」所無,而

字(亦仍有缺佚,考見後文),與(七)「關於寅恪之婚姻」六百餘字皆為「蔣本」所全缺。今將 全文引録以增補之。 「蔣本」目録之(三)「孝欽后最惡清流」(「新稿本」在「孝欽后」前多「前清」二字)約四千餘

「蔣本」目録之(四)「吾家與豐潤之關係」已佚。「新稿本」無此,今仍缺佚。

與標題所應包涵之範圍大不相稱;字跡亦異,而且潦草,顯係後加。似是被迫交出前已抽 己、兩本之(五)「自光緒十年三月至二十年十一月間清室中央政治之腐敗」一章,「蔣本」有 目無文,注「佚」。「新稿本」則於(四)「前清孝欽后最惡清流」篇中插入此第(五)篇之標題 而又有漏字、倒文, 標題位置也不在分段落處, 而倉促於第 (四)章中插入第(五)章之標題, ,而且是添置於首行之外,標題後之內容又 以資彌縫, 借以應付查詢者。故此條標題

「今對照「新稿本」,又可增七百餘字,主要集中於兩處,現予引録,以補「蔣本」所缺。 兩本之(六)「戊戌政變與先祖先君之關係」一章,「蔣本」按語云:「全,所缺引文亦補

之插入第(四)章者,

應删,

而於目録中注明「佚」。

俟來日。

所略而為「蔣本」所「補齊」之引文,共達一千一百餘字,但「新稿本」有,而為「蔣本」所缺漏 齊,自亦無妨,今皆保留,不予回删。今以「新稿本」中引文與「蔣本」對校, 至引文,先師如稱「略云」,必是節引,且一般不加略號。「蔣本」視為缺引之文,而予補 可知「新稿本」

之引文,亦仍有六十餘字,謹皆補入。

考慮,力求符合先師本意,於背景已明之後,敬謹擬定整理之原則與辦法如上。凡已見於 待他日問世之機緣, 此自受業義所當為。 經仔細對校兩本異同, 總之,據美延師妹見告,此「新稿本」曾於「文革」初期非正常情況下被迫交與「造反派」羣衆 組織,以後輾轉入於中山大學歷史系,終於在二十年後,始重歸家屬手中。囑為整理,以 後文銜接字句。 蔣本」者,此皆略,其以「新稿本」增補或訂正「蔣本」者,皆照録,並注明在「蔣本」中的前 以及先師當時處境 慎重

標題,而於後加一「(補)」字,以示與「蔣本」之間的連續性。其仍缺佚部分,只得暫置,以 根據上述之認識與想法,謹仍以先師昔日所手定、為「蔣本」所遵用之寒柳堂記夢未定稿為

九九〇年八月及門劉適(石泉)謹識

目 録

弁 言(校勘記

(一) 吾家先世中醫之學(校勘記

(三)孝欽后最惡清流(全文增補

(二)清季士大夫清流濁流之分野及其興替(部分增補及校勘記)

四)吾家與豐潤之關係(佚)

(六)戊戌政變與先祖先君之關係(局部增補及校勘記) 五)自光緒十年三月至二十年十一月間清室中央政治之腐敗(佚)

(七)關於寅恪之婚姻(全文增補)

弁 言(校勘記)

數、行數皆依「蔣本」。下同,不另作説明。) 、原文依「蔣本」,見本書一八五—一八八頁。今不照録,僅據「新稿本」作校勘記如下。頁

第一八五頁,第六行:「內子唐瑩」。「瑩」當作「篔」。

第一八六頁,第四行:「四庫全書總目提要壹肆零……」。「零」當作「拾」。先師引書,列卷

數,向用大寫數字,凡今用「○」或「零」字,例皆用「拾」字。

第一八六頁,倒第一行:「俱不署斷語」。「署」當作「置」。

一八七頁, 第四行:「劉全美作字説偏旁釋一卷」。「釋」前脱「音」字。

八七頁, 第六行:「尤其談言微中」。「尤」與「其」之間脱「宜」字。

八七頁 第十一行:「排除恩怨毀譽務求一持平之論斷」。「譽」字後,脱逗號。

一八八頁, 第二行:「後雖復官」。應為「後雖復原官」。

脱逗號。 第一八八頁,第二行:「然以吏能廉潔及氣節文章頗負重名於當代」。「……氣節文章」後、

一)吾家先世中醫之學(校勘記)

第一八九頁,第七行:「實箴〔咸豐〕辛亥舉」。「舉」後脱「人」字。

(二)清季士大夫清流濁流之分野及其興替(補文及校勘記)

蔣本」之本篇開首二句為:「清代同光朝士大夫有清流濁流之分,黄秋岳花隨人聖庵摭憶

並相應地對第二句稍作調整。其文云: 論之詳矣。」(見本書第一九○頁,倒第二行。)「新稿本」首句同。其下文則增補 一段史料

盦(適按:同「庵」字)摭憶言之更詳。茲先録薇生之書於下, 光朝士大夫有清流、濁流之分,惲薇生毓鼎崇陵傳信録已略論之。黄秋岳濬花隨人聖 其文云:

體芳、 棱棱具風骨者,咸有以自見,吴縣潘祖蔭、宗室寶廷、 光緒初年,兩官勵精圖治, 、閩縣陳寶琛、吳橋劉恩溥、鎮平鄧承修,尤激昂喜言事,號曰清流, 彌重視言路。 會俄人逾盟, 南皮張之洞、 盈廷論和戰。惠陵大禮議起,一時 豐潤張佩綸、

而高陽李文正

瑞安黄

公(鴻藻)當國,實爲之魁。

稿本」中保存者。文云: 書第一九三頁倒三行至一九三頁倒二行)。以下即進入後半部,全為「蔣本」所闕,而在「新 所云:「……按散老此電,乙未五月十七日由武昌發,戌刻至江寧者。(頁二一四)」(見本 然後下文(另起段)接「蔣本」所云:「黄氏書所論迄於光緒中晚, ……」直至「蔣本」本篇之末

吳漁川(永)庚子西狩叢談肆略云:

寺。翁常熟當國,尤百計齮齕之。公益不喜接客,來者十九報謝,因而門戶亦甚冷落。 遇不爲不幸。 意殆不能無鬱鬱。當自謂:予少年科第,壯年戎馬,中年封疆, 公自北洋罷任(寅恪案:「公」指李鴻章),以總理各國事務大臣,久居散地,終歲僦居賢良 自問亦未有何等隕越。 乃何端發生中日交涉, 至一生事業掃地無餘 晚年洋務, 一路扶摇,

對付。乃必欲爽手扯破,又未預備何種修葺材料,何種改造方式,自然真相破露,不可收 裱, 然究竟決不定裏面是何等材料。即有小小風雨, 打成幾個窟窿, 隨時補葺, 揭破 練兵也 但裱糊匠又何術行能負其責? 就可敷衍一時。如一間破屋, 半生名節被後生輩描畫都盡。環境所迫, 海軍也 都是紙糊的老虎, 由裱糊匠東補西貼,居然成一淨室。雖明知爲紙片糊 何嘗能實在放手辦理?不過勉强塗飾, 無可如何。 又曰:我辦了一輩子的事 虚有其表;不 亦可支吾

易實甫丈(順鼎)及先舅父俞恪士(明震)則皆在臺灣,助臺獨立者。蓋其時愛國之人認為政府雖已 海丈(鼎芬)則以劾合肥罷職, 人, 有是非之心者, 寅恪案:漁川之書可與秋岳之論相印證, 無不反對,與先君之「風采踔發、 文芸閣丈(廷式)則在京為主戰派之重要人物, 但秋岳之論仍有未盡。 物望所歸」無關。 蓋當馬關和約成後, 況先君摯友、 並是力攻合肥之人。 姻親中梁星 凡愛 **國**之

段後一 中, 綜合此數事 有「中有異人自楚歸」句,及「六一人不識, 起兵, 以燒貢院為號, 唯作「湘垣 多用湘人辦湘事。當時,先君友人中有欲側身礦 割 臺 先祖、 一句 明詩夫人覽之, 而人民猶可不奉旨,如後來庚子歲東南諸督撫不遵朝命殺害外僑之比。 Z. 緘。 先君罷 附錄於此, 翩翩濁世佳公子,不學平原學太原。 字體工整。 職後, 笑曰:「此二句卻佳。 自稱湘南王。寓南昌時, 以資談助 歸寓南昌磨子巷。忽接一函,收信人為「前湘撫陳」。寄信人不書姓名 啟視之, 則為維新夢章回體小說之題目一紙, 山水倒相逢」,暗藏「三立」二字語。 」當戊戌時, 後有人遺先君以劉伯溫燒餅歌鈔本 務局, 」乃用史記平原君傳及新舊唐書太宗紀。先母 不能如願, 湘人反對新政者, 遂懷怨望者。 別附七絕數首。其中一 謡喙百端 復次, 光緒 冊 先祖 謂先祖將 二十五年 以其 撫

散原精舍詩上「得叔澥安慶郵書稱吳摯父京卿歿於桐城里居, 耽吟酬句無朝暮 指點 江城角雨雄。 那料和鳴一鳥去, 次前韻哭之, 並寄叔澥」云: 直教行哭九夷同。文章後世卿云

師友當前孔老通。 活國新編 猶 照眼 瞳矓争睹日生東。

受任 遊叢錄一書而言。今附錄先君此詩,以見吾家與吳桐城固有文章氣類之雅也 寅恪謹按:江丈瀚字叔澥, 京師大學堂總教習,尚未赴任也。 時居安徽縣聶仲芳巡撫 活國 新 編者, (緝槼)幕中, 指桐 城東遊日 故先得桐 本 考察教育後 城 逝世之訊。 所撰之東 桐 城 時

本篇 校勘 記:

第一九一

頁,

清流」。 「……李鴻藻」之後,「陳寶琛……」之前,加「翁同龢」。 倒第四行:「自同治至光緒末年,京官以恭親王奕訢 李鴻藻 陳

·等為

二九一 頁, 倒第三行:「至光緒迄清之亡」。「光緒」後加「末」字。

第四行:「康熙諸主……」。應為「康、乾諸主……」。

)孝欽后最惡清流(補文及校勘記

否本篇補文中有一部分或大部分内容應屬於第(五)章,即自「光緒十年三月至二十年 此篇 為「蔣本」所缺,今據「新稿本」補入。由於本篇中被插入第(五)章之標題, 因而 涉 及是

月間清室中央政治之腐敗」一篇的問題,對此,將於補文後面的校勘記中,作出

具體

的

照録補文:

鑒定。

清咸豐之季年, 元末庚申帝之情事相類。然以國内外錯綜複雜之因素, 太平天國及其同盟軍縱橫於江淮區域。英法聯軍攻陷北京, 清室遂得苟延其將斷之國祚者五 文宗 走 避 熱 河 +

戌、 所著 年。 端 陳 而 生靈者二十年。 朝及宣 石遺丈(衍)石遺室詩話柒有 以滿人榮祿掌握兵權。後來攝政王載灃承其故智,變本 囿,移用海軍經費, 凡此 庚子之事變。二, 統 言后小名阿翠。 為把持政 朝之史者, Ŧī. 十年間政治中心, 三,為違反祖制 権 必以那拉后為主要之題 致有甲午之敗。 五,為分化漢人,復就漢人清、濁 為重用出自湘軍 不以侄嗣穆宗, 曾樸孽海花亦有是說 則在文宗孝欽顯皇 節, 信任閹宦, 頗可與第五點相印證 系統之淮軍, 而以弟承 材, 遂令晚清政治腐敗更甚。 自無待論也。 大統。后取本身之侄女强配 但 后那拉氏一人。(寅恪十餘歲時, 無從證實, 以牽制湘 加厲,終激起漢人排滿復 茲錄之於下。 綜觀 軍, 姑附記於此。)故述清代同 遂啟 那 が拉后一 四, 北洋軍閥之一 其文云 兩 德宗, 為縱情娛樂, 生之行 派中, 曾見 釀 事 仇之觀念。 揚濁 成 派 後 約有 日 抑清, 來戊 光兩 本人

筱石丈夔龍 清末重 陔餘尚有酬恩地, 用滿 先後罷 時 事 人 以陳弢庵七律後 既 斥引退, 江春霖特疏糾參。疏上, 以謀中 H 非 勤與鄉鄰講孝經」。時以某爲軍機大臣, 央集權。 相繼去。 言官中若趙啓霖、 二聯用事爲最切, 方慶王奕劻將引其黨某爲軍 舉軍 機處、 逐回原衙門行走。 江春 海 陸軍 霖 云 書壁會當思魯直, 胡思敬 財政、 機大臣 外交諸 春霖旋假歸 趙 熙、 亦罷論也。 (寅恪案: 重任, 陳 田 裂麻 養母。 數 張[亨嘉]鐵 均 竟不相 以 某」指陳 都 皆 皇宗親 直言 延 賦

寒柳堂記夢未定稿(其

君云「白 四海争傳真御史, 日黄鹿車擊帜,東門出祖江御史。纖兒撞壞好家居,誰司言職 九重命作老翰林。 」蓋未須下斷語也。 因憶鞾東(寅恪案: 吾當 耻

「江」指江杏村春霖。「趙」指趙堯生「熙」),未應料理五湖船。」芷孫去時,漱唐未入臺(寅 順德羅敦蒙之字)有送趙芷孫御史(啓霖)句云:「此後臺中望江、趙(寅恪案:

恪案:「漱唐」,胡思敬之字),尚有江、趙。江去時,〔鄭〕蘇堪(孝胥)句云:「臺 中閱道應無恙。」(寅恪案:宋趙諡字閱道,故海藏以之目香宋也。)則僅有趙矣。

甚貪污。 亦可見一斑矣。總而言之,清流士大夫,雖較清廉,然殊無才實。濁流之士大夫略具才實,然 類,其例頗多,不遑枚舉。茲僅就黃秋岳書所論寶廷、張佩綸二人之始末,而加以補充糾正 寅恪案 其中固有例外,但以此原則衡清季數十年人事世變,雖不中亦不遠也。文芸閣丈(廷 其不當不實之處頗多。但其所言,實中孝欽后之所忌。卒黜之殺之而後已。 同光時代士大夫之清流, 大抵為少年科第, 不諳地方實情及國際形勢, 務為高 若斯之 由

式)純常子枝語玖云:

以電奏歸總理各國事務衙門代奏,而總署之權過於明之通政使矣。通政使之權 本兵,不過制各軍之進退,而總署之權,則兼其炮之放否,船之行否,而亦制之, 而總署則竟可不奏也。 以兵事歸總理衙門電寄,而總署之權過於明之本兵矣 止於壓 且能與 明之 閣

所能核。紊職分, 聞其餉事也。而且總署之用財,非户部所能知(原注:「兼海軍言」)。總署之保案, 而敗國家, 究亦未得一真通交涉之才爲可嘆也。(原注:「余甲午有一 非吏部

職分, 即指總署而言。」)

不究 餫不

疏

續碑傳集吳汝綸撰文華殿大學士直隸總督贈太傅一等侯李文忠公墓誌銘略云: 子, 敗, 公威望久, [公]專力外事,在直隸最久,於外國政、學、 中國因之益重云。公既盡心防禦,顧持重不欲開兵釁。待遇外國客,能時 使不能竟所施爲。 而西人顧交口稱頌, 朝廷命公往日本議和。 使來說者自失本謀。 皆導國使猛進, 所至 禮遇逾等。 與歐美强國競盛。以財權不屬,人才不興,卒牽於異議, 國家每與外國生隙, 公薨以二十七年九月二十七日, 遇刺不死, 卒定和而還。 謂爲東方俾士馬克。 制、 公輒用計謀消弭之。甲午日本操兵, 師既 法、 未幾, 兵備、 命公歷聘歐美 壽七十 財用、 五洲萬國婦孺皆知 有九。 工商藝業 公諱 一諸國。 鴻章 諸國 靳饋 其剛柔張 無一

總署之權限既如 荃。 道光丁未翰林。 上述,則合肥於光緒十年甲申對內對外之關係,可以下列幾點解釋之。 祖以上皆不仕。父文安,進士, 刑部郎中。

聞

岑彦卿(毓英)宮保云: 以慈禧之意旨為決定。(見李文忠公(鴻章)全集朋僚函稿二十,光緒十一年五月初五 日復

煤礦,福州船廠,接濟煤械,爲持久索費計。正慮兵連禍結,中旨密令鄙人維持和局, 「此次議款之速,實因桂滇各軍潰退,越事已無可爲,法提督調集兵船,欲攻奪臺灣鷄籠 乃

敢冒不韙以成議」等語。)

要速和。(見同書同卷,光緒十年六月初六日復張樵野(蔭桓)京卿略云:

「法事確定,不意又起波瀾。馬尾船廠危於累卵,幼樵屢電,尚盛稱軍威,亦不自量之甚

矣。總之, 和局翻一回,更壞 一回。 求如前約之粗疏, 而不可矣。」

縮小戰爭範圍。(見同書同卷,光緒九年十二月十二日復翁叔平(同龢)宮保 一越事之興,尚冀迎刃而解,息事寧人。今則局勢屢更,彼此皆騎虎難下,

實大可虞。 以待機會。 幼樵英銳無比。叩以將來結局若何,固亦茫無把握。我公憂國如家,知必長慮 若僅在越地鏖兵,利鈍無甚關係。波及內地,則有各省强弱不齊,民窮財匱, 自不得不堅持

四, 北洋不能派兵援閩。 (見同書電稿三,光緒十一年六月初二日巳刻,寄兩廣、 閩浙督撫云:

請飭援應牽制等語。孤拔赴閩,有欲據地爲質之説, 頃間, 浙相距較近,着彭玉麟、張樹聲、張之洞、倪文蔚、劉秉璋酌撥師船前往, 接總署來電:初一日奉旨:疊據何璟、 張佩綸等電報, 南北洋覆稱無船可撥。 法全力注閩 惟閩防緊急 已進八艘,

牽 制 , 欽此。 即轉電閩浙粤等因。……」)

及同書同卷,光緒十年六月十六日辰刻寄閩防張(佩綸)會辦云:

内外,備與黃金山礮臺夾擊,萬不能撥。非不愛公,非分畛域,諒之。」

現因旅順西嶺添築土臺,將威、鎮海礮全移置,皆改運船。超[勇]、揚[威]衝船出入口

不可先開礮。(見同書電稿二,光緒十年閏五月二十七日酉刻到寄會辦閩防張(佩綸

Ŧ,

Z 「二十八, 三點鐘限期已滿, 法船必大進。領事言: 如不肯以船廠作押, 我若攔阻,

若不阻,彼亦不能先開職。或尚可講解。

望相機辦理,

切勿躁急。公屯馬

彼必

尾,非計。」)

開炮,則決裂。

將。吾人今日平情論之, 合肥之於外國情事, 重 綜合上引材料觀之,合肥自同治元年至光緒二十七年,凡歷四十年,專辦洋務,故外人竟以合 至 往往為外人所欺給。即就法越一役言之,合肥若果能深通外情者,則中國應得較勝之結局也。 肥為中國之代表,亦自有理由。夫淮軍之興起,本出於那拉后欲藉此以分化牽制 於合肥對豐潤之關係,既以豐潤為不知兵,(曾樸孽海花為合肥女菊偶偽作七律二首,其第 左之流, 雖亦不能不稍稍敷衍,然其親密之程度,則湘軍之元勛,遠不及淮軍 固略勝當時科舉出身之清流, 但終屬 湘軍 一知半解, 特加 倚

敗 所作, 貳首第 豐潤 可笑也。 聯下句「殺敵書生紙上兵」即是此 因之戍邊。是豐潤無 員於合肥,)又不奏請免其守閩之責, 唯誡以不先開礮, 而合肥有員於豐潤, 意。趙竺桓炳麟柏岩感舊詩話壹竟認此詩真為合 更不遣北洋軍艦往 宜乎合肥内心慚疚, 援。 而以愛女配 迨 馬 i肥女 江 . 戰

光緒 淮 題 朝東華 公名碑 +錄光緒. 潘炳年, 十年八月辛丑條略云:都察院代遞翰 可 治 年辛未科進士 翰林, 福建長樂人。 林院編修潘炳年摺稱: (寅恪案: 清 朝

之。

貴即三

國志演義所謂

「賠了夫人又折兵」者耶

得, 納, 如 船局後山 臣等於馬 該大臣前後奏報種種虚捏,與臣等所接閩信, 狼 給 晨入城, 匿禪寺下院, 遣弁四探, 須出 何 以張佩綸平日侈談兵事, 一潛逃。是日大雷雨,張佩綸先而奔, 如 江敗後, 璋 奔之情形 出 棲 廠 報者賞錢 兩 廣 迭接閩信, 距船廠二十餘里。次日抵鼓山之彭田鄉。 也。 會館 自駐 八一千, 彭 兵無主帥, 市人 田 俱言張佩綸何如璋聞警逃竄。 鄉 累日。 又逐之。 遂得之。 際此中外戰局伊始, 餉無專責 偵知敵出 後踉蹌 何如璋奔快安施氏 判若歧異。張佩綸、何如璋 中途有親兵曳之行。 議者固 出就張佩綸於彭 攻長門, 身膺特簡 知閩事之必敗也。 將謀 適有廷寄到。 茲恭讀八月初 祠, 竄 臨事 鄉 出, 田 鄉。 人焚逐 抵鼓 始回。 必有把握。 張 Ш 所恃爲長城 之, 督撫覓張佩綸 南聞 佩 一日諭旨 綸 麓 此 夤夜 恐敵 張 礮 鄉人 佩 張佩綸 跳 投 綸、 洋行 拒 方審 而 跡 即 從 何 及 不

同處, 泰西揶揄之口?臣等既有所聞,理合據實公揭。謹繪圖貼說,黏附呈進軍機處,恭候御覽。 何如璋荒謬至此, 應所員紳, 匿戰書,意尤叵測。後於六月一日將船政局存銀二十六萬,藉名採辦,私行兑粤,不告支 脱逃於後,敢肆無忌憚如此也。 於輪船,聚十一艘於馬江,環以自衛。各輪船管駕,疊陳連艦之非,張佩綸斥之。 到閩後,一味驕倨。督撫畏其氣焰,事之維謹,排日上謁,直如衙參, 可毁,豐潤學士必不可死」之語。是則張佩綸早存不死之心,無怪乎調度乖謬於先, 實則置身事外,證以外間風聞, 於是日始竄彭田, 法船駛入馬尾, 彭田 知耶?不知耶?臣等不能爲張佩綸解也。 張佩綸又斥之。事急而乞緩師於敵,如國體何?開礮而先狂竄,如軍令何?中岐即 何以謝死事二千餘人?何以儆沿海七省之將帥?何以服唐炯、 而私交旗 即鼓山後麓。張佩綸自諱其走,欲混爲一,如地勢迥隔何?敵攻馬尾, 倉促乃以入告。 迨各將請戰,又以奉旨禁勿先發爲詞。 事後並無一疏之劾, 而冒稱力守船廠, 昌、 匯豐各洋行。 何如璋實督船政,旦夕謀遁,棄廠擅走,已有罪矣。 張佩綸所恃爲粤援之人,私電函致,有「閩船可燼, 如不能掩人耳目何?且何如璋實匿戰書, 謂非狼狽相依, 羣議其盗國帑, 臣聞張佩綸敗匿彭田, 朋謀罔上, 言非 無因。 臣等所不敢信。 張佩綸夙以搏擊爲名, 徐延旭之心?何以 身爲將帥, 竟未籌及防務。 以請 旨逮問 張佩綸與之 白開戰 張佩綸 若不嚴 足未登 爲詞 而謀 聞戰 盟 至

清德宗景皇帝實錄壹玖壹,光緒十年甲申八月戊寅條略云:

參。 兹又有人奏,馬尾一役,諸臣諱敗捏奏,濫保徇私,請將督撫治罪, 昨據編修潘炳年等奏:張佩綸等價事情形, 各摺片,着左宗棠、楊昌濬歸入前次各摺,一併查明具奏。 何如璋故匿戰書, 私兑該局銀兩回粤, 沈保靖、程起鵬朋謀營私, 請旨查辦,復諭令左宗棠、楊昌濬秉公查辦。 如果似此捏報戰狀 並將方勳等保案撤 貪劣情形; 請飭查 徇私

光緒朝東華錄光緒十二月戊戌條略云:

亟應嚴行懲做。

左宗棠等務當一秉大公,

持平辦理,不得偏徇。

逃情事, 所擬請交部議處, 往來彭田 濫保徇私, 案,清朝進士題名碑:萬培因咸豐九年已未科進士。福建崇安人。)張佩綸等諱敗捏奏, 諭:前據都察院代遞翰林院編修潘炳年奏,張佩綸等僨事情形, 日法必妄動之語, 何璟告以所聞 惟調度乖方,以致師船被毁。 馬尾之間, 各一摺。送諭左宗棠楊昌濬查辦。茲據左宗棠等查明具奏,張佩綸尚無棄師潛 殊覺事重罰輕,著從重發往軍臺效力贖罪。何如璋被參乘危盗帑, 掩飾取巧,厥咎尤重。張佩綸前因濫保徐延旭等, 謂明日法人將乘大潮力攻馬尾, 十五日始回船廠。 其奏報失事情形摺内, 且該員於七月初一日接奉電寄諭旨令其備戰, 該革員並不嚴行戒備。 輕謂預飭各船管駕, 給事中萬培因奏, 降旨革職。 迨初二日敗退 左宗棠等 有初三 (寅恪 查無

其事。 以慰死事者之心。左宗棠久資倚畀,夙負人望,何以蹈此惡習?著與楊昌濬均傳旨申飭。 糊,於張佩綸等處分意存袒護開脱。 臺效力贖罪。左宗棠、楊昌濬於奉旨交查要件,自應切實詳查覆奏。 惟以押運銀兩爲詞, 竟行逃避赴省, 所請革職免議之處, 不足蔽辜, 軍事是非功罪,關係極重。若失事之員罰辦輕縱, 乃所奏各情, 著從重 語多含 發往軍 何

史稿壹肆貳兵志柒海軍條云: 海 福州船廠 口六十 里。

同治五年創於閩浙總督左宗棠, 福州船廠自造各兵艦。始建船廠, 船政大臣沈葆禎。 聘工師於法, 延教員於英。 閩縣馬尾江 距省會四十里,

清 史稿肆伍拾張佩綸傳附何如璋傳云:

何如璋, 字子峩, 出奔。 授少詹事,出督船政。承[李]鴻章旨,狃和議。 所如勿納,不得已,往就佩綸彭田鄉。 佩綸爲罪魁, 籍廣東大埔。同治七年進士,選庶吉士,授編修。以侍讀出使日本, 如璋次之。 如璋亦遣戍。 後卒於家。 佩綸慮敵蹤跡及之, 給如璋出。士論謂閩事 敵至,猶諭各艦毋妄動。 及敗, 藉 口押銀

殘毀及駐閩 據清廷諭 初亦不過革職。其後豐潤與何如璋同被革戍邊,則濫保匪人之罪輕,債軍之罪重, 船 艦大部沉沒。 豐潤之得罪譴戍(一)因保薦徐延旭、 二罪相較, 前者輕而後者重。 唐炯。 (二)因兵事調度乖方, 故同 保徐唐之滄趣, 其罪 以致馬江船廠 IL 於降調 彰彰明

今觀滄趣所撰簣齋墓誌銘(見閔爾昌纂錄碑傳集補伍, 陳寶琛撰清故通議大夫四五品京堂

張君墓誌銘

過, 益大慚恚, 銜尾毀兩岸礮臺而出。 自是不復窺閩, 船廠以全, 而督臣方以失廠上聞, 午刻寄譯署電。 切責督臣憤憤,既復檄調守廠軍回守省城,君訟言棄門户、守堂奥,非計。督臣被嚴飭, 累乞南北洋援船, [法國海軍提督] 孤拔初謂船廠可唾手得,及見君有備,欲他駛。中旨則飭令勿出閩海, 意君嘗面折左公,必懷宿憾,不爲原洗也。 猝縱磁薄我水師, 九艘潛焉。 以實復諸朝。 獨奪君卿銜, 則示意閩京僚, 勿畀敵。 風閩士劾君擁兵自衛。時君已以水師失利自劾。 唯「自毀廠」一語, 君執不可。(寅恪案:此事可參李文忠公全集電稿叁光緒十年六月初十日 時君已坐薦唐徐奪職, 弗應。 下部議。尋命左公宗棠督閩師, 取君疏鍛練之, 而敵船益至,審衆寡堅脆不敵,請先發, 而我亦壞法三船,孤拔受巨創。法兵登岸輒中伏死。 與合肥原電語意微有不合。)相持逾月, 傳以飛語, 韶責左、 下左公及新督楊公昌濬會按。 楊袒護, 君仍會辦, 謫君戍邊。 上 壯君守廠, 兼署船政大臣。 冀一當, 方事下 君報亦踵至。 督撫船官均褫 法乘 弗許。 執政齕君未 左公時, 左公廉君無 大風潮以 飭君自 君

寅恪案:豐潤欲出閩海追逐法艦,此乃合肥謂豐潤不知此知彼,非知兵者,所論甚當。至於左

脫,或由滄趣之故。「閩京僚」之界說當包括王仁堪、 宗棠之袒護豐潤, 頗疑當時謝章鋌適在湘陰幕中,滄趣與謝氏累世交誼甚篤, 仁東兄弟在內。澗於集書牘叁致朱子涵內 湘陰之為豐 潤解

閩人構陷, 明謀祕計,不可端倪。其他均不足怪,惟可莊兄弟絶交下石,有欲殺之而後甘 弟云:

復次, 吳漁川永庚子西狩叢談肆, 述李合肥之言云:

心意,令人不解。

依然踵其故步,蓋非此不足以自見。制度如此,實亦無可如何之事也。 恨言官,更甚於人。當有極力許我之人,而俯首下心,向我求教者。顧臺院現在,後來者 來放了外任,負到實在事責,從前芒角, 天下事爲之而後難,行之而後知。從前有許多言官,遇事彈糾,放言高論, 立時收斂, 一言不敢妄發, 迨至升任封 盛名鼎 疆, 則痛 後

明言南皮之姓名,漁川曾受南皮知遇,故其書中特為之諱耳。 寅恪案:合肥所謂前為言官,後為封疆,當極力訐之者,當即指南皮。合肥與漁川談論時,

本篇校勘記

一、此篇只見於「新稿本」。「蔣本」無,故無可對校。

以下 内容 章標題之眉目清楚,字跡亦與正文不一致,且較潦草。此標題(五)之字句亦與 之全部軍機 題 先師為文一向結構謹嚴細密,邏輯性極強,夫豈能於此强分篇章?(2)此標題(五)以後之 之權限既如上述,則合肥於光緒十年甲申對內對外之關係, 敗」,一若由此以下之三千餘字乃為第(五)篇之内容, 誌銘之後,次頁首行之前,插入標題「(五)清光緒十年至二十年十一月間中央政治之腐 (兩本皆同)有出入:「光緒十年」前多一「清」字,後面則脱「三月」二字;「中央政治之腐敗」 中反映出 脱「清室」二字;題目標號之「五」字,被塗抹,改「六」,又塗去,於已被抹去之「五」字 本篇之中,於文廷式純常子枝語卷玖論總署權大,及續碑傳集載吳汝綸所作李鴻章墓 流之範圍。(3)此標題不在原稿紙的行格以內,而是寫在首行之外, 后兩黨鬭爭表面化之時])皆相差甚遠,幾乎全未涉及,基本上仍屬第(四)篇孝欽后最 即列舉李鴻章當時處理中法戰爭之五條方針。凡此皆與標題以前之原文緊密相連。 ,全係與中法戰爭,尤其是與福建馬尾之水戰以及張佩綸之獲罪有關,與第(五)篇標 大臣被撤換之時,此後「清流 |之中心内容(中央政治之腐敗)與時限(光緒十年三月(適按: 標題(五)蓋非先師遺稿中原有,證據如下:(1)此標題之後, 」即開始失勢〕至二十年十一月〔對日求和定議 而前此之千餘字則屬第(四)篇 可以下列幾點解釋之: 即恭親王奕訢為首 絶不似 原文為:「總署 其 他諸

口 推 加恢復號「△」。 知此 篇中之標題 凡此, 五 一蓋 皆足見此條標題(五 非 原 有。 今删去。)是後來插入的, 原目録中之(五)以及「蔣本」中之(四 且頗為匆促。(4)據 吾家 諸

豐潤之關

係,

則仍以

闕

佚

ニ論

廷事 位論文時所曾面聆教誨者,似不致於此篇中竟無反映。頗疑此篇所存之内容亦不 戰敗後遭受攻 JΠ **」**蹟, 本篇之内容似仍有闕文,例如:先師於此篇案語中曾提到:「茲先就黄秋岳書所論寶 張佩綸二人之始末, 一時,而又為權貴所側目之政治地位與作用。而此 之首, 再未見提及。 既為北 計, 終獲革職遣戍之嚴譴等史事, 派 於張佩綸 清流 而加以補充糾正, 亦可見一斑矣」。 」領袖李鴻藻 亦僅詳記其於中法戰爭時, 之得力親信 而全未見述及其早歲 諸方面, 又受到李鴻章之器 但此「新稿本」之後文,於實 受任會辦福 皆適於先師 為「清流」主將之一, 建軍 重 指 導 在士大夫中 務,於馬尾 F 寫作 盡全備 學

(六)戊戌政變與先祖先君之關係(補文及校勘

記

也。

尚應補 蔣 本」按語中 入六十餘字。而全篇之後半部中,「新稿本」又增一段先師評述康有為之案語約二百 嘗 云 本篇為 全稿 其中「所缺 引文亦補齊」。 今以 新稿本 對 校 則 引 文中

不久,救免當時密旨拿問之帝黨骨幹文廷式(時蟄居長沙)去日本事,約三百餘字。通計共 餘字。篇末另增補兩段文字:其一為記先師尊人散原先生晚年之幾次移居,及蘆 不食,逝世於北平之概況,約百餘字。其又一為「附言」記散原先生於戊戌政變前 溝橋事變

九五頁,第九、十行:「堂官許應緊懷塔布等阻格不奏」句下,應補:「一日六堂革職,

增補七百餘字,補文如下:

大臣頗自危。」

九六頁, 第五行:「剛〔毅〕云:有旨不准説!」句下,應補:「先生怒叱曰:爾軍機大

第一九九頁, 一九八頁,第十一行:「朱公七十餘,負榦略」句下,應補:「行賈,致巨富。」 倒四行:「康有為之初召對也,即疏言其短長所在,推其疵弊。」句下,應補

以下一大段:

平及南海初期著述尚能正確說明西漢之今文學。但後來廖氏附會周禮占夢之語,南海 其所著曰孔子改制考(寅恪案:范肯堂撰先祖墓誌銘, 南 海輓先祖詩云:「公笑吾經學,公羊同賣餅」者, 可證也。今日平心論之, 井研廖季 謂先祖喜康有為之才, 而 不 喜其學 應用

羊之學為有取於孔廣森之公羊通義。其實撝約為姚鼐弟子,轉工駢文,乃其特長。 華嚴經中,古代天竺人之宇宙觀,支離怪誕,可謂「神遊太虛境」矣。至若張南皮勸學篇痛 實亦俗書, 而公羊通義 斥公

殊不足道。清代今文公羊學者唯皮錫瑞之著述最善,他家莫及也)。

為論薦張公之洞總大政,備顧問

第一九九頁,倒三行:「四章京雖有異才,

要資望輕而視事易。」句下,

删去略號

第二〇二頁,倒五行:「前經將各該犯革職,拿交刑部訊究。」句下,應補:「(寅恪案:可

參同月庚寅條。)」

第二〇四頁,第二行:「榮禄之薦先君,不見於公牘,或亦此故歟?」句下,應補:「俟考。

噫

第二〇五頁,「蔣本」本篇末,「新稿本」增補兩段如下:

不數歲而有蘆溝橋事變。先君憂憤不食,遂以不起。故未得見抗日勝利,惜哉!痛哉! 故遷居匡廬。不意其地遊客衆多,煩囂殊甚,頗厭苦之。時 先母及先長兄衡恪同時病歿於金陵。家人恐先君憂傷過度,遂移家杭州。 寅恪任教清華大學, 繼因杭州夏季 乃迎養

原籍 以前之短時 萍鄉 兹有可附言者,即先君救免文芸閣丈廷式一事。戊戌政變未發,即先祖、先君尚未 迅速拿解來京。其實文丈既不在上海,又不在江西,而與其夫人同寓長沙。先君 間 軍機處廷寄兩江總督,謂文氏當在上海一帶。又寄江西巡撫, 謂文氏 或在 江 革 既 西

此 朝盛流李文田、沈曾植等所定之蒙古元秘史對音本。 見蹤跡。 探知密旨 開日本治蒙古史之先路也。 復以為文丈在妓院宴席,遂圍妓院搜索之,亦不獲。文丈後由滬東遊日本,齎同、 以三百金贈文丈, 先君所撰文芸閣學士同 屬其速赴上海。而先祖發令,命長沙縣緝捕。長沙縣至其家, 年輓詞 日本那珂通世因之撰成吉思汗實錄一書, (見散原精舍詩上)六首之四 云

三島(自注:「君嘗遊日本」), 留得口 元禮終亡命, 邠卿辱大儒。孰傳鐘室語, 幾索酒家胡。 1中珠。 禍興機先伏, 烟濤夢自孤。

其第 一聯上句用史記玖貳淮陰侯列傳,下句指長沙縣搜妓院事。末二句指傳播同光盛流之學於

東瀛也。

本篇校勘記:

第一九四頁, 倒第三行:「非得有學術通知時事大臣, ·····」「學術」當作「經術」, 後加 頓

别

一九五頁,第四行:「先生既值樞府,德宗召見賜手詔云: ……」「見」字後加逗號。

一九五頁 倒第五行:「樞臣皆慶幸」。「樞臣」「新稿本」作「諸臣」。

一九六頁, 第二行:「請派大臣會審」。「審」字後,應為句號

九七頁, 第二行:「宜謹密藏」。「宜謹」當為「謹宜」。

第 九七頁 第八行:「政府卒閣不行, 以迄於亡」。「閣」當為「擱」。

一九七頁, 倒第三行:「陰念湖南據天下上游」,「天下」當為「東南」。

第十行:「〔光緒廿一年〕八月」。「光緒廿一年」後,脱「乙未」二字。

一九八頁 第四行:「復以學堂教習與康有為連」,「康有為」前,加「主事」二字。 倒第五行:「獨為府君出。」「獨」字後,加「勉」字。

第一九九頁,

第 第 第

九七頁,

第二〇〇頁 第九行:「在省設立時務學堂」,「省」字後,加「會」字。

第二〇〇頁 第九、十行:「講授經史掌故,法律,格致,測算等實學。」「法律」前,

號加「與」字。

第二〇〇頁 第二〇〇頁 倒第二行:「可參清史稿肆柒零楊深秀傳……」「肆柒零」改為「肆柒拾」。 倒第二行:「湖南陳寶箴……」「湖南」後,加「巡撫」。

第二〇一頁,第一行:「目今時局艱難」,「目今」前加「諭:」字。

第二〇一頁,第八行:「仍隨聲附和」,「仍」字前,加「倘」字。

第二〇四頁, 第三行:「可謂不幸中之大幸矣」。「新稿本」無「大」字。

第二○四頁,第三行:「先祖之意欲通過榮禄」,「意」字後有逗號。

第二〇四頁,第八行:「實由榮禄及王元和碰頭乞請所致也」。「王元和」為「王仁和」(即王

文部)之誤。

七)關於寅恪之婚姻(補文)

先君先母雖累加催促,然未敢承命也。後來由德還國,應清華大學之聘。其時先母已逝世。先 寅恪曾讀唐公請纓日記。又親友當馬關中日和約割臺灣於日本時,多在臺佐唐公獨立, 君厲聲曰:「爾若不娶,吾即代爾聘定。」寅恪乃請稍緩。先君許之。乃至清華,同事中偶語 寅恪少時,自揣能力薄弱,復體孱多病,深恐累及他人,故遊學東西,年至壯歲,尚未婚娶。 知之尤諗。因冒昧造訪。未幾,遂定偕老之約。茲錄唐公原詩,並寅恪和詩於後。唐公詩 見一女教師壁懸一詩幅,末署「南注生」。寅恪驚曰:「此人必灌陽唐公景崧之孫女也。 故其家

蒼昊沉沉忽霽顏,春光依舊媚湖山。補天萬手忙如許,蓮蕩樓臺鎮日閒。(寅恪案:唐公

歸來後,家居桂林之環湖邊,故云蓮蕩。光緒戊戌春間, 全國競言改革, 公自傷閒居, 無

緣補天也。)

盈箱縑素偶然開, 任手塗鴉負麝煤。一管書生無用筆,舊曾投去又收回。

爲人作書,口占二絶。冬陰已久,立春忽晴,亦快事也。南注生。

寅恪記工

南注公詩幅藏之有年,旅居香港時, 適值太平洋之戰, 倉促攜以歸國, 頗有割損

横海雄圖事已空,尚瞻遺墨想英風。古今多少興亡恨,都付扶餘短夢中。

兹重付裝裱,

謹題四絶於後。

當時詩幅偶然懸 因結同心悟夙緣。果騰一枝無用筆, 飽濡鉛淚記桑田。

卷新裝劫後開 劫痕猶似染炱煤。 湖山明媚雖依舊, 舊日春光去不回

頻年家國損朱顏, 鏡裏愁心鎖疊山。 歷書太行人事路, **儻能偕老得餘閒**

鶴孫(擬以鶴孫為寅恪夫婦二人之孫)。次女小彭,適文昌林啟漢,生一子日暉。三女美延尚未 七夕展佳期」,即指是而言也。後生三女,長女流求,適錢塘董有淞, 九二八年舊曆七月十七日與唐篔結褵於上海。余堯獨丈(肇康)賀以一聯。 生三女: 景宜 其上句云:「天孫

九六六年六月二十三日端午,寅恪書於廣州康樂,中山大學東南區 年七十六。 一號樓上。

時

(原載一九九四年紀念陳寅恪先生百年誕辰學術論文集, 江西教育出版社)

陳寅恪集後記

家最 我們從小就知道全家最寶貴的東西是父親的文稿。 好的箱子裝載, 家人呼之為「文稿箱」。 避日軍空襲時,首先要帶的就是「文稿箱」。 從抗戰逃難直至「文化大革命」,父親文稿都是用全 出版父親文

集自然是父母,

也是我們姐妹

最大心

願

在, 嘗侮 父親 道變換 則為我們姐妹辛勞的最 食自矜, 一生坎坷, 病殘齊至 曲學阿 抗日烽火中, 世」。 始終未曾間斷學術創作。 高報償 如今父親全集出版, 顛沛 流離, 生活窘迫, 而父親為學一貫堅持「獨立之精神, 學界儻能於研究父親著述時, 雙目失明, 暮年骨折卧床, 更知父親此種精 更經 自由之思 痛 苦。 然而 想 無論世 「未

離世, 集 稿 中 棺尚遠。 一九六二年胡喬木同志來訪, 竟 送交蔣 由上海古籍出版社刊行,這只是父親文字的一部分。一九八八年六月,蔣天樞先生不幸突然病逝 終未 洗劫 父親聽了很高興, 能 天樞先生。 見到陳 空, 片紙不留。 集出版。 蔣先生沒有辜員父親囑託 父親生前已將出版文稿重任託付於弟子蔣天樞先生, 以為有望見到文集面世。 談及文稿,父親直言:「蓋棺有期,出版無日。」胡答:「出版有期, 「文革」結束後, 我們姐妹將歷經曲 付出 豈知「文化大革命」 開始, 艱巨勞動, 折於 於一九八〇年主持 一九七八年 不料文稿在 父母備受推 Ŧi. 出 月追回 版 了陳 殘, 的 泛親文 寅恪文 文革 蒼涼 蓋

代為出版文集過程中已親自審定文集編目及有關事宜,故仍按父親原意進行。而此次刊行全集所增 筆記等)。一九八〇年出版的寒柳堂集, 唐質詩存),書信集, 現在出版的陳寅恪集 夢未定稿據一九八七年六月收回的殘稿作了校補外,其餘編排均不作變動, 集(高僧傳之部),並講義及雜稿 元白詩箋證稿, 則是期望從不同角度反映父親的學術生涯。 讀書札記一集(舊新唐書之部)、二集(史記、 是在上海古籍出版社所刊印之陳寅恪文集基礎上進行的, 柳如是別傳諸集, (兩晉南北朝史講義、 金明館叢 此次出版時作了校對, 稿 初編 唐史講義、 一編, 除寒柳堂集中詩存併 備課筆 隋唐制 漢書、 記 度淵源略論 晉書、 因父親生前託付蔣 論文、 唐人小說等之部 增加了陳寅恪詩 講話 入詩 稿 唐代政 集, 評 寒 語 天樞先 柳 治 ()集()附 堂記 史述 聽 生 Ξ 補 課

及一九八七年六月兩次收回詩文稿,但仍未全部歸還。 晚年整理就緒準備出版的文稿,於「文革」中全被查抄, 利文長老尼詩偈集中文舊譯並補譯及解釋其詩等等(見一九四二年九月廿三日父親致劉永濟信)。 而未成之稿」,如蒙古源流注、 父親的文稿墨跡命運亦如其人, 有的在運輸途中被盜, 世說新語注、 或存放親友處丢失,現下落不明, 頻遭劫難, 面世困難。 五代史記注、 抗戰時已遺失了多箱撰有眉識的書籍, 即便抗戰勝利後在清華大學授課、 「文革」過去撥亂反正後, 佛教經典之存於梵文者與藏譯及中譯合校、 難覓其蹤。這些皆為父親「廿年來所擬著述 雖於 一九七八年五月 其中有的被戰 研究之講義、 而父親 四

目前 具料等, 所收 亦未曾得見。總之, 集之最全者而拟名「陳寅恪全集」,轉又考慮到其實並不能「全」,故稱 散落在各處的文字, 迄今尚有部分未能獲見。這次刊印父親文集 「陳寅恪集」。 因其 為

述。 版陳 枚舉 歷經十年的艱難曲折, 及參與 外學者弟子, 此 於上海古籍出 次父親遺作付梓, 而今陳集業已付印, 集為中外學者深望, 夫人錢澄女士,華忱之先生等將珍藏了多年 難以 輯錄 一痕跡以自作紀念」, 一一敬列, 並 審閱 版社 我們姐妹的友人以及相識或不相識的各界人士支持幫助。 主持 讀書札 三聯書店非常重視,投入很大力量以保證質量 陳寅恪集終於面世, 出版 在此謹向 我們希望以此集告慰逝去的父母, 此書之所以遲至今日方能面世, 記等多位先生亦於此一併致謝。 了陳寅恪文集, 他於 一切參與、 「賸有文章供笑駡」 當此之時,我們百感交集,真不知何以表述其經過於萬 推動 黄萱先生協助 「文革」 幫助、 之時, 其間有許多我們始料未及的困擾, 支持出版陳寅恪集的人士表示衷心 在我們收集父母 蔣先生做了不少工作。 劫後幸存的父親書函贈送, 父親自謂 尚望 一後世相知儻破顏 「文字結習與生俱來, 同時我們得到父母親朋 首先感謝 詩文書信資料過 校補 蔣天樞先生一 寒柳堂 各種支持幫助 0 程 必欲於未 我們更希望將 於此 故舊 中 記 九八〇年 無 劉 未 海内 定稿 節 出 先 細

陳 漢延 謹述 一九九九年七月三日父親誕生一百零九週年

父親的這些文字,

作為祖

國文化遺產

獻給後世

相知

陳寅恪集再版説明

斯年、 手寫本唐代政治史略稿, 再版重印的機會我們做了少量校勘修訂工作, 聯 書 致胡適、 店出版的陳寅恪集十三 致聞宥少數函件的時間認定, 個别詞句作了 種十四册,自二〇〇 變動; 如 編排順序也相應有所變動。 略增改書信集、詩集中的某些注釋; 一年一月至二〇〇二年五月面世後, 糾正個别誤字、圖片説明; 但未及增補近年來新發現的 唐代政治史述論稿對照 更正 時逾八載。 書信集中 現藉 致傅

在此 仍 此 一陳寅恪信札 如既往得到大家的支持和幫助。 特向熱心提供資料及指出陳寅恪集中訛誤的讀者朋友,致以衷心謝忱! 詩作, 亦屬憾事。

陳流求 二〇〇九年四月

並希望此次再版重印後

